





AUG. 7363





CONSIDERATIONES

Supra præcipuos Articulos REGULÆ
DIVI AURELIJ AUGUSTINI
EPISCOPI HIPPONENSIS.

Et Ecclesiæ DOCTORIS Eximij;

Ex Sacra Scriptura, SS. Patribus, Asceſeos
Magistris, probatissimis Auctoribus,
Studiô privatô, cujusdam Canonici Regul: Later:

S E L E C T Æ.

Demum auctæ, operâ
REVERENDISSIMI DOMINI

MATTHÆI
KRASZEWSKI

Divinâ Providentiâ ABBATIS exemptæ & im-
mediatè S. Sedi Apostolicæ subjectæ Cano-
niæ Cervenensis, CANONICI Cathedralis
Plocensis.

Usui & commoditati RR. Canonicorum Cerven-
sium, ad modum Epistolæ Pastoralis dicatæ; Omni-
bus verò Religiosis, sub eadem Regula Aureliana
DEO militantibus, mirè utiles.

I M P R E S S Æ.

De Consensu Illmi Officij Spiritualis.

V A R S A V I Æ

Typis S. R. M. & Reipublicæ in Collegio Regio
Scholarum Piarum.

In Bibliotheca Regia. Anno 1807. M. Aug.
of. Catholici

Aug 7363

(H)(†)(H)
PRÆFATIO.

Sanctus Augustinus, Ecclesiæ Doctor, & Decus singulare, Apostolica vitæ Amator, & Imitator maximus; scripsit præter alia celeberrima opera, etiam Regulas pro suis: compendium perfectionis, & sanctitatis, solidas continens virtutes, quæ Religiosum faciant, & ornent: amoris, & Religionis ad DEUM: obedientiæ, Charitatis, mansuetudinis, & justitiæ ad proximum, superiorem, æqualem & inferiorem, fortitudinis denique, ac temperantiæ perfectæ ad se ipsum, ut merito dici possit: Pax super illos, qui hanc Regulam secuti fuerint: ad Gal. 6. adeoque dignissimam, quæ non solum, juxta sanctissimam ipsius S. P. N. Augustini voluntatem, singulis septimanis legatur, vel audiatur, sed quæ per singulos etiam mensium dies, quotannis semel, iterumq;, aptis meditationibus imprimatur animis nostris. Tales exhibet præsens libellus; quibus frui, & DEUM mecum precari, ut opitulante ipsius sanctissima gratiâ, exactè omnes Regulas observare valeamus. Etenim

nim sine gratia vocationis, in Religione vivere non possumus; hæc autem gratia, affixa est Regulis, per quas, veluti per canales, ad nos derivatur. Hinc B. M. Magdalena de Paz: DEO revelante didicit, inter quinque res petendas, pro quovis Ordine conservando, in suo primo Spi-ritu, hanc quoque rem assidue petendam: ut omnes Religiosi perfecte cognoscant, quanti momenti sit observare, quamlibet rem minimam Sanctæ Regulæ. Regula quam violamus, videtur forsan modica; sed damnum inde emergens permagnum esse. Nos itaque continuo à DEO, magnis precibus flagitemus gratiam, ut pluris semper æstimemus observationem Regulæ, quàm ullam rem hujus mundi, & ut constanter omnes, & singulas, nullâ neglectâ, accuratè bono exemplo servare valeamus. Ut enim sanguis in membra defluit per venas, sic & gratiæ Divinæ in nos derivantur per Regulas; Nec possunt canales hi sanctioris vitæ truncari, sine mortis periculo, si custodiamus Ordinem, custodiet nos in vitam æternam. Hæc cogitemus & seriò meditemur, atque ita vivere allaboremus, qui S. Augustinum amamus, & profiteamur certissimum Ducem ad æternam Beatitudinem, quæ nos tendimus.

DISSER.



DISSERTATIO EXEGETICA

De vero, & genuino Spiritu Vocationis,
Ordinis Canoniorum Regul: Lateranen:

*Obsecro vos, ut dignè ambuletis, vocatione quâ
vocati estis. ad Ephesios 4. v. 1.*

Icet universi Religiosi Ordines,
quibus S. Mater Ecclesia, velut
Regina in vestitu deaurato, cir-
cumdata varietate, condecoratur, in sub-
stantiali votorum obligatione conveni-
ant, peculiaria tamen cuique compe-
tunt munia; quæ, & unum, ab altero di-
scernunt, & cujusvis Instituti Sectato-
res, ad certam vivendi normam, propri-
umque

umque Ordinis Spiritum, specialiter fecundandum adstringunt. Sic enim videmus, quosdam Religiosos Ordines, multum actioni, alios plus tribuere contemplationi, alios solarum animarum, alios Corporum curam suscipere, & profiteri, alios in summa paupertate, alios in perfectissima obedientia, alios denique in exteriori vivendi rigore, primum, ac præcipuum sui Ordinis studium collocare. Sed quid tandem, de Sancto Ordine Canonico dicendum? etiamne hic, communem omnibus reliquis, Religiosæ vitæ tenet substantiam? non quiescit Apostolico-Augustiniana Institutio, in supra enarratis particularitatibus, imò peculiaribus sibi vendicat munia, quæ Zelosi hujus Instituti Cultores, proprium, ac genuinum, Sancti Ordinis nostri, Spiritum asseruerunt.

Leonardus Hastanet: in vita B. Alani de Solminiac Episcopi *cap. 10.* refert, hanc animadversionem; quod, dum idem Alanus noster, Ordinem Canonorum Regularium, in commisso sibi Cancelatenfi Collegio, ad competentem observantiam reducturus erat, imprimis
 cona-

conatus est, proprium Spiritum, Canonici Ordinis indagare, & subjectis Canonicis insinuare. Idque eventu felici, pientissimâ solertia suâ, & eximiâ vitæ Sanctitate, in tribus compendiosè Articulis ostendit; videlicet apertè demonstraturus; quod Ordo Canonicus in particulari teneatur eminere. 1. *Devotione Exemplari.* 2. *Charitate obsequiosâ.* 3. *Obedientiâ, amoris affectu stipatâ,* Has itaque virtutes, judicavit Ordini nostro, quodammodo Characteristicas, & ad ritè obeunda essentialia Ordini nostro munia, summè necessarias, de quibus mox dicemus.

1. *Devotio Exemplaris.*

Certum est, inter primarias, & proprias Ordinis nostri functiones esse, horas Canonicas in Ecclesia publicè, coram populi frequentia decantare, & officia Divina, Missæque Sacrificia offerre, & celebrare; quod dudum docuit eximius Soc: JESU Doctor Franc: Zuares, & suo postmodum calculo confirmavit Eminentiss: S.R.E. Cardinalis Rupifucaldius, de Ordine nostro optimè meritis, dum dixit. *Proprium Canonici Regularis esse,*

interesse Choro diu noctuque. Ut testatur
Augustinus Errath in reg: fol. 48. n.
143. Nobis itaque Canonicis Regulari-
bus, per se, & ex essentia competit Cho-
rus, ac officij Divini publica celebratio,
cùm tamen Monachis, alijsque similibus,
ex accidenti tantum, & dispensatione
conveniat. Quod ipsum satis ostendit
S. Legissator noster, in Regula, ubi ait:
Psalmis & Hymnis cùm oratis DEUM
&c. nolite cantare nisi, quod legitis esse
cantandum &c. Si ergo ex officio, no-
bis competit Divinas laudes decantare,
quæso, quomodo officio huic, tam præ-
cellenti, dignè satisfaciemus? nisi acce-
dat necessaria devotio, quæ actiones no-
stras, teste nostro Hugone Victorino, ve-
lut anima corpus vivificat, dum è con-
tra oratio nostra, sine devotione, in au-
ribus DEI est, quasi mugitus boum, imò
elangvida prorsus, & emortua, ut eru-
ditè advertit Mauburnus noster fol. 169.
Roseti cap. 8. n. 1. Nec arbitrariam
proinde putes, hanc Orationis devotio-
nem, ad quam triplici debitò S. Ordinis
nostri Alumnos cit: Mauburnus obliga-
tos esse, satis scitè ostendit, scilicet de-
bitò

bitô Justitiæ, mandato Regulæ, & statuto Ecclesiæ. Debitô Justitiæ quidem, cum Fundatores, & Benefactores nostros, bona sua sât copiosa, non in usum perfunctoriè, sed devotè psallentium, Deoque servientium concessisse, & donâsse præsumendum sit. Mandatô Regulæ expressè præcipientis, ut orationes nostræ, quò sunt frequentiores, tanto quoque sint sanctiores, id est devotiores. Statutô Ecclesiæ quæ in Concilio Aquisgranensi, specialem Canonicis Regularibus præscripsit instructionem, ut nimirum. *Horis Canonicis intersint, curâ vigilantissima, humiliter, & devotè*, ut allegat Nebridius noster, in Antiquario fol. 287. Et hæc de substantia devotionis. Circumstantiam præterea, & qualitatem primi hujus Canonici Spiritûs inspiciamus, quæ in eo consistit, ut devotio nostra sit *Exemplaris*: cum enim Officia Divina à nobis celebranda sint, non more Monachorum in occulto & in Oratorijs privatis, sed in publico, & coram copioso adstantis Populi confluxu, necessarium est, ut devotio sit Exemplaris, hoc est, ut in exteriori corporis, morum-

rumque compositione elucescat, modestia in situ, habitu, sensuumque custodia, adstantes ædificet, ac concinna cantûs Ecclesiastici suavitas, ab omni quoad fieri potest, errore segregata, audientium corda ad devotionem exstimulet. Quantum enim possit devota Oratio, & cantus, devotâ suavitate conditus, experimento proprio edoctus, audiat Augustinus, de cantu Ecclesiæ Mediolanensis, Dominum DEUM, sic alloquens: *Quantum flevi in Hymnis, & canticis tuis, suave sonantibus, Ecclesiæ tuæ vocibus, commotus acriter, voces illæ influebant auribus meis, & eliquabatur veritas tua, in cor meum, & ex ea aestuabat affectus, & currebant lachrymæ, & benè mihi erat cum eis.* Lib. 9. Confess: cap. 6. Id ipsum, & nos in cordibus audientium efficere poterimus, si in Divinis Officijs modestè conversari, suaviterque cantare studuerimus: ad quam quidem devotionem Exemplarem, nos denuò obligare videtur, allegatum Concilium Aquisgranense, quod præter superius dicta, pro Canonorum Regularium Exemplari, in Divinis Officijs conversatione, disponit sequen-

fequentia. *Mox ut signum datum fuerit, omnes ad Ecclesiam conveniant, quam non pompaticè, vel inhonestè, sed cum reverentia, & DEI timore ingrediantur, in Choro stent religiosissimè; non otiosè fabulentur, sed aut orent, aut cantent, aut audiant.* Haftenus dicta, pluribus Exemplis, ex Historijs Ordinis nostri depromptis, confirmare possem; sed prætermis-
sis illis, quæ Kempensis noster, de quibusdā Regularibus Ordinis nostri recen-
set, pauca, quæ in vita nostri S. Vilhelmi Abbatis apud Godefridum Hensch. 6. Aprilis ponuntur, formalia, pro tua ædificatione adduco: *Circa devotionem in Choro psallentium, ac Sacrum Altaris ministerium; animus ejus sedulo versabatur, & devotiones in his tenerrimè diligebat.* Et hæc, de devotione Exemplari, quatenus primam partem Spiritûs Ordinis Canonici constituit, sufficiant.

2. *Caritas Obsequiosa.*

Alteram Spiritus Canonici partem, denuo ex essentiali, imo & primaria Ordinis nostri functione, non tam colligo, quam demonstro. Certum quippe est, Canonico Ordini nostro ex essentia com-
pete-

petere vitam activam, & curam animarum; nam ut recentior quidam, satis eruditè in hanc rem argumentatur: *Canonici Regulares ex essentia sua Clerici*, quod vel inde constat, quia tum Concilium Tridentinum, & Constantiense, tum summi Pontifices Pius IV. & V. illis præcedentiam in Conventibus publicis præ Monachis, ex hac præcipuè ratiōne adjudicârunt, quia sunt ex essentia, & per se Clerici, quod etiam claris verbis affirmat, Abbas Panormitanus, celeberrimus Benedictini Ordinis Canonista, de Ordine nostro, sic scribens: *Monachi, ut Monachi, non sunt Clerici; sed Canonici Regulares, ut Canonici, sunt Clerici, & non possunt esse nisi Clerici.* Idem pluribus tradunt, copiosi ex Ordine nostro Scriptores, S. Jvo, Stephanus Tornacensis, Augustinus Tici-nensis, & alij; Clerici autem ex natura & essentia statûs sui, deputantur ad curam animarum, & vitam activam; consequenter, si Canonici Regulares, ut probatum est, per se, & ex essentia, sunt Clerici, per se quoque ipsis competit vita activa, ad proximorum salutem, quovis

vis modò procurandam, ordinata. Huic igitur officio primario. & ut S. Dyonisi-
sius Areopagita ait: *Divinorum omnium*
divinissimo, quâ ratione dignè satisfaci-
ent, nisi etiam, altero Canonici Ordinis
Spiritu, scilicet *Charitate obsequiosa*, inte-
rius inflammati, proximorum salutem,
velut unicum activæ vitæ objectum pro-
movere, modis omnibus affectent à tam
igitur cuique est necessarium, secunda
hâc Spiritus Canonici parte, bene esse
imbutum, ut absque eo, nullus se repu-
tet, genuinum Instituti Canonici pro-
fessorem. *Duas quippe res* (sunt verba
S. Legislatoris nostri) *professi sumus*,
Sanctitatem, & Clericatum, nam *Clerica-*
tum propter populum suum, Deus imposuit
cervicibus nostris. Quibus certè verbis
geminum, quem hætenus attuli, Cano-
nici Ordinis Spiritum, clarissimè S. Do-
ctor exprimit, unaque nos instruit, inte-
riori Sanctitati, quam causat *Devotio*
Exemplaris, iungendam esse commissi
populi curam, ad cuius indefessam ad-
ministrationem, nos animet *Charitas ob-*
sequiosa, in animis nostris à primo Reli-
gionis tyrocinio radicata, à primo in-
quam

quam tyrocinio: ab hoc enim tempore, nulla quidem tibi cum proximo agendi offertur occasio, ut tuæ prius salutis, sedulò providens, aliorum salutem, eò securius, postmodum opereris: *nemò enim teste Kempense apparet, nisi, qui libenter latet.* Et ipse Christus Dominus, ab omni perversæ periculo infinitè remotus, primos triginta vitæ annos, contemplationi reservans, reliquos tres, tandem activæ vitæ dicavit: non uno siquidem die, succenditur ignis ille Divini amoris, qui Cor tuum, eo usque inflammet, ut solo zelo divinæ laudis, & gloriæ, ex animarum salute constanter augendæ, maximum activæ vitæ negotium aggrediaris; quò, tamen igne deficiente, si non frustraneus, languidus saltem erit, omnis in animarum cura conatus; non uno die domantur noxiæ passionēs, malæque concupiscentiæ, quibus tamen indomitæ periculosè suscipitur, alienæ salutis procuratio; testante hoc ipsum Apostolo, his verbis *Castigo Corpus meum, & in servitutem redigo, nè forte, cum aliis prædicavero, ipse reprobus efficiar.* Non uno die acquiritur, virtutum

tum splendor, quò præluere debent, qui animarum curam suscipiunt, exigua enim prædicationi vis inest, si exempla & opera prædicantis, non concordent. Hoc igitur jam tibi capesse negotij, ut ferventibus, iisque frequentibus, contemplativæ vitæ exercitiis, purissimum animarum zelum, solo Divinæ gloriæ augendæ motivo innixum, in corde tuo implantas, hûc tua se nunc cura convertat, ut à noxijs passionibus purgatus, multifario virtutum splendore, temetipsum exornes, sic præmunito felicissimè cedet omnis in animarum cura conatus, tempore à Superioribus designando, adhibendus. Primos Religiosæ vitæ annos, soli contemplationi impende, ut postmodum securiùs, imò & fructuosiùs operam dare possis, vitæ activæ. Nec tamen putes velim, laudabilem animarum zelum, quem subinde ex Divina Inspiratione senties, primis hisce annis, omni omnino cariturum effectu: id saltem efficiet, ut quibus personali alloquio prodesse non licet, affectu saltè & oratione Dño DEO offerendis, prodesse non inter mittas. In ferventia subinde, hic
zelus

zelus erumpat desideria, omnia totius mundi impediendi peccata, nè Divina, summèque amanda DEI Bonitas, tam immanes patiatur offensas, nè infinitum Divini sanguinis pretium, in tot, quas Orcus aliàs absorberet, animabus maneat frustratum, nè tanta Divinæ Majestati dematur gloria, ex animabus, si salvarentur, percipienda. Clamabis frequenter cum Zacharia: *Illuminare Domine his, qui in tenebris & in umbra mortis sedent &c.* & alia, quæ Sanctus amor per se, tibi suggeret, ad Deum pro animarum salute ingeminabis suspiria, tanti apud Deum haud dubiò valitura; ut non multo minorem ijs, qui opere ipso in animarum lucris occupantur, sis reportaturus, meritorum coronam. O! quot viris tam Apostolico zelo succensis floruit, & etiamnum floret, Sacer Ordo Canonicus. Centum hujusmodi ex præcipuis tantum enumerat noster Petrus à S. Trudone, inter quos cæteris emicuit S. Patricius, qui quod Hybernorum gentem, Sacris Christianæ fidei, labore inexplicabili initiaverit, honorifico Hybernorum Apostoli titulò, ab universa condecoratur Ecclesia. 3.

3. *Obedientia Amoris affectu stipata.*

De tertia, quæ etiamnum superest, Spiritûs Canonici parte, scilicet: de *Obedientia amoris affectu stipata* dubitari meritò potest; quâ ratione, illa Ordini Nostro, modò quodam speciali sit propria, cum hæc potius omnibus omnino Religiosis Ordinibus, sit communis. Hoc non obstante, facili negotiò ostendi potest, hanc virtutem specialiter, Ordini nostro esse convenientem, & tertiam constituere Spiritûs Canonici partem. Illud enim Ordini nostro, modo quodam speciali est proprium, quod est illius, ab omni alio statu, cum quo aliquam cæteroquin habet affinitatem, distinctivum, taliter autem nos distingvit *Obedientia amoris affectu stipatâ*. Licet enim cum Sæcularibus Clericis, magna nobis ob *Charitatem Obsequiosam*, quam & illis quoque communem esse decet, intercedat convenientia, ab illis autem nos distingvit, *Obedientia Religiosa*, Superiori claustrali, interjectò, etiam voti Sacramentò, promissa; ab alijs autem Religiosis Ordinibus, qui æquali nobiscum

biscum Obedientiæ vinculo ligantur, discernit nos, addita modificatio. *amoris affectu stipata*: alij quippe Religiosi, vi suarum Regularum ad obediendum, vel serijs pænitijs cōdēcentur, vel gravibus, quas eadem Regulæ continent, obligationibus adiguntur. Neutrum horum, in Ordine nostro reperio; utpote cujus Professores S. Legislator vult obedire: *Non sicut servos sub lege, sed sicut liberos sub gratia constitutos*, quosque à Superioribus *non timore, sed amore, non potestate dominante, sed charitate serviente* vult dirigi, prout expressis, his cautum voluit verbis: *ipse verò, qui vobis præst, non se existimet potestate dominante, sed charitate serviente felicem*, Et paulo inferiorius. *Plus à vobis amari appetat, quam timeri*. Deinde cōstans est probatissimorum Theologorum assertio, Regulam nostram, sub nulla, etiam veniali culpa, nos obligare, ut alibi ex instituto dicitur; ut adeò, Canonici nostri, nec timore culpæ, nec severitate pænæ, sed solo honestatis, quæ in perfecta voluntatis suæ abnegatione, & subjectione relucet, amore, ad obediendum, Superioribus induci queant.

Habes

Habes jam Charissime, triplicem, eum-
que genuinum Ordinis nostri Spiritum,
quem prætereà compendioso exemplo
expressum, ob oculos, tibi ponit, S. Epi-
scopus Vicelinus olim Ecclesiæ Bremen-
sis, sub Augustini Regula Canonicus.
Huic equidem Sancto Viro, usque adeò
in usu erat *Sacra Obedientia amoris
affectu stipata*; ut plerisque illius Eccle-
siæ Canonicis, svavissimum obedientiæ
jugum excutientibus, ipse, nullâ jam ne-
cessitate exteriore compulsus, sed solo
in eam virtutem amore roboratus, in
Regulari observantia perstiterit, ac in
eum finem cum Beatis Thietmaro, Vol-
kero, & alijs illius Ecclesiæ Canonicis,
in villam quandam, sub obedientia per-
petuò victurus secesserit. Ut autem
& *Devotioni Exemplari*, pro exigentia
Spiritûs Canonici commodius insisteret,
Capellam ligneam, Divinîs laudibus diù,
noctuque cum suis Canonicis concinen-
dis, ex concessione Bremensis Archi-Epi-
scopi, in possessionem recepit; atque ut
completus undequâque foret Canonici
Ordinis Spiritus, exinde indefessè in vi-
nea Domini laborare, Barbaris, Scla-
vis-

visque in Halsatia demorantibus, Christum evangelizare non destitit, dignus certè, qui, illius gentis Apostolus, in hanc usque diem audiat. Non incongruè, Viro huic Apostolico, omnibusque aliis, juxta triplicem Canonici Ordinis Spiritum degentibus, illud *Ezech: 1.* applicavero. *Ubi erat impetus Spiritûs, illuc gradiebantur*, quò videlicet eum impellebat Spiritus Ordinis, quem profitebatur, Canonici, à teneris annis in ejus animo radicans, illuc omne illius studium, omnis illius actio dirigebatur. O radicetur in te quoque Charissime! triplex hic Spiritus, scilicet: *Devotio Exemplaris, Caritas obsequiosa, & obedientia amoris affectu stipata*; hic enim te, post hac, non nisi ad actiones summè laudabiles, ac Instituto nostro maximè conformes inflammabit, tandemque de eo verificabitur, quod de Divino Spiritu, dudum verissimè, cecinit Regius Psalter: *Spiritus tuus bonus, deducet te in terram rectam.* Terram videlicet promissionis, hoc est æternæ Beatitudinis, quam infallibiliter consequeris, si triplici hoc Spiritu, mentem tuam, à primis Religiosæ vitæ initijs sedulò imbuere studueris.

CONSI-

CONSIDERATIO I.

De Fine Vocationis Religiosæ.

R E G U L A.

Hæc sunt, quæ, ut observetis præcipimus.

Primum, propter quod in unum estis congregati. Cap. I.

Considera: 1. **Q**UOD Christus Dominus noster finem, cur in mundum venerit, semper præ oculis habuerit, eumque nobis multoties indicârit, dicens: *Filius hominis non venit ministrari, sed ministrare, & dare animam suam, Redemptionem pro multis.* Matth. 20. *Descendi de cælo, non ut faciam voluntatem meam, sed voluntatem ejus, qui misit me.* Joannis 6. *Me oportet operari opera ejus, qui misit me, donec dies est.* Joannis 9. &c. Ut, & nos, juxta præceptum Sancti Patris nostri, præ omnibus semper finem vocationis nostræ ad Religionem, & quare nos DEUS ex gratuita sua gratia in unum congregârit, seriò perpenderemus, nimirum: *ut unanimes habitemus in domo Domini, & sit nobis anima una, & cor unum*

in DEO. Id est: in hoc finis unius voluntatis, unius animi, & unius intentionis; ut serviamus DEO, omnia opera nostra cum purissima intentione, & omni diligentia, integrè, devotè, & reverenter in conspectu ejus faciendo; ut DEUM diligamus ex toto corde, anima, mente, & omnibus viribus, jugiter ei per pios affectus inhærendo, & ad hoc unum, nos invicem adjuvando & incitando. Vide, an & quomodo hætenus, hunc finem præ oculis habueris, & secundum illum vixeris?

Considera: 2. Nos in unum congregatos esse, ut ad normam vitæ Apostolicæ vivamus, & serviamus Deo absq; proprio in paupertate, castitate, & obedientia, quarum virtutum, teste Vincentio Caraffa Soc: JESU, hic proprius effectus est, quod erigant, ac sublevent animam ad summum perfectionis gradum, eamque indissolubili immobilique nexu uniant primæ sanctitatis Idææ, Christo Crucifixo, nos eidem Cruci cum Christo affigant, efficiantque Crucifixos vivos, quibus mundus crucifixus est, & ipsi mundo; pedes namque terrenorum affectuum affiguntur voto paupertatis, manus fini-

finiftra voluptatum carnalium fuffigitur voto caftitatis; dextera honoris vani, & mundani, voto obedientiæ. Deponamus igitur, non jam ad pedes Apoftolorum, fed ipfius Chrifti Crucifixi, omnes thefauros, & divitias hujus mundi: omnes honores & dignitates, omnes delicias, & voluptates, & cum Apoftolo arbitrenur omnia, ut ftercora, ut Chriftum lucrifaciamus, ad DEUM ex intimo cordis jugiter afpirando, & orando, ut nobis det Spiritum pauperem, Spiritum caftum, Spiritum obtemperantem, ac perfectam in Divina gratia fiduciam, & de nobis ipsis diffidentiam. Vide ergo, an haftenus, ita vixeris, aut certè, deinceps vivere velis?

Confidera: 3. Nos in unum effe congregatos, non, ut uno folum veftis genere induamur; in una menfa comedamus; in uno Choro ad orandum conveniamus, & in exterioribus omnibus adunemur: Sed ut quemadmodum, hinc unum fimus corde & Spiritu, invicem nos, in Domino diligentes, & DEO in omnibus fideliter fervientes, ita etiam illic in illo Regno beatitudinis, in quo

pax summa est, DEUM laudemus, eo-
 que æternaliter Beati fruamur. Voca-
 tio enim ad Religionem, est vocatio ad
 Regnum, ad gloriam, ad summum bo-
 num; hic quippe est terminus, in quem
 respexit DEUS. Neque Christus vocat
 Electos suos ad Crucem, ut in ea perma-
 neant, sed ut transeant per eam, sicut
 & ipse transivit, & sic intrent in gau-
 dium, quod non auferetur ab eis. Est
 itaque Vocatio ad statum Religiosum
 donum præstantissimum, ob quod, nos
 DEO semper gratos esse oportet, non
 verbò, & lingvâ solum, sed potius ope-
 re & veritate, observando omnes Re-
 gulas, quæ sunt Instrumenta Providen-
 tiæ Divinæ, quibus nos gubernat, & per
 eos nos DEUS vult ducere ad Regnum
 suum. Ideo S. Bernardus nominat Re-
 gulam Scalam Jacob; quia sicut huic Pa-
 triarchæ, quod propter amorem DEI
 deseruerat Patriam, Parentes, propriam-
 que voluntatem; Dominus DEUS per
 hanc scalam monstravit Cælum apertum,
 Angelos descendentes, & ascendentes,
 ac se ipsum scalæ innixum. Ita Reli-
 giosus mediante observantia Regulari,
 loco

loco Patriæ, Parentum, propriæque voluntatis recipit Cælum, Angelos, & ipsummet DEUM. Et hoc est fundamentum veræ lætitiæ Religiosi, quod DEUS ex infinita sua bonitate præ tot mille mundi hominibus, ipsum ad tam felicem, beatumque Statum vocavit. Sed quomodo tu hætenus hoc DEI Beneficium æstimâsti? Aut saltem posterum æstimabis?

CONSIDERATIO II.

De Felicitate Vocationis Religiosæ, &
Concordia in Bono.

R E G U L A.

*Unanimes habitetis in Domo Domini, &
sit vobis anima una, & Cor unum,
in DEO. Cap: I.*

Considera: 1. **R**eligionem esse arcem
munitissimã, cujus muri, & propugnacula sunt Regulæ, quæ
nos indemnes contegunt, & defendunt,
atque ab omni inimicorum nostrorum
diabo.

diaboli, mundi, & carnis violentiâ securos reddunt. *Si enim volueris servare mandata (& Regulas) conservabunt te* ait Spiritus Sanctus *Eccl: 15.* Oportet autem omnes Regulas servare; quemadmodum enim non prodest Civitati magnis, & fortibus muris communitam & cinctam esse, si vel unicum posticum apertum habet, quò facilitè hostis ingredi valeat; sic non prodest præter unam, omnes servare Regulas, si in me inimicus ingredi, & animam perdere potest. *Venit,* ait supremus noster Belli Dux: Christus Dominus *Joan: 14.* *Princeps mundi hujus, & in me non habet quidquam.* Hoc est: nihil habet, nullus patuit illi ingressus in me. Hinc adhortatur nos Apostolus Petrus. *1. 5. Vigilate, quia adversarius vester diabolus, tanquam leo rugiens circuit querens, quem devoret, cui resistite fortes.* Exacta nimirum observatione etiam minimarum Regularum, quam obtinebimus continuâ nostri mortificatione, ad exemplum S. Pauli de se ipso dicentis. *1. Cor: 9.* *Sic pugno, non quasi aërem verberans, sed castigo corpus meum, & in servitutem redigo.*
 Unde

Unde & nos ad similem pugnam excitat
2. Tim: 2. *Labora sicut bonus miles Christi JESU, nam non coronabitur, nisi legitime certaverit.* Et S. Laurentius Justin: cap. 7. de discipl: mon: illius Cælestis Civitatis, inquit; iste est introitus, iste nempè est locus, de quo ait S. Jacob: Verè non est hic aliud, nisi Domus Dei, & porta cæli. Qui hic viriliter & perseveranter certaverit, coronabitur illic gloriosè: ambo castra Dei, ambo sedes Sapientiæ, ambo Sanctorum civitates, qui in hac laudabiliter conversatus fuerit, ab illa excludi non poterit. Vide nunc quomodo bonum certamen certare velis, ut triumphato diabolo, mundo, & carne, gloria & honore coronari merearis in cælo ?

Confidera: 2. Arcis hujus fortissimæ, five Religionis supra firmam petram ædificatæ præstantiam, & felicitatem, in qua secundum S. Bernardum: *Homo vivit purius*, Imprimis ob puritatem intentionis, quâ omnia facit ad gloriam Dei, & animæ salutem. Deinde ob puritatem à peccatis mortalibus, quæ sola animam verè impuram faciunt: quia
boni

boni Religiosi mallent mori, quam peccare scienter mortaliter. *Cadit varius.* Quia nititur baculo obedientiæ, dirigitur à Regula, & tenetur majorum Institutis, & exemplis probatissimis. *Surgit velocius* 1. adjutus Sacris Meditationibus, Lectionibus, examinibus; & inspirationibus. 2. quia lapsus ejus ordinariè non sunt nisi veniales, qui multis modis expiari queunt; oratione dominicâ, aquâ benedictâ, tunsione pectoris, Confessione generali, gemitu, actu ferventè charitatis &c. *Incedit cautius*, ob præsentiam Dei, cui in omnibus placere desiderat. Deinde, quia Religiosa disciplina non finit quemquam impunè peccare: & sunt, quando opus est, & admonitiones & reprehensiones. *Irroratur frequentius*, gratiâ Spiritûs Sancti, quam ex Sacris Meditationibus, aliisque pijs exercitijs copiosius haurit, *Quiescit securius* 1. Expers omnis curæ rerum ad victum vel amictum necessarium. 2. Ob singularem Dei custodiam, & internas consolationes, quas ex die, fructuosè, & in Dei servitio, consumpto sentit. *Moritur confidentius.* Ob testimoni.

monium bonæ conscientiæ, vitam religiosè peractam, & auxilium Fratrum circumstantium &c. *Purgatur citius in hac vita;* ob frequentatos actus contritionis, sinceras confessiones, lucratas indulgentias, renovationem votorum. *Post mortem verò.* Ob crebriora & efficaciora fratrum, & aliorum suffragia &c. *Remuneratur copiosius:* Ob tot victorias de adversarijs, mundo, carne, diabolo reportatas, & quia, etiam opera ex se indifferentia, propter obedientiam, & ex amore Dei facta, omnia ei cooperantur in bonū. Vide ergo, quomodo felicitatē vocationis tuæ agnoveris, & DEO ob eam te gratum exhibueris? aut saltem, quomodo imposterum hæc præstare, & observationem Regularum magni pendere velis?

Considera: 5. Quemadmodum non sufficit civitatem aliquam, aut arcem fortibus propugnaculis esse circumvallatam, nisi & milites, & cives, simul sint unanimes, & concordes; sic non sufficit, nos esse in unum congregatos, nisi & ipsi habeamus animam unam, & cor unum in DEO. Sunt enim nonnulli subin-

subinde in Religione, qui, sicut ipsi tenent aliquas hostium partes, ita & alios sibi attrahere, & conjungere student, ut secum conveniant in ijs, quæ sunt mundi & carnis. Tales nimirum sunt, qui horrent mortificationes, quærunt carnis commoda; amant libertatem; nullam sustinent disciplinam, discordias seminare non erubescunt, & facillè contra Superiorum constitutiones, & restrictiones murmurant: cum quibus cor unum habere, non est in DEO, sed contra Deum: siquidem per tales florentissimæ etiam communitates everti possunt. Ideo S. P. Augustinus: *Sicut, inquit, multum nos contristat discordia inter bonos, ita valde dolendum est, quando pax est inter malos.* Tunc enim augentur omnia pessima, quæ fieri & excogitari inter homines possunt. Et S. Gregorius: *Perniciosum est, si desit unitas bonis, quia ex contraria malorum unitate sequitur* 1. *Incorrigibilitas*, qui enim divisi corrigi poterant, iniquitatum suarum pertinacia uniti durant. 2. *Audacia in malitia*: Impetum fecerunt unanimiter in eum Act. 7. Quia unitas perver-

perversos roborat. 3. *Durior persecutio bonorum.* Reproborum enim unitas, bonorum vitam tantò durius premit, quanto se ei per collectionem opponit. Ita S. Gregorius: *Ista unitas in DEO non est, sed potius contra DEUM.* Unde volenti fervare mandatum de unitate cordis in DEO, providendum est, inquit Humbertus, nè conveniat cum alijs in malo! ne discedat ab alijs in bono; & ne consentiat cum aliquo æquè in bono, atque in malo, sed solum in iis, quæ DEI sunt, & cum omnibus pacem habeat, exemplo illius, qui dicit Psal: 119. *Cum his, qui oderunt pacem, eram pacificus. Non enim est magnum,* inquit Thom: Kemp: lib: 2. cap: 3. *Cum bonis & mansuetis conversari, hoc enim omnibus naturaliter placet, sed cum duris & perversis, aut indisciplinatis, aut nobis contrariantibus pacificè posse vivere, magna gratia est, & laudabile nimis virileque factum.* Vide igitur, monet Hugo: ut sicut corpore separamur à sæculo, ita & corde, & animo, jungamur DEO, & in DEO, proximo nostro.

CONSIDERATIO III.

De Paupertate Religiosa.

R E G U L A.

*Non dicatis aliquid proprium, sed sint
vobis omnia communia. Cap. 1.*

Considera: 1. PAupertatem Evangelii-
cam, quâ Religiosus,
propter DEI amorem, & spem vitæ æter-
næ, omnia relinquit, omnibus virtutibus
eminere, & esse, ut, Ambrosius loquitur
lib: 5. in Luc: Ordine primam, & quasi
aliarum virtutum Parentem. Quia ho-
minem Religiosum totum interius, & ex-
terius ordinat; ponit enim circa res ex-
ternas primò in intellectu veram, qualem
Deus habet illarum rerum æstimationẽ,
ostenditque verè esse caducas, viles, no-
xias. Secundo in affectu contemptum,
& fastidium. Denique in opere plenam
abdicationem. Ideo Christus in summa
egestate nasci, totâ vitâ plurima incom-
moda, famem, sitim, frigus, defatigatio-
nes &c. pati, & tandem in funesta Cru-
ce nudus, ac rebus omnibus spoliatus
mori

mori voluit, ut sic everteret Regnum mundi, quod præcipuè consistit in affectu nimio divitiarum, nosque doceret in ijs non consistere beatitudinem, sed potius eam acquiri per contemptum omnium opum terrenarum. Ut enim Beati suâ gloriâ omnes contenti in cælo vivunt, sic Religiosus solo victu & amictu modico contentus degit in terra. Ille ergo ad exemplum Christi verus est pauper, qui sitit omnem nuditatem, & incommoditatem, & sola necessitate, & Dei voluntate compulsus ad temporalia accipienda se demittit, non discernit inter cibum, vestem, cellam &c. quæ meliora, commodiora, utiliora, dummodo famem pellant, contegant, & habitandi locum præbeant. Vide! an talis sit tua paupertas.

Considera. 2. Veros Spiritu pauperes debere animum habere excessum, quo super omnia terrena emineant, ut vix verbulo quid suum dicere velint, cum omnia aliena & fluxa esse sciant: *Non habemus hic civitatem permanentem, sed futuram inquirimus;* ait Apostolus Hebr:

13. Ideo, omnia bona mundi sanctâ
qua-

quadam superbiâ contemnere debemus, ut cum Propheta dicere possimus, Thren: 3. *Pars mea DEUS, dixit anima mea, propterea expectabo eum.* Et cum Psalte Regio Pf: 141. *Portio mea in terra viventium. Dat DEUS portionem in terra viventium,* ait S. P. N. in hunc locum: Sed non aliquid à se extra se. Quid dabit amanti se, nisi se; certum est, uti nihil prodest homini, si mundum universum lucratur, DEI verò sui detrimentum patiatur, sic nihil ei obest, si totum mundum perdat, dum tamen Christum lucrifaciat. Hinc S. Apostolus ad Phil 3. quæ mihi, inquit, fuerunt lucra, hæc arbitratus sum, propter Christum detrimenta, verumtamen existimò omnia detrimenta, & arbitror ut stercora, ut Christum lucrificiam. Ideo ipse DEUS consolatur Abrahamum, dicens: Gen: 15. *Noli timere Abraham, ego Protector tuus sum, & merces tua magna nimis, Ego ipse sum, ut possis dicere, pars mea DEUS in æternum.* Unde S. P. N. in Pf: 72. *aurum inquit, & si semper habebò? DEUM & si semper haberem, quam magnum bonum haberem? quid est fratres invenimus divitias nostras*

stras, eligat sibi partes genus humanum, clamet Populus DEI! Pars mea DEUS meus! tantum habebo, & nunquam non habebo, magna felicitas pars mea D E U S. Quamdiu? in secula. Hæc S. Pater. Vide, utrum hâc parte contentus esse velis.

Considera: 3. Perfectionem paupertatis, consistere in quinque expropriationibus, juxta Vincent: Caraff: de Perf: Vot: Cap: 3. Prima est expropriatio dominiij, quod est; jus disponendi de re ad libitum independenter à voluntate Superioris; unde non possumus quidquam donare, nec alienare, vel dare, aut recipere, sub quocunque prætextu, vel titulo donationis, mutui &c. absque Superioris licentia, nec quidquam Superiorem celare, nec eum impedire possumus, ut desuper non disponat. Unde dicit S. P. N. cap 6. Reg: Quod si aliquis rem sibi collatam celaverit, furti judicio condemnatur. Secunda est expropriatio usûs proprietatis. Non enim habet Religiosus usum juris, sed tantum usum facti, est purus usuarius; qui nulla re uti, & hanc nonnisi in usum à Superiore sibi concessum applicare potest. Tertia est expro-

expropriatio *usûs superflui*. Nihil superflui ei concedatur, nihil necessarium denegetur, ordinat Concil: Trident: & S. P. N. Cap: 1. *Distribuat*, ait, *cuique vestrum à Præposito vestro victus, & tegumentum: Non æqualiter omnibus, quia non æqualiter valetis omnes, sed potius unicuique, sicut cuique opus fuerit.* Hinc ulterius præcipit. Cap: 6. *Ut si quis nobis in Monasterio constitutis aliquam contulerit vestem sive quodlibet aliud inter necessaria deputandum, non occultè accipiat, sed sit in potestate Præpositi, ut in rem communem redactum, cui necessarium fuerit, præbeatur.* Quarta est expropriatio *certi alicujus necessarij*. Necessarium enim non debet esse certum, ita, ut sæpenumero desit, & ostenditur cum experientia effectus aliquis paupertatis. Pauperes esse volumus, ait S. Bernardus, modo nihil nobis desit. Scio abundare, & penuriam pati, inquit Apost: ad Phil: 4. & 2. Cor: 11. *In labore, & ærumna, in fame; & siti in frigore & nuditate.* Quinta est expropriatio *affectûs*. Ad perfectionem enim paupertatis requiritur, ut nos prorsus expolimus,

mus, omni rerum necessariarum affectu. Quemadmodum statua, dicebat S. Ignat: Loj : nullum prorsus habet affectum ad vestem, sivè sit nova, sive trita, & antiqua. *Alioquin, ut benè advertit Cassianus, non est abscindere passionem, sed immutare à pretiosis rebus ad vilia.* Et S. P. N. adducit in specie signum aliquod, quò quando hujusmodi adsit affectus, cognoscatur. *signum est, inquit, dolor. Si cum dolore discedit, quod cum amore aderat.* Si quotiescunque, Superior nos privat nonnullis vestibûs, librîs, cubiculò &c. mœrore, & tristitia corripi-
mur, signum est, ijsdem nos appo-
suisse affectum nostrum. Vide nunc, an
& contra quam ex his expropriationi-
bus hactenus peccâris, & quomodo de-
inceps has expropriationes amore, &
exemplo illius, qui, ut, ait Apostolus:
cum dives esset, factus est pro nobis egenus,
amplecti velis?



C

CON-

CONSIDERATIO IV.

De Mundi Contemptu.

REGULA.

Sursum cor habeant, & terrena ac vana non querant. Cap: I.

Considera: I. Quod cor nostrum sursum habere debeamus, quia, sicut nulla res naturalis quiescere potest, donec locum, finemquè suum naturalem obtineat; ita cor nostrum tamdiu quietem sibi polliceri non potest, donec in fine suo ultimo, qui solus DEUS est, quiescat. Hinc rectè S.P.N. Augus: Lib: I. confess dixit: Fecisti nos Domine, ad te, & inquietum est cor nostrum, donec requiescat in te. Anima quippe rationalis, ait S. Bernardus, ad imaginem Dei facta cæteris rebus occupari potest, impleri non potest; capacem namque DEI, quidquid DEO minus est, non implebit; valent quidem hominis famem provocare, & excitare, neutiquam tamen cor satiare. Quia, ut ait S. Bernardus; non sunt naturales, & proportionati animæ cibi.

cibi. Hinc suspirat S.P.N. ad cap: 3.
Sol: *Da quod peto, quoniam si cuncta, quæ
fecisti, mihi deneris, non sufficit seruo tuo,
nisi te ipsum dederis.* & L. i. Confes: cap:
16. *Væ animæ audaci, quæ speravit,
si à te recessit, aliquid se melius habituram
versa & reversa in tergum, & in latera,
& in ventrem, & dura sunt omnia, & tu
solus Domine, requies.* Quam vera sit
hæc doctrina, quamque frequentibus
multorum, & Salomonis maximè, expe-
rientijs comprobata, ex hoc solo colli-
gere potes: Si enim ille, qui omnia,
quæ desideraverunt oculi ejus, non eis
negavit, nec cor suum prohibuit, quin
omni voluptate fueretur, adeò tamen,
his rebus satiatus non est, ut fateri co-
actus sit: *vidisse se in omnibus vanitatem,
& afflictionem animi, & nihil permanere
sub sole.* Eccle: 2. Quanto minùs re-
quies sperari poterit à nobis, qui né
millesimam quidem eorum bonorum
partem percipere possumus. Ideo ve-
rissimè S. Basilius in hæc Psaltis verba:
Exultate iusti in Domino, scribens
non ait, inquit, *Propheta, exultate in abun-*
dantia rerum temporalium, non quòd habili

ingeniô , singulari scientiâ, alijsque natura dotibus instructi; non quod optima sitis corporis valetudine; non quod Herculeis polleatis viribûs, non, quod ab hominibus magnificatis, aut illustre nomen apud eos obtineatis, sed exultate in Domino; id est omne vestrum gaudium in Deo, & sanctissimæ voluntatis ejus adimpletione constituite. Hec enim sola satiat; reliqua omnia nec satiare, nec mentem explorare valent, nec verum gaudium adferre. An non igitur omnia, quæ à finis centrique nostri consecutione impediunt, cum summa violentia removebimus?

Considera: 2. Quod cor nostrum sursum habere, illudque ab omnibus abstrahere debeamus, nisi ulterius decipi velimus, toties iam delusi, & decepti: Quem enim fructum retulimus ab amore hujus, vel illius creaturæ? omnes illæ voluptates, quas nunc hic, nunc illuc decerpimus, quid reliquerunt, nisi cordis amarorem, & occultas anxietates? Unde istud, nisi quod animus ad finem, centrumque suum anhelat, expectat DEI visionem, & fruitionem. Bene igitur, qui dixit: *Mihi autem adhærere DEO*

DEO bonum est Psalm: 72. super quæ
 verba S. P. noster ait: *Hoc est totum Bo-
 num, vultis amplius? doleo volentes, fra-
 tres. quid vultis amplius? DEO adhære-
 re nihil est melius, quando videbimus fa-
 cie ad faciem. Et Thom: Kemp: cap:
 1. sol: O Breve & dulce verbum! DEUM
 amplectens, & mundum excludens univer-
 sum? Quid amplius dicendum, & quid
 ultra cupiendum? nonne satis est, si fiat
 quod iam dictum est? O DEUS meus tu u-
 nicum bonum meum, solus bonus, solus
 dulcis, de te loqui, dulce est amanti, de te
 cogitare, & propter te omnia facere, & pa-
 ti suave est devoto, cujus cor non est in
 mundo, sed tecum absconditum in cælo, DE-
 US meus, quomodo est illi in corde, qui
 tuo fervet amore Quale gaudium ejus, quem
 nulla delectat creaturarum vanitas! an
 non vox eius canit in psalmo: Quid
 mihi est in cælo, & à te quid volui super
 terram? Si igitur quid est, quod inor-
 dinatè voluisti, tu illud amore DEI
 relinque, eligens magis cum Christo a-
 mara, quàm dulcia, penuriam magis,
 quàm abundantiam, despectum magis,
 quàm honorem. solitudinem magis;*

quàm frequentiam hominum, ut cor tuum sursum habere, Deoque adhærere possis.

Consueta: 3. Cor nostrum sursum ad cælum habendum; quia ibi est, quidquid desiderare possumus. *Cur per multa vagaris homuncio,* te alloquitur S. P. N. man: c. 34. *querendo bona animæ tuæ & corporis tui? ama unum bonum, in quo sunt omnia bona, & sufficit. Desidera simplex bonum, quod est omne bonum, & satis est, nemo enim bonus nisi solus DEUS.* Nam sicut aquæ omnes, inquit Tob: Lohner S. J. non aliam habent substantiam, nisi quam ex fonte acceperunt, ita nec Creaturæ aliam habent bonitatem, nisi quam à DEO acceperunt, & in ordine ad DEUM conservant. *Quid ergo amas caro mea,* inquit ulterius S. P. N. *quid desideras anima mea? Ibi est, quidquid desideras, si delectat pulchritudo? fulgebunt Iusti sicut sol, si velocitas aut fortitudo, aut libertas Corporis, cui nihil obistere poterit? erunt similes Angelis DEI: Si longa & salubris vita? ibi erit sana æternitas, & æterna sanitas. Si satietas? satiabuntur; cum apparuerit gloria Domini. Si ebrietas*

brietas: inebriabuntur ab ubertate domus DEI: Si melodia, ibi Angeli concinunt sine fine DEO. Si quaelibet non immunda, sed munda voluptas, torrente voluptatis suae potabit eos Dominus, Si Sapientia: ipsa DEI Sapientia ostendet eis ipsam sapientiam. Si amicitia; diliget DEUM, plus, quam se ipsos, & invicem, tanquam se ipsos. Si potestas, Omnipotentes erunt suae voluntatis, ut DEUS suae. Si honor & divitiae, DEUS servos suos bonos, & fideles super multa bona constituet, imo Filii DEI, & Dij vocabuntur, & erunt haeredes DEI, cohæredes autem Christi. O! igitur anima insignita DEI imagine, redempta Christi Sanguine, & desponsata DEO in fide, & Charitate; surge, relinque terrena ac vana, & ascende ad Civitatem supernam. de qua gloriosa dicta sunt. Anima enim, ait S. P. N. cap: 24. man: quæ amat, ascendit frequenter, & currit familiariter per plateas Cælestis Jerusalem, visitando Patriarchas, & Prophetas, salutando Apostolos, admirando exercitus Martyrum, & Confessorum, Chorosque Virginum speculando. Cælum, & terra, & omnia, quæ

in eis sunt, non cessant mihi dicere, ut amem DEUM meum. Et cap: 28. loquitur in quo: Amor DEI est, ille semper habet cor suum, & desiderium in superna elevatum, quando sedet, quando ambulat, quando quiescit, vel quando aliquid agit, cor à DEO non recedit. Omnes ad amorem DEI exhortatur, omnibus amorem DEI commendat, & quàm dulcis sit DEI amor, & quàm malus, & quàm amarus sit amor seculi, corde, ore, & opere omnibus demonstrat. Vide, an & tu, cor tuum ad exemplum S. P. N. sursum habeas, aut saltem deinceps habere velis.

CONSIDERATIO V.

De Vitanda Superbia, & sectanda humilitate.

REGULA.

Superbia, etiam bonis óperibus insidiatur, ut pereant. Cap: 1.

*Considera: 1. Q*uemadmodum humilitas fundamentum est omnium virtutum: Sic superbia origo est omnium

mnium vitiorum. Ex Superbia enim prodeunt, ambitio, temeritas, hypocrisis, obstinatio, proprii iudicii tenacitas, iracundia, vindicta, vana gloria, & non rarò libido, quia DEUS animum superbi per corpus deprimit, permittitque; ut ad suam confusionem in defectus graves labatur, ut adeò merito hoc vitium à Spiritu Sancto dicatur oculis DEI abominandum: *Abominatio Domini*, ait Prov: 16. *Est omnis arrogantia*: ideo DEUS punit, & persequitur superbum; eum privat suis gratijs & favoribus, atque consilijs eius se opponit, quia, etiam ipsè DEI consilijs adversatur. Sicut igitur sine humilitate virtutes, & bona opera evadunt periculosa, imò & perniciofa: ita & cum humilitate ipsa vitia, & peccata cessant esse perniciofa & fiunt non raro utilia. Erat Publicanus miser & magnus peccator; at quia humilis, ita, ut oculos cælum versus erigere, & ad altare accedere vereatur, ob id Sanctus evadit, & ipsiusmet DEI eloquium meretur. Phariseus è contra, quia virtutes suas iactat, & cuncta bona opera in publicum protrahit; si pri-

us iustus erat, ubi superbit, sibi que applaudit, peccator evadit, & à DEO cum bonis suis operibus reprobatur. Cum itaque humilitas, ex vitiis virtutes proferre, & ex scelerato in momento sanctum efficere, superbia vero Virtutes in vitia convertere, & ex iusto, magnum peccatorem facere possit, quis non omnimodo superbiam detestetur, & humilitatem amplectetur, cum ipse DEUS, nostram perfectionem, & salutem ex humilitate nostra pendere voluerit, & non ex nostra exaltatione, siquidem non omnes ascendere, nosque evehere: bene autem descendere, & nos omnes deprimere possumus. Non omnes grandia pro DEO præstare, nec grande quid, ad ejus gloriam audere possumus. Verum nullus est, qui se deprimere non possit. Non semper possumus omnia bona, quæ volumus agere, possumus tamen ob defectū boni alicuius, nos coram DEO submissè gerendo, bonum illud, quod non agimus, supplere. Non possumus semper orare, semper ieiunare, semper plorare &c. Sed humiliare nos semper possumus. Cum ergo superbia-

odi-

odibilis fit coram DEO & hominibus
Eccle: 10. nosque bonis omnibus pri-
 vet: è contra humilitas, via brevis, ac
 tuta fit ad sanctitatem: Vide quomo-
 do illam detestari, & fugere, hanc vero
 amplecti, & sequi velis.

Considera: 2. superbum & vanæ gloriæ
 deditū, bona opera sua, & Spiritualia stu-
 dia inflectere ad captandā laudē hominū,
 & in omnibus velle exaltari, magnum
 & excellentem apparere, cū tamen ni-
 hil sit, nisi pelagus vanarum cupidita-
 tum, fons peccatorum, vas vacuum, a-
 ut vas contumeliæ, quod tot, ac tanta
 implevêre peccata Si verò DEUS eva-
 cuatis delictis, illum suis donis reple-
 vit, & vas in honorem effecit, non est,
 cur de alieno se iactet, & non omnem
 gloriam benefactori suo adscribat. J-
 pse enim est, qui nos, quando non era-
 mus, Omnipotentiâ suâ creavit, & quan-
 do longè errabamus, nos in viam re-
 ctam reduxit. Ipse nos, quando ceci-
 dimus, sublevavit, quando stabamus, nos
 tenuit. Quando desperabamus, nobis
 animum addidit, & quando veniebamus,
 nos recepit: ipsi ergo soli omnis honor

& gloria: Quia irrefragabilis veritas est, licet opus nostrum habeat in se ornatum, & svavitatem omnium virtutum in speciem, si tamen non puram DEI gloriam spectemus, sed nostram apud homines quæramus laudem, DEO non placeamus, sed potius indignationem ejus incurrimus, quia DEO debitum honorem suum furamur, nobisque illum in iustè vendicamus. Hoc præfiguravit DEUS in lege veteri, in incenso dicto Thymiam, quod debebat adoleri, & offerri soli DEO, & DEUS prohibuit sub pæna mortis, ne tali odore homo se oblectaret. *Homo*, ait: Exod: 30. *Quicumque fecerit simile, ut odore illius perfruatur, peribit de populo.* Si tantum crimen erat, talem compositionem materialem facere ad se oblectandum, idque quia Sanctum erat Domino, quantum erit ex ipsis donis DEI, & ex operibus bonis, ad quæ facienda DEUS singulares dat gratias, & vult sibi ex assè consecrari, laudem captare, & gloriam, & velle ob ea magnifieri, æstimari, laudari? Stultus igitur dicendus est; quisquis vanam gloriam appetit: *Qui enim*

enim, inquit S. Creg: pro Virtute, quam agit, humanos favores desiderat, rem magni meriti vili pretio venalem portat & unde Cæli Regnum mereri potuit, inde nummum transitorij sermonis quærit. Vide ergo, an & quomodo hactenus superbiam, & vanam gloriam fugeris, aut saltem deinceps fugere velis? Gloriam enim meam, inquit DEUS Jsa: 42. alteri non dabo. Ideo frequenter dicito DEO cum Propheta, in occasionibus, quæ inanem gloriam inspirare possunt. Non nobis Domine non nobis, sed nomini tuo da gloriam.

Confidera: 3. Superbiam, & inanem gloriam esse infidiatorem & spoliatorem bonorum operum, & meritum nostrorum. Ita S.P.N. Augustinus, & S. Basilius Const mon: cap: 21. ait: inanis gloria, est dulcis Spiritualium operum expoliatrix, iucundus animarum hostis; blandissima bonorum nostrorum deprædatrix &c. Ideo necesse est, ut bona nostra abscondamus, adhortatore S. Bonaventura, qui fer: 2. Pasch: ita ait: Thesauri virtutum in arca cordis claudendi sunt, serâ humilitatis. Hanc seram imi-

imitando acquire à Filio fabri JESU Christo, qui cum in forma DEI esset &c. semetipsum exinanivit, formam servi accipiens, & humiliavit se omnibus creaturis subjiciendo. Subjecit enim se, imprimis Angelis; quid enim opus erat, ut veniret Angelus ad confortandū ipsum? Quid opus fuit dici: Angelorum legiones posse ipsum vindicare, & resistere comprehensoribus suis, quasi ipse non posset? Jejunus & famelicus & post 40. dies, & noctes, quid opus erat, ut acciperet cibum, velut eleemosynam ab Angelis, cum ipse posset lapides in panes convertere? 2do. Humiliavit se hominibus, non solum SS. Matri, & Nutritio Josepho, sed etiam impiissimis Principibus, Cæsari, Herodi, Annæ Caiphæ & Pilato, eorum iniusta mandata implendo, & iudicijs parendo. 3tio. Humiliavit se omnibus creaturis, patiens in se sævire frigus, æstus, spinas, sputa &c. 4to. Subiecit se ipsis dæmonibus, siquidem erat traditus in hora passionis potestati tenebrarum, & passus est se à diabolo duci super pinna-culum templi. Unde meritò nobis in-cla-

clamat: *Discite à me, quia mitis sum, & humilis corde; ora igitur cum S. P. N. Augu: medit: Cap: 1. Creator meus evel- le à me animi rancorem, & largire mihi mitis dulcedinem; Redemptor meus expelle à me Spiritum superbiæ, & concede propi- tius thesaurum humilitatis tuæ. Ut nun- quam desideres ab aliis æstimari, honora- ri, laudari, anteferri, sed omnẽ honorẽ & laudem in DEUM transferre, & te, omnium semper minimum, omnibûs DEI donis indignum & ad nova recipienda ineptum reputare. Talem enim te si- ne ulla falsitate æstimare potes; quia se- cundum ea, quæ ex te habes, revera ta- lis es. Expende tuam fragilitatem, vi- lites, misérias, ingrati tudinem, mali- tiam, peccatorum multitudinem tuo- rum; non aliorum, quæ ignoras, & il- lis te conforma. Vide, an & quomo- do hoc præstiteris, aut saltem præsta- re velis?*



CONSIDERATIO VI.

De honorando DEO in Fratribus.

REGULA.

*Honorate in vobis invicem DEUM, cujus
templa facti estis. Cap: 1.*

Considera: 1. S. P. Augustinum, nobis
in mandatis dare reci-
procum honorem, & venerationem, qui-
a cultus, quo servi DEI, se invicem com-
plectuntur, in ipsum DEUM redundat:
Honorate in vobis invicem Deum, in
quem locum Humbertus; in honore ait,
exhibito homini, honoratur DEUS, &
quid honoratur, in homine quocunque,
nisi imago DEI. Honor vero, qui ex-
hibetur imagini, illi, cujus est imago
potius exhibetur. Et S. Thomas, non
debemus, inquit, solum DEUM revere-
ri in se ipso, sed etiam id, quod est e-
jus, debemus revereri in quolibet, quia
hujus reverentiæ principium, & radix,
est reverentia, quam quis habet ad DE-
UM; ideo monet Apostolus, ut honore
invicem præveniamus: *honore invicem
præva-*

prævenientes. Rom 12. Hominis lanè
 superbi est, signa honoris ab alijs expe-
 ctare, & illos ad honorem deferendum
 paratos, non magis prævenire. Cogi-
 ta igitur Deum habitantem in omnibus,
 & humilitatem tuam in honorando fra-
 tres tuos ostende, non, ut, tu honore-
 ris, sed, ut, in illis honores DEUM, ei-
 que placeas, cuius imagines, & templa
 facti sunt. *Honorate*, mandat S. P. N.
in vicem DEUM, cujus templa facti estis.
 In quẽ locum *Hubertus*, sicut (*inquit*) ho-
 nor, qui exhibetur templo, reputatur honor
 DEI, qui habitat in templo, quia unum
 est propter alterum, ita honorare fratrem, est
 honorare Deum in fratre, cujus est templum.
 Verum licet Doctor gentium omnes
 Christianos hoc titulo honorat, dum
 dixit: *nescitis, quia templum DEI estis,*
 & *Spiritus DEI habitat in vobis*, & rur-
 sum 2. Cor: *Vos estis Templum DEI vi-*
vi; nihilominus tamen hoc ipsum pe-
 culiari titulo, sive, ut *Humbertus* loqui-
 tur, specialiter convenit Viris Religio-
 sis, tanquam ijs, qui certa quadam, &
 singulari ratione DEO in Templa sunt
 consecrati. Vide igitur, an, & quo ho-
 D nore

nore hactenus fratres tuos persecutus sis ?

Considera: 2. Non absque gravi causa S. P. N. nobis vitam in communi Societate degentibus, honorem reciprocum injungere, eò, quod ille mirificam vim habeat ad fraternum amorem excitandum, fovendum, conservandum. Hinc S. Paulus doctrinam à fraterna dilectione exorsus, proprium nutrimentum subiicit honorem dicens: *Charitate fraternitatis invicem diligentes, honore invicem prævenientes*, ut sic DEUS in nobis omnibus honorificetur. Quod facile evinces, si dona, & divitias DEI in fratribus perpendas, eosque te meliores habeas. Hoc enim DEO perquam gratum est, ait S. Thomas, reputare in proximo aliquid boni esse, quod ipse non habes, vel aliquid mali in te esse, ex quo potes, ei te subijcere, per humilitatem. Et S. P. N. *existimate (inquit) in occulto Superiores, quibus estis in manifesto meliores.* iuxta illud ad Phil: cap: 2. *Superiores sibi invicem arbitantes. Est enim grande malum, ait S. Bernardus horrendumque periculum, si vel uni tua*
cogi-

cogitatione te præferas. Quid si DEUS præferat tibi eum, cui tu te præfers? Quid si peccator ille percussio pectore, oculis demissis, ingemuerit, & apud DEUM sit absolutus, teque sit melior, tu verò deterior illo, quò, te meliorem esse putabas? Cape igitur consilium Christi, & recumbe in novissimo loco, omnesque te meliores, & honore digniores reputa. Dic cum Blosio: Si de quopiam, qui parum emendatis moribus videatur, obrepit cogitatio, ut vel illi uni, te præferas, eique nullum honorem habeas. O Domine propitius esto mihi peccatori, ego vestigia illius servi tui exosculor, eum mihi præfero, meque eius, & omnium hominum pedibus conculcandum præbeo, indignus enim sum, quem terra sustineat. Vide! quid in hac re feceris, aut saltem deinceps facere velis?

Considera: 3. Nos Deum magno honore afficere, si amore ipsius, Fratrum nostrorum defectus benignè sufferamus: eosque tam apud nosmet ipsos, quam apud alios excusamus, & omnia in melius interpretemur: Alter alterius onera portate, & sic implebitis legem Christi. ait Aposto-

solus. ad Gal: 6. Quare autem non feramus aliorum infirmitates, ipsi, defectus plurimos habentes, quos omnino volumus ab aliis taceri, excusari, & tolerari. Elidamus igitur, omnes cogitationes, quæ aliena facta imminuunt, quandoquidem, superbia sincerum boni de alijs iudicij oculum eruit, vel claudit. Quisquis, inquit S. Gregor: Superbiæ in se tyrannidem captivâ mente susceperit, hoc primûm damnum patitur, quod clauso cordis oculô, iudicij æquitatem perdit. Nam cuncta, quæ ab alijs benè geruntur, displicent, semper aliena opera despicit, semper miratur, quæ ipse facit, & cum se in cunctis transcendere cæteros æstimat, per lata cogitationum spatia, secum deambulans, laudes suas tacitus clamat. Tu si sapis cum Thom: Kemp: *de te ipso nihil tene, de alijs verò benè semper, & altè senti: omnes fragiles sumus, sed tu, neminem fragiliorem, te ipso tenebis.* Vide quid in hac parte feceris, aut saltem imposterum facere velis?

ACTUS

ACTUS ELICIENDI.

Quando aliquod bonum proximi videmus, vel audimus. Ex Ludovico Palma.

*Particeps ego sum omnium timentium te,
& custodientium mandata tua.*

Pfal: 118.

Domine DEUS meus, cùm audio & video proximum meum, & particulariter N. tibi servire, & boni aliquid facere, vel moliri, gaudeo, & multum in hoc mihi complaceo, & bonum ipsius, quasi meum reputo, & tanquam meum illud tibi offero, & dedico cum omnibus illis bonis, quæ omnes Sancti peregerunt olim, & peragunt adhuc, in universo mundo ad æternam gloriam tuam, perinde ac si ipsemet, ea fecissem & facerem.

2. Ago tibi gratias Domine; pro bonis inspirationibus, & auxilijs, quæ tam huic N. quam omnibus alijs tribuisti; & tribuis ad benè operandum, & cogitandum. Neque aliter de hoc tibi gratias
ago,

ago, quam, si tale beneficium propriè fuisset exhibitum mihi.

3. Quin etiam insinuo, & immitto me in proprium cor ipsius, & omnium famulorum, & famularum tuarum; ut simul cum eis ex corde perficiam omne illud, quod, ipsi in cultu, & obsequio tui faciunt, & desiderant facere. Tu enim scis Domine, quod ego, idem omnino vellem præstare, si tu à me idem fieri velles, & ad idem agendum, gratiam, vires, occasionem, & facultatem dares; nullâ profecto me difficultate, nullo timore ab illo præstando, me absterri finerem.

4. Adauge verò Domine, enixè rogo, in illo bonam gratiam, & merita cum omni virtute, quantum ipse, te inspirante, desiderat, aut te sciente indiget, ut à quo tibi grata præstantur obsequia; multo etiam gratiora, & perfectiori modo deferantur.

5. Denique quæso Domine mi, ut quisquis viderit tale bonum, exemplò inflammatus, paria meditetur, & agere studeat, secundum dispositionem tuæ voluntatis, ad majus tuum obsequium, & gloriam Amen.

ACTUS

ACTUS ELICIENDI.

Cùm audimus, vel videmus aliquod malum proximi. Ex eodem.

In quo Judicio judicaveritis, judicabimini, & in qua mensura mensi fueritis, remetiatur vobis. Matth: 7.

1. **M**I perfectissime DEUS! cùm audio, & video, aliquod malum, maximè spirituale proximi mei, summo-pere compatio humanæ fragilitati; quamvis omnibus communi, & præcipuè compatio defectui hujus N. attamen non credo, tantum esse malum illud, quantum mihi videtur, vel dicitur: Imò, fortè nullum est, neque tale videtur lucidissimò oculò tuo, quale nostro fallaci. Si tamen Domine scrutator cordium nostrorum, est culpa aliqua, magnopere doleo de lapsu fratris mei, multò magis, autem de tua offensa.

2. Ego in vicem hujus defectus, & in compensationem tuæ offensæ, offero tibi pretiosum sanguinem JESU Christi Filij tui, tantopere humiliati, & attriti propter scelera nostra; Illius charitatem,

tem, mansuetudinem, ac longanimitatem, inter continuos nostros defectus tibi repræsentō.

3. Sed heu! & ego, id ipsum perpetravi vel in alio simili, te non minùs offendi. Proh dolor! & graviùs etiam te offenderem, nisi tua me gratia præservaret; unde etiam toto corde, gratias ago tibi pro auxilio, sine ullis meritis meis, mihi præstito.

4. Optimè scio, Domine, te ex quovis malo elicere posse majus bonum, aliàs malum non permetteres; cedat ergo ad majorem tuam gloriam defectus iste, ad majorem verò humilitatem, & cognitionem, sui ipsius, qui peccavit.

5. Oro denique, occlude omnium oculos, nè inde, sumant audaciam patrandi similia; liga lingvas, morsu conscientiae, ne de re illa, malè loquantur, nevé, ex minore delicto, quod per humanam fragilitatem admissum est, per defectum Charitatis, & improbitatem humanam, plura alia nascantur.



CON-

CONSIDERATIO VII.

De Oratione Mentali.

REGULA.

Orationibus instate, horis, & temporibus constitutis. Cap. 2.

*Considera: I. Q*UOD S. P. N. Augustinus, jubeat nos instare Orationibus, non solum vocalibus, sed etiam mentalibus, siue meditationibus, quia summè desiderat, DEUM à nobis amari super omnia, cujus adjumentum magnum est, meditatio. Hæc namque scintilla est divini amoris, corde concepta, & flatu afflantis Spiritûs Sancti sensim incensa, ut, in meditatione à scintilla excandescat ignis. *Anima* (aiebat Alph: Rodriq:) *exercetur in oratione mentali, ad assequendum suum finem, qui est amor DEI; ut videndo, quam multum DEO debeat, & quantum ab eo ametur, crescat semper in amore DEI, & empergiscatur, ad serviendum illi valde seriò, & ut, DEO valde placeat. Diligamus ergo DEUM, & ut plus diligamus, medite.*

ditemur. Nam, ut docet Angelicus : amor facit meditari de amato ; *Quod enim amabile est, (inquit Clem: Alex:) ad sui meditationem trahit*, cum igitur DEUS est summè amabilis, ideo debet esse magnes mentis nostræ, ut de illo quotidie meditemur non superficialiter, sed accuratè. Amans enim, inquit Albert: de Adhær: DEO Cap: 12. nititur singula, quæ ad amatum pertinent, non superficialiter, sed intrinsecus discernere, quasi ad interiora ejus ingredi, quod videns à nobis fieri DEUS, videt se, à nobis amari, & gaudet, amatque amantes iuxta illud: *Ego diligentes me diligo, & qui manè vigilant ad me (in meditatione) invenient me, ut ditem (magnis gratiæ donis) diligentes me, & thesauros eorum repleam.* Prov. 8. Vide nunc, si DEUM amas, quomodo meditari velis?

Considera: 2. Nos méditari debere; quia meditatio conducit ad refrænandas passiones. *Equis non in ipso cursu frænum iniicimus, sed ante cursum*, ait Plut: sic, qui propensi sunt ad iram, & antea rationibus refrænandi sunt priùs quàm

quàm in periculum ventum sit. Hoc fit in meditatione, ubi rerum Spiritualium rationes illas, quibus tempore periculi, necessitatis, animum contineamus, invenimus. Ideo meditationem, omnibus viris Spiritualibus, tam necessariam esse, scribit Jac: Alvar: de Perf: Tom: 5. Lib: 1. Cap: 11. ut sine illius studio, nomine Virorum Spiritualium, sint indigni; Incipiens enim, ait, meditari debet, ut proficiat; proficiens, ut perfectus fiat: Perfectus, ne ab adepta puritate excidat. Meditatio est velut cibus quotidianus, quò tum magni, tum pusilli indigemus. Absque cibò quotidie sumptò, puer non proficit in statura; adolescens non perveniet ad perfectionem viri. Vir non permanebit in sua substantià, sed brevè omnî robore Spirituali, ac vitâ exuetur. Meditatio est animæ, quod succus est arbori. Arbor sine succo non profert fructus, sed sterilefcit, arefcit, atque excindi meretur, ignis futura pabulum. At virum meditationibus assuetum, comparat Vates Regius, arbori felicissimæ: *In lege Domini meditabitur die, ac nocte*, inquit Ps:

1. *Et erit tanquam lignum, quod plantatum est, secus decursus aquarum, quod fructum suum dabit in tempore suo. Mit- tit enim flores, & folia, & fructus, jux- ta genus suum, tempore congruente. Talis est, qui jugiter seu frequenter me- ditatur; non quidem opus est, ut statim det fructum, sed tempore suo; ut cum fuerit tempus jejunandi, jejunet, cum fuerit tempus orandi, oret, cum injuriâ affectus fuerit, patienter toleret &c. nam folia verborum, flores desideriorum, & fructus bonorum operum reddit, secun- dum temporis exigentiam, & sic omnia, quæ facit, prosperabuntur. Et quemad- modum, qui cum magno aliquo, & ad- mirabili Viro, multum conversatur, ex ejus consuetudine non exiguum perci- pit fructum, sic, qui per hoc exercitium perpetuam cum DEO habet consuetu- dinem, divinam hauriet sapientiam, & singularem percipiet fructum, & jucun- ditatem. Hic etenim, licet gustare, & videre, quàm suavis sit Dominus. Vide nunc, & expende, an propter aliquod negotium, aut studia, meditatio vel abrumpi vel negligi debeat?*

Consi-

Considera: 3. Meditationem rem esse DEO perquam gratam, quia est potissima ad recti inventionem via, in qua via, DEUS gaudet, nos quotidie versari, ut inveniamus rectum, hoc est, id quod maximè DEO placet. Et ut hoc inveniamus, impendimus id, quod præstantissimum nobis DEUS dedit, nimirum, memoriam, quæ in medium affert ex suis thesauris mysteriâ sancta. Intellectum, qui scrutatur, & proponit cæcæ voluntati ea, quibus, juxta æternas, ac solidas rationes, discit amare, & odisse. Voluntatē, quæ agnita veritate, amore inflammatur, ut amet propositum sibi bonum practicum, & malum detestetur. Hinc David ait Psal: 118. *Beati, qui scrutantur testimonia ejus, in toto corde exquirunt eum.* Scrutamur testimonia DEI, cum ea, quæ in sacris literis continentur, à DEO scripta, meditamur intensè, & attentè, & nos id præstantes, beatos esse dicit, quia, toto corde exquirunt DEUM, id est, non solum obediunt DEO, cum aliquid præcipit eis, verum etiam, ex toto corde, quærunt, inquirunt, & excogitant, quomodo

modo DEO in aliquo placere possint? Quid DEO gratius? Quid nobis felicius? hæc namque facit nos conformes imagini Filij DEI, qui cum in monte Thabor oraret, facta est species vultus ejus altera, & vestitus ejus albus, & refulgens. Luc: 9. Sic etiam dum meditamur accuratè, immutamur interiùs, & fit animæ nostræ species altera, aliæ nempè cogitationes, alià verba, alij actus, alij mores, alia denique vita; ut homo prorsus alius esse videatur. Vide nunc, quantò desiderio, & conatu meditationi, vacare debeas, & velis?

CONSIDERATIO VIII.

De devota horarum recitatione.

R E G U L A.

*Psalmis, & Hymnis, cum oratis DEUM,
hoc versetur in corde, quod profertur
in voce. Cap: 2.*

Considera: 1. **P**ECULIARI DEI gratiâ, & voluntate, nos ad hoc munus vocatos esse: ut quemadmodum
alij

alij, alijs, & suis quisque munijs occupantur, unde etiam minus vacant ad serviendum DEO, ita nos singulari curâ, & devotione DEUM, in hymnis & canticis Spiritualibus laudemus, eumque nobis, & proximis propitium reddamus. Respice, si libet, universos homines, eorumque mores, & studia dispice; ecce, quam pauci DEUM debitè colunt, & orant, quàm verò multi, ipsum ignorant; heu! quot offendunt, & in honorant? pro his omnibus, constitutus est Religiosus, & Sacerdos, velut mediator, ut à Populo, iram DEI supplex avertat, & gratiæ reconciliet. Deinde reflectamus nos ad creaturas inanimatas, quæ cum sint sine anima, & voce, nostrum spiritum, animam, & linguam, quodammodo mutuunt; ut laudent Creatorem, quinimò, cum animæ reprobæ, se voluntariè gratiâ, & amore æternum privârint, & consequenter laude, in pænis blasphemantes Creatorem, & Redemptorem, nos, quibus laus DEI commissa est, tenemur supplere, & si in potestate nostra foret, facere ex inferno cælum, damnatos in Sanctos, & eorum

eorum blasphemias, in laudes, & amores Seraphicos convertere deberemus. Vide nunc, quantô zelô Divinum officium persolvere debeas, & velis?

Confidera: 2. Nos obire officium Angelorum, quorum in cælo perpetuum est exercitium, DEI laudes celebrare. *Nescis* inquit S. Chrys: hom: 24. in acta: *Quod cum Angelis stas, cum illis cantas, cum illis hymnos dicis? Chorus.* ait, Thom: Kemp: libr: 1. de claustr: discip: cap: 8. *& DEI & Sanctorum Angelorum locus sacratus, ubi divinum agitur officium; sicut Angeli in Cælo, sic Religiosi ordinati in Choro.* Opus Angelorum est DEUM semper laudare, opus Religiosorum est intenta mente psallere, & orare. Sic sta in Choro, & canta, quasi in mediò Angelorum stares. Recordare dilecti Domini tui JESU in præsepio jacentis, aut in Cruce pendentis, aut in Cælo ad dexteram Patris, tanquàm coram eo assisteres & cantares; Statue JESUM ad dexteram, & Mariam ad sinistram tuam, & Omnes Sanctos in circuitu eorum; omnes fratres tui, sint tibi, tanquam Angeli DEI, & cum quibus
nunc

nunc pfallis in terra, spera etiã, te cantaturum in cælis. Æmulare igitur, solertiam Angelorum junctam cum reverentia. In hoc namque ait, cognoscitur verus, & internus Religiosus, si in DEI laudibus fuerit ferventer intentus, si nil cogitare libet, aut agere, quàm ea, quæ DEO maximè placent, & cum Angelicis Spiritibus communionem habent. Qui verò à DEI laudibus torpescit, aut se absentat, non est amicus DEI, nec civis Cæli, quia Angeli semper in laudibus DEI sunt, & voce consona, Sanctus, Sanctus, Sanctus, in laudem Summæ Trinitatis cantant. *Angelorum opus est, & Sanctorum gaudium singulare*, ait idem lib: 3. cap: 8. *DEUM Creatorem suum incessabili mentis affectu laudare, benedicere, & glorificare*; hos imitantur, qui Divino Officiò libenter interfunt, & in Ecclesia DEI devotè orant, aut in Choro debitas horas cantant. Vide ergo, cum quanta reverentia, & devotione Choris Angelorum interesse, & cum his beatissimis Spiritibus, DEUM laudare velis?

*Considera: 3. Quanto spiritu, & fervore SS. Patres præsertim S. P. N. Augustinus Psalmos Davidicos cantaverint. Quas tibi DEO, loquitur S.P.N. libr: 9. Confess: cap: 4. Voces in psalmis dabam illis, & quomodo in te inflammabar! potissimum ubi legebat: Bonus Dominus. & Cap. 6 quantum flevi, inquit, in hymnis & canticis tuis, suavesonantis Ecclesie tuæ vocibus, commotus acriter, voces illæ influebant auribus meis, & eliquabatur veritas tua in cor meum, & ex ea aestuabat affectus pietatis, currebant lachrymæ, & bene mihi erat cum eis. Libr: verò 10. Cap: 33. Cum reminiscor, ait, lachrymis meis, quas fudi, ad cantus Ecclesie tuæ, in primordiis recuperatæ fidei meæ, & nunc ipse commoveor, non cantu, sed rebus, quæ cantantur (cum liquida voce, & convenientissima modulatione cantantur) magnam Instituti hujus utilitatem agnosco. Hi psalmi, sunt quidem nobis quotidie cum illis in ore, sed rarò in corde. Quid mirum? cum nobis tam parum curæ sit, psallere sapienter. Qui enim legit reconditos in Psalmis, alijsque horarum canonicarum partibus the-
sau-*

sauros, & intelligit: accenditur, velut à vivis carbonibus. Qui verò non intelligit, nequidem calefit. Industria contra hoc est lectio Commentariorum brevium in Psalmos, Bellarmini, Heferi, Wollffg, Speth S. J. &c. Vide, quid in hac parte facere, & quomodo S. Patrem imitari velis.

CONSIDERATIO IX.

De Orationis Studio.

R E G U L A.

In Oratorio nemo aliquid agat, nisi ad quod factum est, unde, & nomen accepit: ut si fortè aliqui, etiam præter horas, si eis vacat, orare voluerint, non eis sint impedimento, qui ibi aliquid agendum putaverint, Cap: 2.

Considera: 1. **S.** Legislatorem, & Patrem nostrum Augustinum velle, ut, non solum templum & Oratorium, debitâ cum gravitate, modestia, & observantiâ Religiosâ ingredia-

diamur, & nè, ullo alijs fimus impedi-
 mento, absque strepitu, in silentio fan-
 cto, quietè ibi nos habeamus: verum
 etiam, ita solliciti, de nostra perfectio-
 ne, & salute, toties, quoties, nobis va-
 cat DEUM in Augustissimo Sacramento
 præsentem, cum fiducia adeamus, & co-
 ram eo humiliter prostrati, hoc magnum
 negotium nostrum seriò pertractemus.
 Rex namque est, infinitè benignus, &
 miserationum Dominus, qui se hono-
 rantes exaltat, quærentes admittit, &
 bona postulantes, à se vacuos abire non
 finit. Hæc sanè mirabilis dignatio Sal-
 vatoris nostri, inquit: Jac: Alvar: quâ
 vult sub Eucharistiæ Sacramento in tem-
 plis nostris habitare, tanti ponderis fu-
 it, & etiamnum est, in multorum cor-
 dibus, ut tanquam fideles servi, cum
 per aliàs occupationes licet, ad Eccle-
 siam, ut ad conclave Domini sui, totâ
 devotione confugiant, ei genuflexi, aut
 stantes, aut, si, non aliter possunt, in hu-
 mili scabello sedentes, cum Angelis as-
 sistant, siquidem hic impletum cernunt,
 illud Dan: 7. *Millia millium ministra-*
bant ei, & decies millies centena millia
assiste.

assisteabant ei. Nos igitur, qui tantò beneficio præsentiaē DEI, & Domini nostri fruimur, eumque domûs nostræ habitatorem agnoscimus, in signum amoris, & debitæ gratitudinis, toties, quoties nobis vacat, & per obedientiam licet, ad eum accurramus, patent enim nobis hîc, in eius SS. Vulneribus thesauri opulentissimi. *Per hæc Sanctissima foramina:* inquit; S. Bern: Serm 61. in cant: *depluunt ad nos omnes gratia, omnes misericordia, & omnes consolationes cæli, vernant semper in divina præsentia & in DEI acceptione immensa, & infinita merita illorum vulnerum, non reperiet unquam nostra paupertas aliud remedium. quàm uti divitiis thesauri Christi. O SS. vulnera, per vos nobiscum, & in vobis sunt omnes meæ divitiæ, omnia meæ gratia, & gloriæ merita.* Adeamus ergo in omni rerum eventu cum fiducia ad thronum gratiæ ejus. *Christus enim, inquit Joan: Wyer: in Venerabili Sacramento pro quacunq; gratia ad superandam tentationem, ad proficiendum in virtute, ad perseverandum finaliter in gratia, elevat manus suas ad Patrem & plagas in medio earum.* Et sicut in di-

ebus carnis suæ preces supplicationesque cum clamore valido, & lachrymis offerens exauditus est pro sua reverentia. Hebr: 5. Ita nunc exhibens, Patri sua vulnera, semper exauditur. Vide nunc, quantâ fiducia, & desiderio, Christum in venerabili Sacramento visitare debeamus?

Considera: 2. Post JESUM Eucharisticum, magna devotione ferri debemus, in Beatam Virginem Matrem DEI, erga quam S.P.N. Augustinus, tantam fiduciam habuit, ut dicere ausus sit; *se præ pietate Mariæ perire non posse.* Est enim Mater misericordiæ, advocata, mediatrix, ac Domina nostra, Mater item nostra, quæ nos magis diligit, quàm omnes Matres simul sumptæ suos filios, & affectu materno quotidie plurima præstat beneficia, & maximam, singulorum curam gerit; nam ut S.P.N. Augustinus ait: *sicut omnibûs Sanctis est potior, ita pro nobis, omnibûs Sanctis est sollicitior.* Sancti quidem, multum valent apud DEUM, pro nobis intercedendo, sed unicus apud Patrem mediator est, eius Filius JESUS Christus, Dominus

noſter, & apud Filium mediatrix noſtra eſt Diva Virgô, Domina noſtra, quæ apud ipſum omni pollet authoritate; eſt-que illi gratiſſima, nec patitur repulſam. Ideo B. Arnold: Carnot: *Habet homo, inquit mediatorem cauſæ ſuæ filium ante Patrem, & ante filium Matrem, Chriſtus oſtendit Patri latus & vulnera, Maria Chriſto pectus, & ubera; nec poteſt ullô modô eſſe repulſa, ubi conſurgunt & orant, omni lingvâ diſertius, hæc clementiæ monumenta, & charitatis inſignia. Imo velocior, dicit S. Anſelmus, eſt nonnunquam ſalus invocato nomine virginis, quàm invocato nomine filij, non quod ipſa mater ſit potentior (non enim ille magnus, & potens eſt per eam, ſed illa per ipſum) verum, quia & ſi merita invocantis non merentur, ut exaudiatur, merita tamen Matris intercedunt, ut exaudiatur. Hinc S. Bernardus: O quiſquis, ait, te intelligis in hoc ſæculi profluvio, inter tempeſtates fluctuare, ſi non vis obrui procellis, respice ſtellam, voca Mariam. In periculis, in rebus dubijs MARIAM cogita, MARIAM invoca, non recedat ab ore, non recedat à corde; & ut impetres ejus Orationis*

suffragium, non deseras conversationis exemplum. Ipsam sequens non devias ipsam rogans non desperas, ipsam cogitans non erras, ipsa tenente non corruis, ipsa protegente non metuis, ipsa Duce non fatigaris, ipsâ propitiâ pervenis &c. Et S. Eutychianus. Quis unquam ô Beata fideliter omnipotentem tuam rogavit opem, & fuit derelictus? revera nullus unquam. Clementissima Mater, Virgo MARIA, erudiens Religiosam humilitatem, Sanctamque simplicitatem optimam esse, ad continuam ejus protectionem sibi conciliandâ, & subsidia, apparuit olim in visione, Ven: Mathiæ Canonico Regulari in Northorn, omnes Canonicos Ordinis nostri benignè affata: *Ego perpetua vestri Protec̃trix ero, quamdiu in primæva humilitate, vilitate, ac simplicitate permanseritis. Pro ut testatur Hieronimus Bosenhart, Canonicus & Decanus in Vetenhause in lib: cui titulus, Solitudo Sacra. Totis ergo medullis cordium, adhortatur S. Bernard: totis præcordiorum affectibus, & votis omnibûs, Mariâ, amemus, hanc veneremur, quia sic est voluntas eius, qui totum nos habere*

habere voluit per Mariam. Vide ergo nunc, quomodo Mariam venerari, & in SS. Virtutibus, eam imitari velis?

Considera: 3. Sanctos, esse potentes, & advocatos nostros, qui, licet optimè colantur per optimam vitam, optimè tamen nos facturos, si illos etiam, dum vacat, precibùs veneremur, & litanijs. Litanix B. V. Lauretanæ, ac omnium SS. inquit Joan: Nad: S. J. tanta cum animi supplicis applicatione, ac devotione, sunt recitandæ, quanto opere desideramus, ab illa, & ab illis, & per illam, ac illos, apud Deum, in quotidiana nostra egestate, prosperis, adversis corporis, & animi, ac in agone mortali potissimum adjuvari. Algazel Arabs (in magn: Kyrch) aiebat: *Qui sciverit catenam, connectentem Superiora inferioribus, hic mysterium maximum penetrabit.* Omnis Oratio est catena inferiora hæc superioribus connectens: at id maximè elucet in Litanijs, in quibus, catenæ velut carbunculus, aut adamas, Deus est. Inde Virgo Mater, Angeli, ac cælitèes reliqui, tanquam annuli aurei invicem connexi, catenam nectunt,

quâ cælites, ad nos detrahere, ad opem nobis ferendam connitimur: interea verò ipsi ad DEUM, cælitesque, per eam ascendimus, illisque connectimur. Quando ergo Litanias attentè recitamus: per Sanctos velut per annulos aureos, DEUM ad nos attrahere volumus: Et sic eum attrahere volendo, ad eum, per illos ascendimus. Et hoc est orare, corde ascendere. Multa sunt in Litanijs, quæ reddere possunt mentem seriò attentam, ut illa: *A morte perpetua, in die judicij: ut animas nostras ab æterna damnatione eripias. &c.* Si ea omnia, quæ ibi dicuntur, non lingua solâ, corde procul extra cælum vago, sed & animò ad rem attentò dixerimus, poterit etiam tempore Litaniarum exerceri, illa tantopere à Sanctis celebrata, mendicandi praxis, dum aliquid ab unoquoque stipis rogatur: ut à B. Virgine amor DEI; ab Angelis pura intentio, à SS. Patriarchis & Prophetis fides, & spes, à SS. Apostolis obedientia, & zelus animarum, à SS. Martyribus patientia, & mortificatio, à SS. Confessoribus humilitas, paupertas, pænitentia, &c. à SS.

SS. Virginibus Castitas &c. Vide igitur, quomodo Sanctos, qui nominatim à nobis invocati, ad preces nostras, surdi non sunt, cum omni possibili reverentia, honorare velis?

CONSIDERATIO X.

De abstinencia escæ, & potûs.

REGULA.

Carnem vestram domate ieiunijs, & abstinencia escæ, & potûs; quantum valetudo permittit. Cap: 3.

Considera: 1. **C**arnem nostram domandam esse, abstinentiâ escæ, & potûs, quantum valetudo permittit; quia nullus, palmam Spiritualis certaminis apprehendit, inquit Hugo de S. Viç: qui non in semetipso prius, per afflictam ventris concupiscentiam, carnis incentiva devicerit. Si enim non prius ea, quæ nobis vicina sunt, prosternimus, inaniter ad alia, quæ sunt impugnanda, transimus. Hinc
nemo

nemo sibi unquam polliceatur, solidam virtutem, quamdiu fuerit fædum gastimargiæ mancipium. Imo, inquit, *Družbicki* S.J. in suo lapide lydio Consider: 7. Religiosus, qui gulæ suæ impotentiùs servit & succumbit, adeo vilis est, ut indignus sit, cum quo diabolus colluctetur, & dedignatur dæmon certare cum guloso, sed eum, solius gulæ gladio debellari, superbus ille satis putat, quò, quid debet esse Religioso probrosius, & detestabiliùs? certè ignoro, quid possit esse contemptibiliùs eò, quem diabolus ipse iudicat indignum tentationibus suis. Ita ille. Ergo firmissimè teneas, cum carnis, & præsertim gulæ commodis, satietate, voluptate, appetitu, semper tibi colluctandum esse, cum magna humilitate, & diffidentia, de proprijs viribus, memor S.P.N. Lib: 10. Confess: c. 31. de se ipso; ita loquentis: *In his tentationibus constitutus, certo quotidie adversus concupiscentiam manducandi, & bibendi: quis enim est Dominus, qui non rapiatur aliquando, extra metas necessitatis? quisquis est, magnus est, magnificet nomen tuum. Ego autem non sum; quia*

quia homo peccator sum. Tu igitur certa, etiam bonum certamen, sicut bonus miles Christi JESU, domando carnem tuam, & omnem inordinatum bibendi, & comedendi appetitum. Est autem mensura seu abstinentiæ Regula, ipsa naturæ necessitas, quæ nobis ad conservandam vitam, & ad vitæ munia obeunda, alimentum ingestione succurrit, teste ipso S. P. N. lib: de morib: Eccl: cap: 21. ubi, ait: *Regula temperantiæ est, necessitas vitæ, & officiorum.* Ad gulam igitur pertinet, quidquid extra istam necessitatem accipitur. Vide nunc, quomodo carnem tuam domare velis?

Considera: 2. Illum, qui cum sana intentione placendi DEO, abstinentiam exercet, non solum mundari à vitijs, & passionibus, sed etiam obtinere gratiam, ad exercendas omnes virtutes. Quemadmodum enim terra, ait S. Joan: Clim: Cap: 40. quæ confita nimium, ac plus quam ei opus sit, aquæ recipit, non bonum fructum, sed spinas, & tribulos producit; quæ verò moderatam, ut decet, aquam imbibit, multum fructum affert; sic cor hominis, nimio cibo, potuque

tuque utentis, non bonum fructum virtutum, peccatorumque spinas ac tribulos profert, utentibus verò ijs moderate, temperanterque, prout virtus abſtinentiæ requirit, perpulchrum, uberemque Sanctorum operum, & verarum, ac perfectarum Virtutum fructum edit, Si ergo medicis, ut putridum, & corruptum humorem expurgent, à corporali ciborum voluptate abſtinere præſipientibus, obedimus ad ſalutem, viresque corporis recuperandas, multò magis nobis, ad conſequendam animæ ſalutem, & virtutum fructum, hanc diætā divinam, juxta præſcriptum S. Doctoris, & Patris noſtri adhibere, & hoc Spirituale remedium abſtinentiæ ſuſcipere debemus. Cùm certum ſit, quod immoderatus uſus cibi, & potûs animæ ſimul, & corpori noceat, animæ enim, inquit S. Chryſt: *eſt fons, & origo omnium vitiorum, intellectum hebetat, ut nihil cœleſte cogitet, voluntatem ad vitia & abiecta concupienda deprimit, & omnes mentis vires enervat, noxio ciborum onere prægravatas. Corpus etiam mille morbis, & doloribus angit, vitam abbreviat,*

&

& sæpe intempestiva, & subita morte præoccupat. facile igitur abstinebis, si hæc serio perpendas; simulque Christi Sanctissimam vitam, & illustria Sanctorum Exempla, ante oculos ponas: Ille enim per totam vitam, famem, & sitim passus, universis deliciis abstinuit. Isti verò abstinentiâ se domârunt, omnes sensuum voluptates repudiârunt, armati vacuitate ciborum, ad virtutis arcem pervenerunt. *Quotquot virtutum viros vivimus,* ait S. Cyprianus, *sine ieiunio non legimus ascendisse, nec aliquid magni moliti sunt, nisi prius abstinentiâ præcessisset.* Si ergo volumus, post illos currere, onera gulæ deponamus, & nunquàm à mensa, sine aliqua nostri victoria surgamus: & si parvulam hanc sed quotidianam, de modica quapiam cibi sapidioris particula abstinentiâ, tuique victoriâ, DEO offeras, tantò magis DEO sapiet, quantò magis, palato tuo saperet bolus ille, ille haustus, à quo abstines, ut amore DEI, te vincas. Diligamus igitur, inquit S. Ephrem: abstinentiâ, amoris sale conditam, ita enim ait Franc: Nad: S. J. Cor & &
 caro

caro nostra in DEUM exultabunt, quando cor DEI amore plenum persvadebit carni; ut se, nunc ieiunijs maceret, nunc abstinentiâ minus severa mortificet. Vide, quomodo hanc abstinentiam exercere velis.

*Considera: 3. Praxim pro mensa Religiosâ: Auditô signô, cogita: quod DEUS Pater, verè bonus, verè misericors, qui te (si Sacerdos es) quotidie cibare, & potare dignatur pretioso corpore, & sanguine delictissimi Filij sui, quasi agni immaculati: nunc etiam, te pascere velit cibo, & potu, materiali quidem corpus, Spirituali verò animam tuam; ut, ita, hanc Sanctam Regulam implere valeas, quæ præscribit: *Nec solæ vobis fauces sumant cibum, sed & aures, esuriant DEI Verbum.* 2. Puram præmitte intentionem, iuxta illud Apostoli, 1. Cor: 10. sive manducatis, sive bibitis, omnia in gloriam DEI facite: hoc, vel simili modo. *DEUS meus, qui me pascis à Juventute mea, iam cibum sumam, quem paterna tua providentia mihi destinavit, ut tibi placeam, quia hæc est voluntas tua: ut-*
que*

que viribûs refectûs ferventiûs tibi po-
 stea serviam: Offero itaque hunc cibum-
 & si cò sim planè indignus, iunctum il-
 li amorì, quo Dominus meus JESUS
 Christus, Corpus suum refecit, ad glori-
 am tuam, & salutem totius generis hu-
 mani. O Bone JESU, qui nôssi fragi-
 litatem meam, in concupiscentia gulæ
 reprimenda adjuva me, & perforce deside-
 rium meum. 3. absconde te intra SS.
 JESU vulnera, ruminando nunc unum,
 nunc alterum, ex prædictis, aut sequen-
 tibus incitamentis. v g. 1. In vulnere
 manus dexteræ, considera cæleste illud
 convivium, in quo Beati, maximè, qui
 eximæ abstinentiæ, temperantiæque lau-
 de florûere, vel cum singulari devoti-
 one, necessitati in corpore reficiendo,
 non voluptati, inserviêre, cum B. Vir-
 gine, & Angelicis Spiritibus, inebriantur
 ab ubertate Domûs DEI, & torrente
 voluptatis ejus potantur. 2do In vulne-
 re manûs sinistræ, cogita Lazarum in
 sinu Abrahæ, & divitem epulonem in
 inferno. Audi & time DEUM per
 Prophetam intonantē: Ecce, ait Isai: 65.
Servi mei comedent & vos esurietis: Ecce

servi mei bibent, & vos sitietis: Ecce servi mei letabuntur, & vos confundemini. Ecce servi mei lau abut præ exultatione cordis, & vos clamabitis præ dolore cordis, quia nimirum, bibent de vi. o iræ DEI Apoc: 14. Et famem patientur, ut canes. Psal: 58. non per unum diem, aut annum, sed er totam æternitatē. 3tio. In vulnere dextri pedis, considera, quam intolerabili fame, & siti purgatorij flammis excrucientur, ani næ Electorum DEI, à quibus te tam benignè præservat. & porro præservare paratus est DEUS quàm piè & frugaliter te sub horam mortis, & Judicij particularis, usum fuisse necessarijs vitæ conservandæ subsidjjs, utique tanquam medicamentis non delectamentis. 4to. In vulnere sinistri pedis cogita, quàm indignus sis ob tot peccata, ingrattudines tuas, pane filiorum DEI, qui toties secutus cupiditates tuas, te abiecisti ad filiquas porcorum. 2do. Quot pauperes & innocentes, DEO te gratiores, fame, & siti præmantur, quàm paternè è contra, tibi filio prodigo & ingrato, omnia necessaria mentis, & corporis subsidia, provide-

viderit DEUS. 5to. In vulnere Divini lateris, & Cordis JESU.

1mo. *Confidera*: quomodo JESUS infans, amore tui, dulcissimis uberibus, B.V. Matris suæ abstinuerit; totâ vitâ jejuna-verit, & in fame & siti te quæserit. 2do. Quam piè, modestè, decenter cum B.V. Matre, & S. Josepho, cum Apostolis, alijsque, in terris olim manducaverit, cum desiderio imitandi. 3tio. Fellis, & aceti, quò ipse in cruce potatus est, recordando; teque ut delicatulum humiliando & confundendo, quod, tam parùm ejus amore, hucusque appetitum mortificâris.

Henricus Suso ad triclinium abiturus flexis coram JESU Crucifixo genibus, illum invitabat, & ad singula fercula; *Amantissime JESU*, aiebat, *benedic obsecro hunc cibum*. Etiam in potu, idem servabat. Hæc verò ei erat consuetudo: ut in mensa, quinque haustus caperet, eosque ex Charissimi sui Domini, totidem vulneribus. Si quis cibus injucundus, ipsi oblatus fuisset, in cruentum cor dilecti sui, illum intingebat. Bolland 25. Jan.

In mensa, cogita Te esse, spectaculum DEO, Angelis, & hominibus, & sic comede, ut DEUM præsentem, & Angelos assistentes advertas, ut celeritate, & præcipitatione vescendi animus non distrahatur, nec Sacra lectione, aut alicuius piæ considerationis emolumentò frustretur, ut præsentem nihil in te immoderatum, aut abjectum videant, sed, ut considerantes tuam modestiam, & temperantiam, bonò exemplo ædificati, DEUM laudent, & glorificent.

Omnes cibos benedicendos, per Angelum tuum Custodem, offer Crucifixo JESU, & Mariæ, atque pretioso JESU Sanguine, & Mariæ dulcissimo lacte, misce cibum, & potum tuum, exemplò S.P.N. Augustini, qui inter ubera & vulnera medius, ita suspirabat. *Hinc pascor à vulnere, hinc lactor ab ubere, positus in medio, quò me vertam, nescio.* Ac si diceret, ingens mihi est fiducia, & amor in Jesum, quoties eius Crucem, & vulnera intueor: Sed parem amorem, erga Mariam sentio, si ejus ubera, quæ DEI Filium lactaverunt, mecum considero. Sub finem, uti, & sub initium
mensæ

mensæ, memor divinæ in te liberalitatis, animô sursum elevatô, refectionem ventris conclude, pijs suspirijs mentis. Auctori omnium bonorum DEO gratias agendo, defunctis requiem, vivis, maximè benefactoribus gratiam, ex animo precando, alacrius deinceps, DEO fervire statuendo. Vide, an & quomodo, hâc praxi uti velis?

CONSIDERATIO XI.

De Abstinencia, extra horam prandij.

R E G U L A.

Extra horam prandij, nemo aliquid alimenterum sumat, nisi dum egrotat.

Cap: 3.

Considera: 1. CUM Religiosus, homines sæculares ad sectandam JESU Christi vitam, exemplô suô magis, quàm verbô incitare, & trahere debeat, experienciâ verò doceat, nulla re adeò efficaciter illos moveri, quam si videant, quod quis carnem suam,

am, per veram abſtinentiam crucifixe-
 rit; hinc patet, quantò ſtudiò, Regulam
 S. Auguſtini profeſſus, conari debeat,
 ut non tantum cibò, & potu tempera-
 tè utatur, ſed etiam horas conſtitutas
 obſervet, & extra eas, nequaquam ſibi
 aliquid indulgeat, ne, cui, inquit Hugo,
 de vita noſtra præbeamus offendicu-
 lum, valde enim indecens eſt, ſi nos re-
 prehenſibiliter vivimus, qui formam re-
 ctè vivendi alijs demonſtrare debemus.
 Chriſtus Dominus noſter, poſt 40. illos
 dies, & noctes, quibus in deſerto jeju-
 navit, & famem, & ſitim ibidem paſſus
 eſt, benè potuiſſet lapides in panem
 convertere, ſicque vires ſuas reſtaura-
 re; attamen noluit, ſed exſpectavit: do-
 nec ipſi ex voluntate Patris ſui cæleſtis
 per Angelos cibis miniſtraretur, nos
 docens: cum ut plurimum nos cupidi-
 tas, aut homines ad cibos extra horas
 ſumendos incitare ſoleant, ne eorum
 deſiderijs, ſed voluntati Dei obediamus,
 amore JESU exſpectantes, donec hora
 & loco à Superioribus conſtitutis ne-
 ceſſaria nobis præbeantur. Licet autem
 peccatum non ſit, nec contra Regulam,
 potum

potum, qui inter alimenta reputari non solet, extra horam sumere, attamen potum extraordinariè frequentare, evidenter offendit Religionis temperantiam, & decorem, ait, S. Bonav: Ideo amator virtutis, potum nunquàm sine rationabili causa, & voluntate Superioris, & nè tunc quidem sine aliqua sui mortificatione admittit, ut inter illos sit, de quibus Salvator ait, Luc: 22. *Vos estis, qui perma sistis mecum in tentationibus, & ego dispono vobis, sicut disposuit mihi Pater meus Regnum, ut e a is, & bibatis super mensam meam in regno meo.* Vide, quomodo hanc Regulam observare velis?

Consilera: 2. Varietatem abstinentium. Plurimi sunt, qui parvo victu vitam sustentant, quia pauperes non habent, unde desideria sua expleant: alij parcissimè vivunt, quia avari, non audent pecunias expendere, alij extra consuetum tempus nihil alimentorum admittunt, ut sani vivant. Hi omnes quidem abstinent, sed sine merito. At verò servi DEI, & veri pauperes Christi abstinent, ut placeant DEO, & se JESU

SU Christo Crucifixo conforment, verasque divitias, nimirum virtutes acquirant, & conservent, siquidem experti nōrunt, neminem, qui ciborum copia delectatur, solida virtute præditum esse, ut jure ab antiquis Sapientibus dictum sit: *Vitiosos vivere, ut edant, studiosos verò edere, ut vivant.* Hoc est, ita vitiosos instituere vitam suam, quasi ad nihil aliud vivere velint, nisi ad edendum, & bibendum, & voluptatibûs fruendum, studiosos vero & virtute præditos cibis, & potibûs solum uti, quantum ad vitam, salutemque tuendam satis sit. Hinc de antiquis monachis Cals: lib: 4. de instit: Cap: 18. hæc ait: Antequam, vel postquam legitimam communemque refectiōnem percipiant, summa cautione servatur, ne extra mensam quicquam cibi penitus, ori suo quisquam indulgere præsumat, ut incedentibus, per hortos, & pomaria, cū passim, blandēque per arbores poma pendentia, non solum obijciant se pectoribus transeuntium. verū etiam strata per terrā conculcanda pedibus offerant, atq; ad colligendum parata facilè, ad consensum concupiscen-

piscentiæ allicere valeant intuentes, & opportunitate, vel copia, quamvis districtos, atque abstinentissimos ad sui desiderium provocare sacrilegum ducatur non modo, quicquam ex his degustare, verum etiam manu contingere. Malè itaque agunt, qui quoties se se offert occasio, aliquid edunt, in horto poma, cum illum adeunt animi laxandi gratiâ, & in cella dum morantur, quæ custodita habent, consumunt. Vide, quomodo hucusque hanc Regulam observaveris, aut saltem imposterum observare velis, maximè intra illas horas, quibus Christus Dominus in Cruce pro nobis pendens, extremam sitim passus?

Considera: 3. Quid mundani servi faciant, ut placeant Dominis suis, sitiunt sæpe, & vix audent minimum quid alimentorum sumere, ut, ad eorum nutum quam promptissimi & expeditissimi esse queant. Quid ergo Religioso facere convenit, qui se servum DEI profitetur, quotidieque pane Angelorum, ac carne, & sanguine Agni immaculati reficitur; certè hoc vitium gulæ est, quod teste. S. Bonaventura, reddit Religiosum apud Deum

Deum, & homines contemptibilem. Vide igitur, quàm imperfectè se gerant, qui, extra horam ventrem implent, & sic altiores mentis functiones impediunt? *atqui rogo Religiose, ait S. Bonaventura, quæ paupertas, si mox ut esuris, mox ut si is, volita pares.* Satias appetitum, nec eum usque ad statutam horam scis corpescere? amplectamur itaque hilari corde hanc sanctam dietam, quæ nos faciet in DEI servitio fideles, & ad exequendam ejus sanctissimam voluntatem fortes, & alacres, atque per omnia charos, ut nos hîc magnîs favoribûs detet, & tandem æternâ gloriâ præmiet. Manè ergo prævide occasiones, & fortiter decerne, quod hoc die, contra hanc Regulam omnino nihil admittere velis, etsi machinîs omnibûs dæmon, mundus, & caro conspirarent. Et quis est, qui etiam in gravissimis tentationibus, & occasionibus apertissimis, uno se saltim die continere non possit? atqui tota vita nostra dies unicus est, uti hodiernus, ita crastinus, ita tertius dies sunt, si hodierno te continere potuisti; quid ni cum eadem DEI gratia, & crastino

no? ut malè mihi sapere videantur, inquit non nemo, qui difficultates suas, & tentationes in mensibus, in annis numerant, & quia tam longam victoriam desperant; prius statim die turpiter succumbunt; vivant hodie, hodiè vincant, cras iterum si vixerint, victuri. Semper enim oportet in præsentì se abnegare, desideratis se spoliare, & in futurum maiorem sibi commoditatem promittere. Hoc namque perfectorum & imperfectorum discrimen est. ait, S. Gregorius, nam isti sæpe jejunare proponunt, sed cùm consuetâ gulâ vincuntur &c. cras enim quod semper promittitur, nunquam invenitur; sed Sancti Viri, ut hosti illudant, rigorem conversationis in præsentì virtute habent. Pro illusione infirmitatis carnis commodum in futuro promittunt, nunquàm fervidi inveniunt cras, in quo sibi condescendant, & consuetum rigorem vivendi remittant, sed finem temporis nempe æternitatem ad otia, & sibi indulgendum expectant. Vide igitur, quomodo in hac Regula custodienda fidelis esse velis?

CON-

CONSIDERATIO XII.

De Sacra Mensæ Lectione.

R E G U L A.

Cum acceditis ad mensam, donec inde surgatis, quod vobis secundum consuetudinem legitur, sine tumultu, & contentione audite. Cap: 3.

Considera: 1. S. P. Augustinum præscribere, jubereque, ut attentò, & quietò silentiò, ad mensam, sacram auscultemus lectionem, velut excellentem asceseos Magistram; ideo, mensam accedere oportet, cum fame, & siti spirituali, audiendi verbum DEI: Non enim, in solo pane vivit homo, sed & in omni verbo, quod procedit de ore Dei. Matth: 4. Unde S. Pater: Nec solæ vobis fauces, inquit, sumant cibum, sed & aures esuriant Dei Verbum. Et B. Humbertus Cap: 59. Nunquam cibus carnalis sit absque spirituali, hinc est, inquit. quod & tabulæ testamenti erant in arca cum manna. Si igitur per manna denotatur panis, quò spatiò 40. annorū, Israël

Jsraël in deserto vitam toleravit, in tabulis autem legis designatur doctrina, qua fideles suos gubernat, instruit, & sanctificat Deus: optimè concluditur, nobis Religiosis; ubi mensa sternitur, & panis sumitur, assiduo, indefessoque studio, percipienda esse cælestia dogmata, ut non solum corpus nutriatur mannâ, sed & cælesti disciplinâ erudiatur anima. Quapropter ad satiandam potius mentem, sacrae lectionis pabulô, quam cibis ventrem, accedenda est mensa: *Non enim est Regnum Dei esca, & potus, sed justitia & pax, & gaudium in Spiritu Sancto.* Rom: 14. & Hebr: 13. *Optimum ergo est ait, gratiâ stabilire cor, non escis, quæ non profuerunt ambulanti in eis.* Excitemus igitur, prius semper desiderium sumendi hunc cibum Spiritualem. Unde fiet, ut DEUS, sic esurientem animam mira dulcedine sit perfusus, hæc namque lectio, est Panis vitæ, & aqua saliens in vitam æternam, cum animus interea pijs affectibus in DEUM assurgit, atque adeo non ventre, sed mente plena, de mensa surgentes læti cum Regio Psalte cantamus: *Quam dulcia fau-*
cibus

cibus meis eloquia tua, super mel ori meo.
Vide nunc, quid facere decernas?

Confidera: 2. Ubertatem, & varietatem spiritualium fructuum, ex Sacra lectione, & Verbo Dei audito, *Primò* divinitus illustrat, & conservat oculum intellectus, ut securè in via Dei, ambulemus: *Siquidem lex Dei, lux Verbum ejus lucerna. Declaratio sermonum ejus illuminat, & intellectum dat parvulis. Et præceptum Domini lucidum illuminans oculos.* Expertum se hoc fatetur S.P.N. Augustinus Libr: 8. Confess: Cap: 12. post lecta verba Apostoli: *Non in commensationibus, & ebrietatibus &c.* statim, inquit, cum fine hujus sententiæ, quasi luce securitatis infusa cordi meo, omnes dubitationis tenebræ diffugerunt. Idem experti sunt, & experiuntur quotidie, alij plures. *2do.* Roborat, & consolatur nos in angustiis, & conscientiae scrupulis &c. *Quæcunque enim scripta sunt, ad nostram doctrinam scripta sunt, ut per patientiam, & consolationem scripturarum spem habeamus.* Rom: 15. 3. Præservat à peccatis & vitiis: *In corde meo abscondi eloquia tua, ut non peccem tibi*

bi. 4. Excitat nos ad virtutem, dum varias Dei exhortationes, & Sanctorum exempla proponit. 5. Accendit in nobis ignem divini amoris, accensumque inflammat, & auget: *Ignitam eloquium tuum vehementer. & servus tuus dilexit illud.* Quis enim non inardescat, si immensum Dei, erga nos amorem, & innumera beneficia Creationis, Conservationis, Redemptionis, vocationis, justificationis, & glorificationis, è Sacra lectione audiat &c. 6. Reddit nos in super indies aptiora instrumenta, quibus DEUS in proximorum salute promovenda uti dignetur, cum nos inflammat ad acrius studium earum virtutum, quibus præditi sint oportet, veri zelatores animarum, ut verè de nobis dici possit: *Vos estis lux mundi: sic luceat lux vestra coram hominibus, ut videant opera vestra bona, & glorificent Patrem vestrum, qui in cælis est.* Matth. 5. Vide ergo, quantò desiderio in Sacram lectionem ferri, eamque audire debeas?

Confidera: 3. Quare nullum sæpe fructum, ex Sacra lectione percipiamus. 1. est *Curiositas*, quâ duntaxat quærimus verbo-

verborum folia, & dicendi artificium, non attendentes dictorum succum, nervum, & substantiam, quæ nobis ad perfectum necessaria est. Sic rectè conferimur cum cribro, quod granula, floremque farinæ transmittit, solis retentis paleis. 2 Est contemptus librorum, qui nobis simplices, & vivo DEI Spiritu vacui videntur. Sed malè & temerariè, cùm eo ipso, quod hi à Superioribus nostris ordinentur pro lectione, DEUS velit, ut inde ipsum loquentem audiamus. *Imperator cæli, verba sunt Magni Gregorij: Dominus Angelorum, & hominum, pro vita tua tibi Epistolas suas transmisit, & tu illas ardentè legere (& audire) negligis? quid est enim Sacra Scriptura? nisi quedam Epistola Omnipotentis DEI ad suam creaturam? Quis non in eis DEI voluntatem, & jussa agnoscat? quis non exclamet cum Samuele: Loquere Domine quia audit servus tuus, & Thom: à Kempis Libr: 1. Cap: 5. Non te, inquit, offendat authoritas scribentis, utrum parvæ, vel magnæ literaturæ fuerit, sed amor puræ veritatis te trahat ad legendum. Non*
qua-

quæras quis hoc dixerit, sed quid dicatur, attende. 3. Est oblivio, & incuria, cùm tamen illi soli beati sunt, qui audiunt Verbum DEI, & custodiunt illud, mente scilicet & opere: Sic serva Verbum DEI, inquit S. Bernar: Serm: 5. de advent: quomodo melius servare potes cibum corporis tui, nam & ille panis vivus est, & cibus mentis. Panis terrenus, dum in arca est, potest à mure corrodì, potest à fure tolli, potest vetustate corrumpi, ubi verò comederis illum; quid horum timeas? hoc modo custodi Verbum DEI, beati, qui custodiunt, ergo trajiciatur in viscera animæ tuæ, transeat in affectiones tuas, & in mores tuos. Hæc ille. Vide quomodo te habeas, & habere velis?



CONSIDERATIO XIII.

De Modestia.

REGULA.

*In incesu, in statu, in habitu, in omnibus
motibus vestris, nihil fiat; quod cujus-
quam offendat aspectum, sed quod ve-
stram deceat sanctitatem. Cap: 3.*

*Considera. 1. H*anc Regulam nobis
præscribere, modesti-
am omnibus numeris absolutam. Im-
primis cum simus Filij, & Servi DEI
altissimi, stantes ubique in conspectu,
hujus tremendæ Majestatis, coram qua,
ipsi Spiritus Seraphici præ reverentia,
facie velata concinunt suum trisagium.
2. Quia sumus discipuli Christi, cujus
Divinam modestiam tenemur imitari,
quæ tanta fuit, ut Apostolus Corinthi-
os suos, hisce obtestaretur verbis: *Ipse ego
Paulus obsecro vos per mansuetudinem, &
modestiam Christi. 1. Cor: 1. 3. Quia
sumus Templum Spiritûs Sancti, juxta
illud 1. Cor: 6. An nescitis, quoniam
membra vestra templum sunt Spiritûs
San-*

Sancti, qui in vobis est. Hinc meritò in nobis, omnia debent esse decentissimè disposita, ut nihil sit, quod Divini hujus Spiritûs offendat oculos. Si enim servi Regis Salomonis, tantâ cum modestiâ steterunt, & omnia tali ordine fuerunt disposita, ut Regina Saba hæc videns, non haberet ultra Spiritum: quantâ modestiâ nos oportet esse præditos? qui sumus filij, & servi ipsius DEI, Regis immensæ potentæ, & Majestatis *sub quo etiam curvantur, qui portant orbem.* Job. cap: 9. Vide ergo, an & quomodo habitet in te modestiâ Christi in oculis, in lingua, in incessu, in statu, in habitu, in omnibus motibus tuis?

Considera: 2. Obligationē quam maximā habemus, ut sēper, ubiq; & in omnibus simus modesti; nimirum, quia exinde dependet major DEI gloria, & proximi nostri salus: *Sic luceat lux vestra coram hominibus; ut videant opera vestra bona, & glorificent Patrem vestrum, qui in celis est.* Matth: 5. Hinc clamat Apostolus ad Phil: 4. *Modestia vestra, nota sit omnibus hominibus.* Quæcunque

sunt vera, quaecunque pulica, quaecunque
 iusta, quaecunque sancta, quaecunque ama-
 bilia, quaecunque bonae famae, siqua vir-
 tus, siqua laus disciplinae, haec cogitate.
 2. quia nos etiam sumus sal terrae. Matt 5.
 Quod si sal infatuatum fuerit, si Reli-
 giosus vanitati, & levitati se dederit,
 in quo salietur? quem respectum habe-
 bit Populus? quale exemplum? ergo ad
 nihil valet ultra talis Religiosus, nisi ut
 conculcetur ab hominibus, & despiciat-
 ur. Ideo Apostolus Tets: 4. Rogamus
 vos, ait, ut abundantis magis, & operam
 detis, ut quieti sitis, & ut honestè ambule-
 tis, ad eos qui foris sunt, & 1. Thim: 4.
 Thimoteum suum instruens ait: Exem-
 plum esto fidelium, in verbis, in conversa-
 tione, in charitate, in fide, in castitate.
 Nam ut Trident: loquitur Sess: 22. Cap:
 1. Nihil est, quod alios magis ad pietatem,
 & Dei cultum assidue instruat, quam eo-
 rum vita, & exemplum, qui, se divino
 ministerio dedicârunt. Vide igitur, quo-
 modo modestiam colere debeas, & velis?

Considera: 3. Tanti momenti esse hanc
 modestiae virtutem, ut nullam omnino
 ministerij nostri partem exequi debite
 possi-

possimus, nisi omnes actus, gestus sermones &c. hac virtute regantur, ac veluti condiantur. Idcirco curam præcipuam habere debemus, ut illam nobis propriam faciamus; atque non solum peccata, & vitia, sed & defectus omnes, huic virtuti contrarios, seriò emendemus. Quod si quis interrogaverit, quanta, qualisve modestia nostra esse debeat? respondet Hugo noster de S. Viêt. *Christianus modestus moribusque compositus, eà ratione compareat oportet, ut erat Christus in terra, & Angelus in corpore assumpto.* S. Ignatius Loiola, has præscribit modestiæ leges: *Caput huc illuc, leviter non moveatur, sed cum gravitate, ubi opus erit: & si opus non sit, teneatur rectum, cum moderata inflexione in anteriorem partem, ad neutrum latus deflectendo: oculos demissos, ut plurimum teneant, nec immoderatè eos elevando, nec in hanc, aut illam partem circumflectendo: inter loquendum cum hominibus, præsertim alicujus authoritatis, non defigatur aspectus in eorum vultus, sed potiùs sub oculos. Rugæ in fronte, ac multo magis in naso evitentur, ut serenitas exterius cernatur, quæ*
inte-

interioris sit indicium; Labia nec nimis compressa, nec nimium diducta, tota facies hilaritatem potius præseferat, quam tristitiam, aut alium minus moderatum affectum. Vestes sint munda, & cum Religiosa decentia compositæ: manus, si non in sustinenda veste occupentur, decenter quietæ teneantur. Incessus sit moderatus sine notabili festinatione, nisi necessitas urgeat, in quo tamen quantum fieri potest, decoris ratio habeatur. Omnes denique gestus, ac motus, ejusmodi sint, qui apud omnes ædificationem pariant. Vide an has modestiæ leges observaveris, aut saltem observare velis?

CONSIDERATIO XIV.

De oculorum custodia.

R E G U L A.

Oculi vestri, etsi jaciuntur in aliquam fœminarum, figantur in nulla. Cap: 4.

*Confidera: 1. C*Um per oculos malè custoditos oriatur concupi-

eupiscentia, & per hanc peccatum, mors animæ; oportet nos, omnî diligentia illos custodire. Si enim domum claudimus, nè ingredi possit, qui nobis, aut domesticis nostris noceat, cur non magis claudamus oculorum portas, per quas concupiscentia, & cum hac malorum maximum, nempè peccatum ingreditur? in nullam igitur fæminarum de proposito conjiciamus oculos, nisi cadere velimus: si verò casu id contingat; caveamus illos figere in pulchritudine aliena. Non dicant, monet S. P. N. *bonô animô attendi.* Ecce de longe vidit David mulierem, in qua captus est, mulier longè, libido propè, alibi erat, quod videret in illa, unde caderet. Et S. Cypr: offert, inquit, dæmon oculis, format illices, & faces voluptatis, ut visu destruat castitatem. Hinc sapiens monet Eccl: 9. *Virginem nè conspicias, nè forte scandalizeris in decore illius; propter speciem mulieris multi perierunt, & ex hoc concupiscentiâ, quasi ignis exardescit.* Sanctus verò Chrysostomus lib: 6. Sacerd: cap: 8. *Animum inquit ferit, & commovet, non impudicæ tantum, sed pudicæ quoque mulie-*

mulieris oculus. Hinc S. P. N. Augustinus dicere ausus est. *Basilisci aspectum tolerabiliorem esse, cantu & aspectu feminae, eo, quod ille suo aspectu corpus, hæc verò animam occidit.* Considera igitur, quomodo hætenus, oculos tuos custodieris, aut saltem in posterum custodire velis?

Considera: 2. Nè oculos nostros malè figamus in fæmina, optimum remedium suggerit S. P. N. Augustinus, jugem nimirum Dei memoriam, & præsentiam, dum ait: *sed etsi lateat, ne à nemine hominum videatur; quid faciet de illo desuper inspectore, quem latere nihil potest? an ideo putandus est non videre, quia tantò videt patientius, quantò sapientius? Illi ergo Vir Sanctus timeat displicere, nè velit fæminæ placere, illum cogitet omnia videre, nè velit fæminam malè videre.* Fidelis itaque servus DEI fugit aspectum, & conversationem periculosam, & solam secundum dilectum discipulum 1. Joan: cap: 1. ac dulcem illam amat conversationem, cum SS. Trinitate. in qua animæ nostræ essentia, sanctificatur divinitatis præsentia, memoria

moriâ præsentia Patris, intellectus præsentia Filij, voluntas præsentia Spiritus Sancti, unde anima tota est in DEO, & DEUS totus in anima, illam gratiâ suâ præservando, & defendendo ab omni malo peccati. Quantum ergo divinam æstimas gratiam, tantundem oportet te appetiari divinam præsentiam, quia nè quis peccet, & gratiâ DEI excidat, in omni loco, tempore, & actione memoria divinæ præsentia necessaria est. Unde S. Ignatius Martyr Heroni, hoc dedit consilium: *Memento Dei, & non peccabis*; quare associa te semper Deo, & cum Patre Filio & Spiritu Sancto, sit conversatio tua. Recordando documenti illius S. P. N. Augustini in Psal: *Qui non dat locum, ait, Divinae inspirationi, dabit locum diabolicæ suggestioni, anima enim nequit esse sola, & sine ullius comitatu, si non admittit præsentiam Dei, demonis admittit præsentiam, & consortium.* Hinc optimè dixit Diocles instruendo Palladium, ut habetur in VV. PP. *Cum discedit anima à Dei præsentia, statim vel diabolus, vel bestia efficitur: subito enim prolabitur in affectum aliquem*

quem inordinatum superbiæ, aut sensualitatis. Vide nunc, an & quomodo hoc medio usus sis? aut certè, uti velis?

*Considera: 3. Ut oculos claudamus pulchritudini alienæ, moveat nos. 1. Voluntas JESU Crucifixi, & B. Mariæ V. Oculi mei, aiebat olim Christus ad S. Birgittam libr: 1. Revel: cap: 11. (& nunc etiam ad nos) erant sanguinolenti, & pleni lachrymis, ideo Oculi tui debent abstinere ab omni delectabili visu. Et B. V. hæc tria monita dedit F. Alphonso Rodriq: Soc: JESU. Quando incedis per viam, aiebat, non attollas magis oculos, quam sit necesse ad videndum, ubi pedes figas, ad neutrum latus convertas oculos, nec caput attollas, sicut hodie fecisti, quando vidisti mulierem. 2. Cum B. Job cap: 31. Pangamus nunc fœdus cum oculis nostris, ut mereamur aliquando aspicere pulchritudinem cæli. Qui claudit oculos suos, ait Isai. 33. ne videant malum, iste in excelsis habitabit, Regem in decore suo, videbunt oculi ejus. Speciosum præ filiis hominum; Pulcherriam inter Filias Reginam cæli, Virginem Matrem, Sanctos, & Sanctas DEI,
mirè*

mirè super solem fulgentes. O! *Felix
jucunditas! & jucunda felicitas*, excla-
mat hac pulchritudine inflammatus S.
P. N. Augustinus: *Sanctos videre, cum
Sanctis esse, & esse Sanctum: DEUM vi-
dere, & DEUM habere in æternum.* Et
ultra sic facile claudemus oculos no-
stros, cum S. Silvano, ita oculos suos al-
loquente; *Claudamini oculi mei claudami-
ni, & ad futura vos gaudia reservate.*
Qui autem non novit, aut non satis
æstimat delicias cæli, non est mirum, si
delectetur mundi vanitatibûs. Vulgò
dicitur, ait S. Bern: Serm: 5. de OO.
SS. *Quod non videt oculus, cor non dolet.*
*Oculus meus, memoria mea, cogitare de
Sanctis, quodammodo eos videre est.* Sic
nempè, portio nostra in terra viventiu-
um, nec modica sanè portio, si tamen,
ut decet, memoriam affectio comitetur;
sic inquam, conversatio nostra in cælis
est, verum tamen non sic nostra, sicut
illorum; ipsorum enim substantia ibi est,
nostra autem desideria. Ipsi per præ-
sentiam, nos per memoriam. Vide an
& quomodo, hæc hucusque te move-
rint, aut saltem, te impofterum movere
debeant?

CON-

CONSIDERATIO XV.

De Medijs Conservandæ Castitatis.

R E G U L A.

Ubicunque, ubi feminae sunt, invicem vestram pudicitiam custodite; DEUS enim, qui habitat in vobis, etiam isto modo custodiet vos ex vobis. Cap: 4.

Considera: 1. **F**ortissimum medium servandæ castitatis esse, ex una parte bene ponderare mala, quæ hæc fædissima voluptas infert, tam corpori, quam animæ. Luxuria animam polluit, & corpus, ac membra humani corporis, membra Christi, & templa Spiritûs Sancti profanat, & in lupanar convertit turpitudinis, putidissimas corpori ægritudines infert, animæ salutem ejicit, sensus infatuat, & famam denigrat, ejus initia blanda quidem sunt, & quasi melle illita, sed novissima amara, quasi absinthium, & acuta, quasi gladius biceps, media autem, tot periculis, tot molestijs, tot inquietudinibus plena; ut impudicus etiam in hac vita, pro brevissima

ma

ma voluptate, dolorem centuplicatum recipiat. *O ignis infernalis luxuria*, exclamat S. Hieron: *cujus materia gula, cujus flamma superbia, cujus scintilla, prava colloquia, cujus fumus infamia, cujus cinis immunditia, cujus finis gehenna.* Quis hæc considerans non toto corpore perhorrescat? Contra amabimus castitatem, si ex altera parte, hujus Angelicæ virtutis prærogativas, & præmia, probè intelligamus. Hæc, juxta SS. PP. sententiam, hominem Angelis similem, imò aliquomodo nobiliorem facit: *differtur quidem inter se homo pudicus, & Angelus, sed felicitate non virtute.* ait, S. Bernardus. Sed & si illius castitas, sit felicior, hujus tamen fortior esse concluditur. Et S. Cyprianus: Virginitas, inquit, æquat se Angelis, si verò exquiramus, etiam excedit, dum in carne luctata, victoriam etiam contra naturam refert, quam non habent Angeli. Sanctus verò Athanasius exclamat: *O Virginitas corona, quæ nunquam marcescit, Templum DEI, Sacrarium Spiritus Sancti, gemma pretiosissima, à paucis inventa, à multis odio habita, à solis dignis opta-*

optata. O divina Castitas, beatus, qui te obtinet, & constanter retinet, modicum enim laborabit, & plurimum in te, ipse gaudebit. Amanda igitur est pulchritudo castitatis, inquit S. Jsid: libr: 2. de sum: bon: Cap: 40. cujus degustata delectatio, dulcior invenitur, quàm carnis. Castitas enim fructus svavitatis est, & pulchritudo inviolata Sanctorum; castitas servitus mentis est, & sanitas corporis. Ora igitur cum S. P. N. Augustino libr: 10. Confess: Continentiam jubes Domine, da quod jubes. & jube quod vis. O Castitas! quæ carnem castigas, & in servitutem redigis, & animæ alas ad cælestia adjungis, condecora me!

Considera: 2. Efficacissimum servandæ castitatis medium esse, fugam mulierum. Hinc S. Chrysost: Job, inquit: Diabolum videns accedentem, non fugit sed mansit, sicut leo, viribus filens: Virginem autem videns, non stetit, neque moratus est, in contuenda pulchritudine; sed statim secessit, censebat nimirum, in prælio contra dæmones, virili & audaci animo opus esse; In continentie autem prælio, victoriam concedi, non ex Virginum consuetudine, sed

sed secessu. Quamdiū enim quis, scandalī occasionem non removet, impossibile est, à corde perturbationes pravarum cogitationum, & incendium improbarum concupiscentiarum recedere. Et sine omni dubitatione, qui familiaritatem mulierum, non vult fugere, cito labitur in ruinam, ait, S. P. N. de honest mul: *Nam imprimis admittuntur confabulationes, quibus imprudens homo, præsentis fæminæ pulchritudine, pascit oculos: mollissimâ ejus voce, aures oblectat, & jam, quasi oculis, & auribus fornicatur, siquidem ea oculi impudici, & avidi, jam attingunt, inquit S. Gregorius Naz: quæ nefas est attingere. Quam res periculo plena sit fæmina audi S. P. N. quid fæmina sit,, ait, fratres agnoscite: muscipula est animæ, latrocinium vitæ, suavis mors, blanda percussio, malum libens, sapida jugulatio, omnium calamitatum radix, & Libr: de sing: Cler: de carbonibus, inquit, scintillæ diffiliunt, de ferro rubigo nutritur, morbos aspidēs sibilant, & mulier fundit concupiscentiæ pestilentiam. Quis ergo, præsentiam, & conversationem fæminarum,*

non

non fugiat? in necessaria autem conversatione cum mulieribus, optimum medium est: timor DEI præsentis, & omnia cernentis: petitio Divinæ gratiæ, & generosa repulsio primæ cogitationis, cum contemptu, & averfione mentis ab objecto repræsentato, & conversio amorosa ad DEUM, in corde nostro habitantem; ad Christum crucifixum, ad Immaculatam Virginem; ad Angelos nostros Custodes, & demum, abscissio omnis moræ, non necessariæ, non enim prodest salvare alios, si nos ipsi perdamus. Vide an, & quomodo tu, hæc media adhibueris, aut saltem adhibere velis?

Confidera: 3. Singulare remedium, castitatis, esse mortificationem: quemadmodum enim, equus frænandus, & constringendus lorîs, insuper flagellîs còerendus est, ne sefforem suum præcipitet, aut deijciat, ita quoque caro, ex perversa suâ natura petulans; & lasciva, omnî studiô, mortificanda est. Unde S.P. Lib: de Salut: doctrin: 4 ait: caro data est nobis, quasi animæ bellum, quæ si mortificetur, adducit ad vitam, si nutritia-

triat, præparat se, contra animam, ad mortem. Ideo ait Apostolus 1. Cor: 9. Sic pugno, non quasi aërem verberans, sed castigo corpus meum, & in servitutem redigo, subigo, contundo, loquitur S. Gregorius; velut equum scilicet petulantem, jejunijs, flagello, ciliciò, frigore, labore; castitas enim, sine suis comitibus, jejuniò videlicet, & temperantia, citò deficit; quod si his, quasi adminiculis, roborata fuerit, perfacile coronabitur, inquit S. Chrysost: Hom: 1. in Psal: 50. & S. Carolus Borom: ad quendam Cardinalem scribere non dubitavit: Sine penitentia, & asperitate vitæ, impossibile esse, servare castitatem, utpote, quam tantopere caro, dæmon, & mundus, impugnant, vide an deceat, & sub capite spinis coronato esse membrum delicatum, & voluptatum rosis coronatum? natant oculi ipsius sanguine, & lachrymis, & tu non vereris tuos oblectare vanitatibus! aures ipsius replentur blasphemijs, & opprobrijs, cum tua interea, ex blando mulieris sermone, venenatas delectationes haurire non timent. Corpus ipsius totum laceratur spinis, flagellis, & clavis, & tu, audes corpori tuo blan-

*diri. Vide num hoc sit castitatem tue-
ri, & suspira cum S. P. N. Med: cap: 1.
Rex meus, extingue in me desideria car-
nis, et accende ignem tui amoris.*

CONSIDERATIO XVI.

De Correctione Fraternali.

R E G U L A.

*Si, Oculi petulantiam, in aliquo Vestrum
adverteritis, statim admonete, nè cepta
progreliatur, sed de proximo
corrigatur. Cap: 5.*

Confidera: 1 **F**ratrem, de suo errore,
admonendum esse; quia,
hic est actus misericordiæ, & fraternæ
charitatis, quâ quis subvenit necessitati
spirituali proximi, adeoque magni mo-
menti, cum laboratur pro anima, pro
qua Christus Dominus noster, usque ad
mortem laboravit. Caveamus igitur
nè omitamus corrigere fratrem, & ad
meliorem frugem reducere, si quem ve-
rum defectum in eo advertamus. Un-
de S. P. N. *Magis quippe, inquit innocen-
tes,*

*tes, non estis, si fratres vestros, quos indicando (vel admonendo) corrigere potestis, tacendo perire permittitis. Et hoc ipso, quò tenemur amare DEUM, & proximum, tenemur etiam, quantum possumus injuriam DEI, & malum proximi impedire; hinc sequitur, nos teneri utrumque avertere. Deinde, quivis homo est imago DEI, & quidem post Angelos, alijs rebus conditis præstantior, & infinitò pretiò Sangvinis JESU Christi redempta; si ergo videntes, imaginem ligneam Christi in luto, aut periculo incendij, iacentem, mox accurramus, & eripere conemur, an, non Dei imaginem, tam pretiosam, in luto peccati, & periculo æterni incendij constitutam aspicientes, non succurramus, & liberare à tali periculo studeamus? nè omit-
tamus itaque lucrari fratrem nostrum, cum nihil, huic lucro comparandum sit. Nullius quippè rei pretium inquit S. Chrys: hom: 3. in Ep: 1. ad Cor: est animæ conferendum, ne totus quidem mundus, quamobrem etiam si divitias innumerabiles dederis pauperibus, nihil tale efficies, quale is, qui convertit ani-*

mam. Et *ad hoc*, inquit Hugo de S. Viç: *In unum habitamus, ut nos invicem custodiamus, invicem corrigamus, invicem erudimus.* Vide ergo, quomodo, hanc Regulam observare velis?

Considera: 2. Modum corrigendi fratrem, nè ut ait, S. Chrysoft: dum rapturam sarcire volumus, majorem diruptionem faciamus, collapsaque cupientes erigere, casum graviorem inferamus. Correctiò itaque, si opus sit, fiat sine iracundiâ, qui enim cum iracundia, errantem corrigit, impedit, nè errorem suum agnoscat, & emendet, sed correctionem ex odio potiùs, quam ex charitate provenire correctus interpretatur, corrigens verò cum iracundia, ostendit se, non invehi in vitium, sed in hominem, cum tamen dicat S. Pater, quod debeat fieri cum dilectione hominum, & odio vitiorum. Quare idem S.P.N. in Epist: ad Gal: cap: 6. Pulchrum dat documentum correctori, ut priùs, quàm aliquem corrigit, se examinet, an amore ad correctionem moveatur, quidquid enim, laceratô animô dixeris, inquit, punientis est impetus, non charitas

tas corrigentis; dilige, & dic, quod voles, hinc admonet Apostolus ad Gal: 6. *Si præoccupatus fuerit homo in aliquo delicto; vos qui spirituales estis, hujusmodi instruite, in spiritu lenitatis.* In quem locum S. Chrysost: non dixit, inquit, in mansuetudine sed in spiritu mansuetudinis; nam, qui divino spiritu perfunduntur, acerbos ac rigidos esse, nequaquam decet. Ipse namque Spiritus, amor est; & amantes animos occupat, quis igitur acerbitati, in eo potest esse locus, quem tanta vis amoris possit ei? Caveant igitur, interpretatur hanc Regulam Hugo Victorinus, ut neminem, cum ira, & indignatione, sed potius cum dulcedine, & charitate, redarguant. Sic corripuit Josue reum mortis Acham deprehensum? *Fili mi, ait, cap: 7. da gloriam, Dño Deo Israhel, & confitere, atque indica mihi, quid feceris.* Et Loth ad Concives suos: *nolite, inquit Gen: 19. Fratres mei, nolite malum hoc facere.* Sic Nathan quoque Davidem, propositâ parabolâ, correxit artificiosè. 2. Reg: 12. Vide, quomodo tu, te habeas, in correctione fraterna?

Considera: 3. Quod æquo, & grato animo, accipiamus correctionem, quam DEUS, ad sanitatem animæ nostræ, ordinare consuevit. Si enim, ait S. Basilus: Chirurgos diligis, corporis vulnera curantes, etiam si crucient, doloremque inferant, eisque mercedem pro labore, & animi gratitudinem reddis; quanto magis diligendus est is, gratiæque illi agendæ, qui animæ vulneribus medetur. Et si vestem habeas dissutam inquit S. Chrysost: aut sordidam, aut faciem maculatam, magnum tibi præstat beneficium, qui hujus rei te monet, gratiasque propterea, illi agis, quanto igitur, rationi erit consentaneum, gratias ei agere, qui te, de animæ maculis monet, ut eas abstergas; Hinc olim in Claravallensi Monasterio, pius hic mos viguit, ut si quis, ab altero de aliquo defectu moneretur, vel reprehenderetur, illico reprehensus, in gratiarum actionem, pro reprehendente, recitaret Orationē dominicam. Laudandus, etiam hic venit S. P. N. Augustinus, qui Epist: 19. ad S. Hieron: de se ipso scribit: Identidem rogo, ut me fidenter corrigas, ubi mihi opus esse perspexeris, quam-

quamquam enim, secundum honorum vocabula, quæ jam Ecclesiæ usus obtinuit, Episcopus Presbytero major sit; tamen multis in rebus, Augustinus Hieronimo, minor est. Et Libr: de correct: & Grat: Cap: 5. Qui corripì non vis, inquit, etiam, propterea corripìendus es, quia corripì non vis, non vis enim tua vitia tibi demonstrari, non vis, ut feriantur, fiatque tibi utilis dolor, quo medicum quæras, non vis tibi, tu ipse ostendi. ut cum deformem te vides, reformatorem desideres, eique supplices, ne in illa remaneas fæditate. Accipe igitur, monet S. Bernard: Correctiōnem, tanquam donum è cælo delapsū, & ita gratum te exhibebis ei, per cujus manum accipis. Vide quomodo, te habere velis?



CONSIDERATIO XVII.

De Triplici Cordis habitu.

R E G U L A.

Probate, quantum vobis desit, in illo interiori habitu cordis. Cap: 6.

Considera: 1. SI DEUM in corde nostro habere, illiusq; Sanctissimis oculis placere velimus, cor nostrum debere esse vestitum sanctitate, quæ ex mente D. Dion: Arcop: Est ab omni scelere libera, & omnino perfecta, & omni ex parte, immaculata puritas. Hanc DEUS à nobis requirit, dum ait, Levit: cap: 11. Ego sum Dñus DEUS vestester, Sancti ergo estote, quia ego Sanctius sum, ne polluatis animas vestras. Quod fiet primum, si serium, & efficax, & in omne tempus perpetuum contra omnes quoscunque ingruentes casus, inconcussum pro omni occasione, inviolabile, & constans, animi decretum habeamus; millies potiùs mori, quàm lethali nos scelere, unquam obstringere. Quo circa, ut ut res cadat, paratos nos esse oportet.

oportet, si haberemus totius mundi possessionem, omnium potius eorum bonorum, commoditatum, favorum humanorum, atque ipsius etiam vitæ nostræ, quàm gratiæ Divinæ, & DEI ipsius, summi nostri boni, per delictum mortale jacturam facere. Deinde, ut eodem animi decreto etiam peccata venialia fugiamus, siquidem quodvis veniale peccatum, etiam minimum, pejus est morte, & jacturâ rerum temporalium omnium. *Longè melius est, inquit S. Doroth: Serm: 20. & Corpus suum & omnia corporea perire simul, quam lædi animam suam, in re etiam minima.* Imo tanta fæditate repletur anima, unico peccato veniali, & tantum illud, licet minimum, displicet Dei purissimis oculis; ut si unicâ cogitatione, vel verbo otiosô, redimere possemus omnes ex inferno damnatos, non tamen id facere deberemus. Cùm ex mente Apostoli, nunquàm sint facienda mala, ut inde eveniant bona, nec debeat DEUS, infinita illa Majestas, & Bonitas, ullius, etiam maximi boni intuitu, vel levissimè offendi: Unde S. Hieron: scribit: *Sane nescio*

nescio, an possumus leve aliquod peccatum dicere, quod in Dei contemptum admittitur. Eitquè ille prudentissimus, qui non tam considerat, quid iussum sit, quam illum, qui iusserit, nec quantitatem imperij, sed imperantis cogitat dignitatem. Vide nunc, an hac veste cor tuum vestitum sit.

Considera: 2. Cor nostrum vestiendum esse simplicitate, ut quis sit cum S. Job Vir simplex, & rectus, soli Deo in omnibus placens. Quod obtinebimus, si dignam concipiamus æstimationem de cordis, & intentionis simplicitate, certòque nobis persvadeamus, non posse majus, pro nostris operibus præmium, aut excogitari, aut appeti, quam bene placitum Divinum: *Si omnino dignus fueris, agere aliquid, inquit præclare S. Chrysoft: Libr: 2. de compunct. Cord: quod Deo placuerit, aliam ne requirere mercedem, præter hoc ipsum, quod placere meruisti; si enim aliam requiris mercedem, verè ignoras, quantum bonum sit placere Deo: si enim scires, nunquam aliquid extrinsecum mercedis, aut muneris expeteres.* Hinc Angelicus Thomas
 lauda-

laudatus à Deo, quod benè de se scripserit, ideoque quam mercedem peteret, rogatus *non aliam, nisi te Dñe*, respondit: Merito igitur S. Chrysoſt Hom: 21. in Matth: illum in se ipsum crudelem Tyrannum eſſe dixit; qui poteſt aliò contentus eſſe præmiò, quàm DEO. Hinc, qui ſimplex eſt corde, omnia ſua opera, quantum fieri poteſt, maximè, ſi præclara ſint, & inſignes ſui ipſius victorias contineant, libenter in occulto facit, ut aſſveſcat humanam laudem, & æſtimationem, non appetere, ſed ſolo Dei beneplacito, contentus eſſe, quod ſi verò, opus occultari non poteſt, aut debet. ſequitur conſilium M. Gregorij, qui ait: *Sic ſit opus in publico, quatenus intentio maneat in occulto, ut & de bono opere proximis præbeamus exemplum, & tamen per intentionem, quâ ſoli Deo placere quærimus, ſemper optemus ſecretum.* Vide, an tali habitu cor tuum veſtitum ſit ?

Conſidera: 3 Cor veſtitum humilitate, Deo eſſe gratiſſimum: Nihil tam gratum Deo, ait S. Ludov: Epis: Tol: quam ſi vitæ meritò magni, humilitate ſimus infimi,

fini, cum tantò quis Deo sit gratior, &
 pretiosior, quantò propter eum, sibi est vi-
 lior. Unde S. Ambro: ait: Si glorian-
 dum est Christianò, de humilitate glorian-
 dum est, qua crescitur apud Deum. Hinc
 S. P. N. Augustinus *Altus est DEUS,*
humiliat te, & descendit ad te, erigit te,
& fugit à te, quare? quoniam inquit ex-
celsus est, & humilia de proximo respicit,
ut attollat, ut bonis repleat; alta, id est,
superba de longè cognoscit, ut deprimat. Et
 in vitis PP. dicitur: *Omnis labor mona-*
chi, sine humilitate vacuus est, humilitas
enim est præcursor Charitatis, sicut Joa-
nes Christi, omnes trahens ad eum, ita
humilitas trahit ad Charitatem, id est, ad
ipsum Deum, quia Deus charitas est. Ideo
 monet Thom: Kemp: *Non sit tibi cura,*
de magni nominis umbra, non de multo-
rum familiaritate, nec de privata homi-
num dilectione; ista enim generant distra-
ctiones, & magnas in corde obscuritates.
Esto providus, & vigila, in orationibus,
& humilia te, in omnibus. Libr: 3. Cap:
 24. quia nihil habemus, unde superbia-
 mus. DEUS est, qui corpus & animam
 nostram conservat, qui gratijs suis ju-
 vat,

vat, & excitat, qui omnipotenti influ-
xu assistit; ut benè operemur; adeoque
minima omnino portio in opere bono,
nostra est, unicus videlicet assensus, quem
gratiæ Divinæ præbemus. Jam verò,
opera nostra, etiam bona, quot imper-
fectionibus scatent? quàm scientia no-
stra est modica, & multis ignorantij
admixta, scimus aliquid, sed multo plu-
ra sunt, quæ nescimus. Ideo hortatur
nos Apostolus: Induimini Dominum JE-
SUM Christum; quò induti, erimus ve-
stiti humilitate, ut pote, qui ipsa hu-
militas est, unde dixit: *Discite à me, quia*
mitis sum, & humilis corde.

CONSIDERATIO XVIII.

De Charitate DEI.

R E G U L A.

*In omnibus, quibus utitur transitura ne-
cessitas, superemineat, quæ permanet
Charitas. Cap: 6.*

Considera: 1. **Q**UOD Charitas DEI, in
omnibus, semper super
emine-

eminere debeat, quia virtutum præstantissima est: quomodo enim cleum, inquit S. Pater Serm: 42. de temp: Omnibus humoribus, superius esse cognoscimus, ita Charitas omnibus virtutibus, sublimior comprobatur, quæ etiam cum Beatis in cæto manebit, per omnem æternitatem. Unde Apostolus: nunc inquit Cor: 13. manet fides, spes, charitas, quia in cælo cessabit fides, cum DEUS videbitur facie, ad faciem, cessabit spes, cum, quod sperabatur, jam obtinetur: cessabunt, & alij virtutum habitus, sola charitas cum Beatis manet; quia per eam, utpote virtutum perfectissimam diligunt DEUM. Ideo adhortatur Apost: Colofs: 3. Super omnia charitatem habete; quod est, vinculum perfectionis, quâ scilicet cum Deo fortissimè connectimur, ut nullâ vi, aut otentiâ, ab eo, separari valeamus, quis enim nos separabit, à Charitate Christi &c. Rom: 8. scimus, quoniam diligentibus DEUM, omnia cooperantur in bonum, etiam, quæ molesta eis sunt, tribulationes, dolores, & mors ipsa. Quid enim est omnia? ait S. P. N. Lib: de Grat: & Lib: arb:, nisi & ipsæ terribiles, sævæ-
que

que passionēs? Sanctus autem Bern: ib: de Amor: Dei. *Vultis, inquit, à me au-
re, quare, & quomodo, est diligendus DE-
US? & ego dico, quod causā diligendi De-
um. DEUS est. Modus diligendi, sine
modo diligere. Ob duplicem causam dico,
DEUM propter se diligendum, vel quia
nihil justius, vel quia nihil fructuosius,
diligi potest, siquidem amabimur, & in-
habitabimur à Deo, ut Christus Joan 14.
promisit, dum dixit: Pater meus diligit
eum, & ad eum veniemus & mansionem
apud eum faciemus, ex qua Deitatis com-
municatione, sequitur, animæ nostræ,
summa cum Deo unio, elevatio, & qua-
si Deificatio, ita, ut, homo fiat Dei fili-
us, & hæres Regni cælestis, omniaque
ejus opera eleventur ad summam di-
gnitatem: ita, ut sint opera Filij Dei,
& cælo digna. Quare sicut genuinæ
aquilæ, proles ad solis intuitum exa-
minantur, ita Filij Dei adoptivi, in hoc
probantur, si per affectum Charitatis,
DEUM, irretortis oculis intuentur.
Quod si creaturam aliquam plus dili-
gunt, quàm DEUM, adulterinæ proles
sunt, & proinde abijciendæ, è nido per-
fectio-*

fectionis Divinæ, & salutis: *Quanto autem flagrantius*, ait S. P. N. *Deum diligimus, tanto serenius, cum videbimus*. Vide ergo, an, & quomodo charitas tua, erga DEUM, semper in omnibus super emineat? Da mihi Domine DEUS meus ut diligam te intellectu sine errore, memoriâ sine oblivione, & voluntate sine contradictione, sic enim anima mea, nunquam errabit in amore tuo; ut tibi, aliquam creaturam æquet, aut præponat. Nunquam obliviscetur, aut momentum, amoris tui Divini, qui semper præsens es, nunquam contrarium sentiet, amore tuo DEUS. Fac Domine, ut sic in terra diligam te, propter te, sicut in cælo diligam te. Sola tua Divinitas, & nulla mea utilitas, trahat me, ad amandum te. O utinam dirigat cor meum, & linguam meam, tuus amor, ut, ita laudem, & amem te, sicut qui coram, vident, laudant, & amant te, da, ut tota die actiones meæ, & tota nocte somnus meus, non taceant laudantes te &c.

Confilera: 2. Charitatem nostram erga Deum, in omnibus semper, debere
super

supereminere; quia, hoc est primum,
& maximum mandatum; ut DEUM di-
ligamus ex toto corde, ex tota anima,
ex tota mente, & omnibus viribus no-
stris. Quid est autem, inquit Author
oper. imperf: diligere DEUM ex toto
corde? hoc est, super omnia, ut cor tu-
um non sit inclinatum ad ullius rei
dilectionem, amplius, quam ad Dei: nec
delecteris in aliqua specie mundi am-
plius, quàm in Deo: non in honoribus,
non in auro, & argento &c. sed hæc
omnia æstimes, tibi esse in Deo, ut præ
his omnibus Deum ames. Et S. P. N.
Augustinus dum dicit, (inquit Libr: 1.
cap: 22. de doct:) Christi, toto corde,
totâ animâ, totâ mente, nullam vitæ
nostræ partem relinquit, quæ vacare
debeat, & quasi locum dare, ut alia re
frui velit; sed quidquid aliud diligen-
dum occurrit, illuc rapiatur, quo toti-
us dilectionis impetus currit. Verus
enim amor Dei, 1. nihil præter ipsum
ipsum æstimat, & desiderat, quemadmo-
dum Thom: Kemp: Libr: 2. Cap: 5. hor-
tatur dicens: *Nil magnum, nil altum, nil
gratum, nil acceptum tibi sit, nisi purè*

DEUS, aut de Deo sit; amans quippe De-
um anima, sub Deo despicit universa. 2.
Verus Dei amor, jugem Dei memoriam
fovet, ita, ut quemadmodum S. Bern:
cap: 6. medit: loquitur, omne tempus,
quo de ipso non cogitas, perdidisse te com-
putes: sicut enim nullum est momentum,
quò homo non utatur, vel fruatur bonitate,
et misericordiâ Dei, sic nullum debet esse
momentum, quo eum præsentem, non ha-
beat in memoria. 3. Verus Dei amor,
vult soli Deo placere, atque adeo, sem-
per facere conatur, quod magis Deo
placet; eo modo, qui magis Deo placet,
& purius, quia Deo magis placet. *Fl-*
lud autem quoad substantiam, ait Tob:
Lohner Soc: JESU, Deo magis placere
censetur, quod plus charitatis continet, il-
lud autem plus charitatis continet, quod
magis difficile est, sive majorem abnegatio-
nem involvit, vel in quo aliquis plus ab-
stinet; aut sustinet, vel quod non tantum
ad propriam, sed alienam etiam salutem
promovendam dirigitur. Quo ad modum
verò, Deo magis placet, qui diligenter,
alacriter, & constanter operatur: &
quo ad finem, denique magis Deo pla-
cet,

cet, qui minus de solatio, præmio, aut laude humana pro operibus suis, quærit, aut admittit Unde facile patet, an. & quomodo amor tuus, erga Deum, hucusque in omnibus supereminuerit, aut saltem in posterum, supereminere debeat?

Considera 3. Amorem DEI, in omnibus, supereminere debere; quia ipse prior dilexit nos. *In charitate perpetua dilexite* ait per os Jerem: c. 31. & qui ita, ab æterno nos dilexit, in tempore creavit nos, non monstrum, sed hominem, ad imaginem suam, animam spirituales, immortalem, & beatitudinis æternæ capacem; creavit nos, & nasci, nos fecit, non tempore diluvij, sed Christi: non inter Hæreticos, & infideles, sed inter Catholicos, in vera Ecclesia, ubi prodesse nobis possit passio, & mors sua amarissima. Numera, si potes, beneficia, quæ DEUS tibi præstitit, & adhuc præstare paratus est? & cur hoc? ut ametur. *DEUS enim*, ait S. Bern: *non ad aliud amat, nisi ut ametur.* Amemus igitur DEUM, quantum possumus & desideremus eum amare,

plus quam possumus. Amor DEI verus, omnes potentias, sensus, affectus, operationes, cogitationes, & intentiones trahit in DEUM, ut nonnisi DEUM cogitet, intendat, desideret. Et quemadmodum Jonathas qui Davidem diligebat, quasi animam suam, se spoliavit tunicâ suâ, eamque dedit Davidi, cum reliquis vestibus suis, usque ad gladium, arcum, & baltheum, quò qui spoliaretur, exautoratus censebatur, ita verus amator DEI, quidquid in anima sua pretiosum habet, virtutes, scientias, labores, studia, sermones, cogitationes, ipsum denique cor suum libentissimè ei donat, omnia ad DEUM dirigens; ubi enim thesaurus, ibi & cor ipse est. Hinc loquitur S. P. N. Augustinus: *anima*, ait, amans, debet continuò stare in præsentia DEI, & habitare intra DEUM, sicut intra favum mellis habitat apis, quæ ita se ei includit, ut non aliud, nisi mel videat, gustet, & tangat: sic illa non aliud, nisi Divinam suavitatem, aut in ipso DEO, tanquàm fonte; aut in creaturis, instillatam gustet. Vide nunc, an sic, aut quomodo, Charitas

ritas DEI in te super omnia, semper e-
minet?

CONSIDERATIO XIX.

De Refrænanda cupiditate, & abnega-
tione sui.

REGULA.

Sua cupiditati, non obediatur: Cap: 7.

Considera: 1. **Q**uod si veri discipuli es-
se, & nudi nudum JE-
SUM sequi desideramus, exuere debea-
mus omnem inordinatum affectum ad
nos, & commoditates nostras, imo, ad
ipsam vitam. Age: inquit S. Bern. qui
relinquere disponis omnia, te quoque in-
ter relinquenda numerare memento. imo
verò maxime, & principaliter, abnega
te ipsum, si desideras sequi illum, qui
exinanivit propter te semetipsum. Ide-
o carni nostræ negandum est, quod ad
vitæ conservationem, & valetudinem,
non conducit: *Semper mortificationem,*

JESU Christi, in corpore nostro circumferentes, ita, ut nunquam, secundum carnis, sed rectæ rationis, & Spiritûs dictamina, vivamus. Quod autem, ad corporis valetudinem spectat, cavendum sollicitè, nè ad eam conservandam, nimis anxie, commoditatibus inhiemus, quæ subinde, non solum nostro statui, sed & ipsi, quam quærimus, valetudini adversantur. Hinc non est, reperire magis ægros, quam qui sub prætextu invaletudinis, suorum appetituum servituti, se dedunt, opinantes omne id, ipsis prodesse, quod delectat, licet in rei veritate, plus noceat. Amor tui ipsius magis, nocet tibi, ait Kemp: lib 3. C. 27 quam aliqua res mundi, secundum amorem & affectum, quem geris, quælibet res plus, vel minus adhæret. Si quæris hoc vel illud, & volueris esse ibi & ibi propter tuum commodum, & proprium beneplacitum, magis habendum nunquam eris in quietitudine, nec liber à sollicitudine, quia in omni re, reperietur aliquis defectus, & in omni loco erit, qui adversetur. Vide nunc, quomodo cupiditates tuas frangere, teque abnegare velis?

Con-

Considera: 2. Nos esse, milites Christi, qui ad ip[su]m imperium, cupiditatibus, & voluntatibus nostris vim inferre, & sic cælum rapere debemus. Qui sunt violenti illi; ait Cass: Coll: 24 cap: 26. qui Regnum calorum rapiunt nempe illi, qui non alijs, sed voluntatibus suis præclaram inferunt violentiam, qui direptione laudabili omni se præsentium rerum voluptate fraudant, & voce dominica, egregij direptores pronuntiantur, & per ejusmodi rapinam, Regnum Calorum violenter invadunt, isti sunt, profecto laudabiles violenti, qui vim faciunt perditioni suæ. Perditio nostra, est oblectatio vitæ præsentis, & ut expressius dicam, executio voluntatum, desideriorumq[ue] nostrorum. Cui enim, cupiditas dominari dicitur, teste S. Greg: hom: 15. mor: subiectus malis omnibus demonstratur, quia secundum Petrum Rav: omnium malorum radix est cupiditas, transgressionis mater, magistra nocendi, primipila iniquitatis, auriga malitiæ, sicaria virtutum, seditionis origo, focus scandalorum. Quis ergo, hæc considerans, suis cupiditatibus bellum non indicat? cum

perfecta victoria sit, teste Thoma Kemp:
in Persona Christi Lib: 3.c.53. loquentis,
de semetipso triumphare. *Qui enim se-
metipsum subiectum tenet, ut sensualitas
rationi, & ratio in cunctis obediat mihi;
hic verè victor est sui, & Dominus mun-
di. Si ad hunc apicem scandere gliscis,
oportet viriliter incipere, & securim ad
radicem ponere, ut evellas, & destruas,
occultam inordinatam inclinationem, ad
te ipsum, & ad omne privatum, & ma-
teriale bonum. Vide, quomodo, ut bo-
nus miles Christi JESU, agas & agere velis.*

*Considera: 3. Nos cum Christo, cru-
ci affixos & omnibus inordinatis desi-
derijs; mortuos esse debere, qui enim
sunt Christi, carnem suam crucifixerunt,
cum vitijs, & concupiscentijs, ad Gal:
5. Patres Sancti, inquit S. Dorot: &
maiores nostri, sibi ipsis, mundum crucifi-
gentes, per dura certamina se se quoque
mundo crucifixerunt; nos vero, videmur
nobis ipsis mundum crucifixisse quia re-
liquimus eum, & ad monasteria diverti-
mus; at nolumus nos mundo crucifigere,
adhuc enim in animo nostro, ait, vigent
blanditiæ illius, adhuc in nobis ipsius af-
fe-*

fectum abscondimus, compatimur ipsius gloriae, compatimur delicijs, & voluptatibus, compatimur ornamentis, & vestibus, ob viles, & inanes res delabimur plerumq; ad pristinas ejus passiones, quod sanè non nisi ex amentia provenit, ut qui pretiosas, & magnas res reliquimus, ob minimas plurimum perturbemur. Atque id à nobis pessimè agitur; ut enim mundo, & ejus rebus abrenuntiavimus, ita & pristinis ejus passionibus, abrenūciare debemus. Plerique defectus, quos committimus, ait Alph:Rodriq, inde ut plurimū ortū habent; quod vel nos, in laboris ac difficultatis, alicuius susceptione non superemus, & mortificemus, vel aliqua deletatione, ac voluptate carere nolimus. Et Joan: Weyer Soc: Jesu: omnis creatura, inquit, aut nos delectat aut mærore afficit. Si te delectat 1. Lauda creatorem. ut dum vides rem pulchram dic: o DEUS meus, quanto tu pulchrior es! o pulchritudo infinita, te toto affectu amo. Si gustes rem sapidam, o! quanto tu DEUS es sapidior! &c. 2. Subinde te, eā voluptate priva, & ad DEO magis placendum noli videre, audire, olfacere, gustare

stare, tangere id, quod sensibus gratum, & iucundum est, & hic modus est, priore longè excellentior, quod DEUS aliquando S. Brigittæ dixit: quod is, qui se abstinet, & cohibet, nè respiciat, audiat, odoretur, gustet, loquatur, tangat omne id, quod illi, neque necessarium, neq; utile est, & suæ sensualitati, etiam in rebus minimi resistit, plus obsequij præstet DEO, quam si mortuos ad vitam revocaret. Vide nunc, & expende, quomodo te ipsum abnegare debeas, & velis.

CONSIDERATIO XX.

Quis sit Famulus DEI.

REGULA.

Famulo DEI dicenti, quid sibi doleat, sine dubitatione credatur. Cap: 7.

Confidera: 1. Servum DEI, ut eius, qui solus verè est: magnus Dominus, & laudabilis nimis, Psal: 47. excellentiam celebrare, & quaquâ divulgare.

vulgare valeat, debere, hujus tanti Domini sui, magnam sibi comparare cognitionem, siquidem præcipuum omnium bonorum caput est, hæc cognitio, quam Christus ipse vocat vitam æternam, inquit Joann: 17. *Hæc est vita æterna, ut cognoscant te solum DEUM* &c. in quæ verba S. Augustinus ait: *Si cognitio DEI est vita æterna, tanto magis vivere tendimus, quanto magis, in hac cognitione proficimus. Hinc suspirat Cognoscam te, DEUS, cognitor meus! cognoscam te, DEUS, cognitor meus? cognoscam te, virtus animæ, expelle tenebras mentis meæ, ut videat te intelligendo, ut cognoscat te comprehendendo, diligat te cognoscendo, quisquis enim cognoscit te, diligit, se obliviscitur, amat te plusquam se, & alibi, Domine JESU noverim te, & noverim me, ut oderim me, & amem te. Ideo S. Ignatius Loiola hanc notitiam DEI omnibus optavit, in DEI amore totus ignitus exclamans. O DEUS meus! amor cordis mei! O si te homines nossent, Tantæ enim bonitatis est DEUS Dominus noster, ut mereatur amari, amore infinito. Tantæ pulchritudinis*
quam

quam nemo clarè intuebitur, qui non plus millies, ipsum amet, quam semetipsum. Unde, si DEUS vultum suum revelaret dæmonibus, à quibus modo, atrocissimis impetitur blasphemijs, non possent, non verso in benevolentiam odio, multiplicatis laudibûs, maledicta commutare. Tantæ potentiae, ut possit uno verbo infinitos creare mundos, & in momento, eos denuò destruere. Tantæ Sapientiae, ut penetret etiam cordium intentiones. Tantæ Providentiae, ut sit semper intentus, ad benefaciendum nobis. Tantæ immensitatis, ut omnes homines, coram illo, sint infinities viliores, & abjectiores, quàm minima arenula, comparata vastissimis cælorum orbibus. Omnes enim gentes, quasi non sint, coram eo, Isai 40. Expende nunc, an, & quomodo, hanc immensam DEI & Domini tui, Majestatem æstimaveris. & laudaveris: an verò sæpe, neglecta DEI laudè, laudem tuam vanam quæsieris?

Considera: 2. Servum DEI, debere Dominum DEUM suum revereri; cùm verò reverentia, & honor exhibetur alteri, tanquam præsenti, hinc sequitur,

si perfectus esse velit, ipsum debere, DEI Domini sui, omnipræsentiam semper respicere, & ubique venerari. *Quæ-
ri e Dominum, & confirmamini*, canit
Psalter Psal: 104. *quærite faciem ejus
semper*. Ubi S.P.N. Augustinus ait, *Fa-
cies DEI est DEI præsentia, confirmabi-
tur, & stabilietur in bono, non tantum, qui
faciem, & præsentiam DEI invenit in
gloria, verum etiam, qui hic quærit in
contemplatione*. Quâ autem ratione, DE-
UM nobis semper ante oculos præsen-
tem, constituere possimus, docet idem
S.P.N. Ep: ad Fort: ubi ait: *DEUS,
totus oculus est, totus manus est, totus
pes est, totus oculus est, quia omnia videt,
totus manus est, quia omnia operatur, to-
tus pes est, quia ubique est*. Porro præ-
sentia huius continuæ fovendæ, & si
varij assignetur modi, attamen Alph:
Rodriques: p. 1. tr: 6. c. 4. *illum facil-
limum, suavissimum, & utilissimum censet,
per quem omnes actiones nostras dirigi-
mus ad maiorem DEI gloriam, easdem non
solum clarissimè conspicientis, sed & multi-
plici titulo vendicantis*. Proinde provi-
dè illum in conspectu tuo semper iuxta
illud

Illud Apostoli Corynt: 10 *Sive manducatis, sive bibitis, sive aliud quid facitis, omnia in gloriam DEI facite.* Quasi diceret in omnibus actionibus tuis, aut saltem quam potes frequentissimè, cor tuum ad DEUM suscitollito, atque his vel similibus eum verbis alloquere: *P. propter te Domine hanc rem facio. ut tibi placeam, tibi que gratificer, quia, id ipse fieri jubes, voluntas tua mea est, tuum beneplacitum meum &c.* Et hæc est optima, in DEI conspectu iugiter ambulandi ratio, eaque admodum facilis, utilis magnamque perfectionem includens: hoc enim est, in continuo quodam amoris DEI exercitio versari & continuo orare, quod à nobis Christus requirit Luc: 18. dicens: *oportet semper orare, & non deficere.* Et quæ dari melior oratio potest? quam quod, ad majorem DEI gloriam, & honorem semper quispiam desideret, unicum que ejus gaudium, & beneplacitum sit gaudium, & beneplacitum DEI. Hanc ob causam Dion: Carth: non sine ratione tradidit, eum, qui per affectus hos, & desideria interna, in hoc exercitio, studio.

studiosè perseverabit, tantam ex eo utilitatem capturum, ut suum ipse cor, brevissimo tempore, prorsus mutatum, & planè aliud factum se esse percepturus sit. Vide, quomodo coram DEO, ambulare velis?

Confidera: 3. Verum DEI servum, pendere debere, ex solius DEI voluntate, se seque consumere, ad beneplacitum ejus, qui est Dominus omnium creaturarum. Ita quidem, ut quidquid agitur, per quamque seu corporis, seu animæ potentiam; quidquid sustinetur in quavis utriusque parte; omnia illa agat, & sustineat, hâc solâ intentione: *quia Deus vult*, idque sine omnimoda, rerum, temporum, locorum, personarum, exceptione, hæc enim inquit, Bened: Angel: Capuc: in Reg: perf: est via compendiosissima, ad veram perfectionem, & vitæ sanctitatem. Acquiesce ergo ei, ait S. Job cap: 22. & habeto pacem, per hoc enim habebis optimos fructus; nimirum, inter adversa, & prospera mutabilium temporum, tenens quandam imaginem æternitatis, prout S. Bernard: ait Serm: 21. in Cant: dum

te cæperis renovare, & reformare, in-
 signe illud antiquum similitudinis, æ-
 terni Dei, apud quem non est trans-
 mutatio, nec vicissitudinis obumbratio.
 Quippe, sicut ipse, ita & tu eris in hoc
 mundo, nec in adversis timidus, nec in
 prosperis dissolutus Ideo Thom: Kép:
 Libr: 3. cap: 25. *non te magni reputes,*
inquit, aut specialiter dilectum exstimes,
si in magna fueris devotione, atque dul-
cedine, quia in istis non consistit profe-
ctus, & perfectio hominis, in quo ergo
Domine? in offerendo te, ex toto corde
voluntati Divinæ, non quærendo, quæ
tua sunt; nec in parvo, nec in magno,
nec in tempore, nec in æternitate, ita;
ut unâ æquali facie, in gratiarum actio-
ne permaneas, inter prospera, & adver-
sa, omnia æquâ lance pensando. Vide
an te ita habeas, aut certe habere velis?



CONSIDERATIO XXI.

De abnegatione propriæ voluntatis.

R E G U L A.

*Non cum quibus ipse voluerit, sed cum
quibus Præpositus iusserit, ire
debebit. Cap: 7.*

*Considera: 1. V*oluntatem propriam,
secundum S. Bern: esse
illam, quæ non est communis cum
DEO, & hominibus, sed nostra tantum;
quando, quod volumus, non ad hono-
rem DEI, non ad utilitatem fratrum,
sed propter nosmet ipsos facimus, non
intendentes placere DEO, & prodesse
fratribus, sed satisfacere proprijs moti-
bus animorum. Hanc oportet abnega-
re, quia DEO gratius nihil offerre pos-
sumus. Certè nulla actio, etiamsi vi-
deatur optima, si ei insit voluntas pro-
pria, DEO placere, & accepta esse po-
test; ideo DEUS: *Rogant me, inquit Isai*
58. quare jejunavimus, & non aspexisti,
humiliavimus animas nostras, & nescisti.
Respondet: Ecce in die jejunii vestri, in-
vent-

venitur voluntas vestra. Hinc S. Bernardus: *grande malum, ait, voluntas propria, quâ fit, ut bona tua, tibi bona non sint, quia nihil, quod propriâ inquinatum sit voluntate, gustabit is, qui pascitur inter lilia.* Unde vult Nicol: Eschius exerc: 4. ut nos tanta vi includamus, in Crucifixâ humanitate JESU, quasi jam defuncti, & mundo toti mortui essemus, ita, ut nostrum velle, & nolle, perfectè à nobis abijciamus, & ipsi soli in omnibus placere, & strictè obedire satagemus. Hinc inquit ulteriùs, nihil tibi amplius agere licebit, quantumlibet exiguum absque ipsius permisso, & licentia, quæ corde petenda erit, priùs obtentâ. Vide an, ita voluntatem abnegare velis?

Considera: 2. Fundamentum Religionis perfectionis, consistere in mortificatione, & abnegatione, propriæ voluntatis; uti sat clarè indicat Cass: dum ait Libr: 4. de instit: Cap: 8. *Communem olim fuisse inter seniores ascetas persuasionem, eos duntaxat ascendere posse, summa perfectionis culmina, qui didicerunt suas vincere voluntates, & studiosè in his,*
quæ

*quæ animo contraria sunt, fuerunt exercitati; & nullatenus posse eum iram; aut tristitiam, vel spiritum fornicationis extinguere, nec retinere veram cordis humilitatem, & cum fratribus perpetuam concordiam, & diutius in cænobio permanere, qui prius voluntates suas, non didicerit superare. Coge itaque monet S. Dorotheus, te ipsum in cunctis, voluntatem tuam imprimis abscinde, si con-
 sveveris voluntatem tuam amputare, habitum indues Christi gratiâ & misericordiâ, quo omnia sine resistentia, aut repugnantia perficies, teque in perfectam libertatem afferes. Hinc B. Clemens Sanctum pronunciat illum, qui voluntati renuntiat. Ille, ait, profecto Sanctus est, qui voluntati propriæ abrenuntiavit. Cui subscribit S. Ignatius, cum P. Ludov. Gon-
 salvo dixit: Se totum fundamentum ad perfectiorem Religiosam ponere in mortificatione, & abnegatione propriæ voluntatis. Unde rogatus quidam senex, ut haberetur in Vit. PP. quænam esset angusta via ad cælum? respondit; Angusta & arcta via est, ut cogitationibus suis homo violentiam faciat, & abscindat pro-*

pter Deum voluntates suas. Non igitur, sine ratione dicere solebat Taulerus, Ep: 8. Omnem diem amissam credite, quò Dei amore, propriam non fregistis voluntatem. Hinc monet Weyer Soc: JESU: nihil unquam præsertim ex eis, quæ sensibus sunt grata, aut ad quæ propendes, ante acceptes, nec agas, nisi credas te moveri, motivo supernaturali, ob beneplacitum Dei. Ideo dum comedendum, cubitum eundum &c. subsiste non-nihil, ne impetu naturæ ad ea feraris: & duos actus elice. 1. piæ intentionis: *Propter te Deus.* 2. Abnegationis tui, & ora, ne inordinatè illis inhæreas, aut Spiritum extingvas. Vide, quomodo voluntatem, in his abnegare velis?

Considera: 3. Ab amore proprio, & propria voluntate, tanquam aggeribus, quibusdam impediri, flumen divinæ gratiæ, nè adeò se communicet, & expandat, ac redundet in animas nostras, ut Deus faceret, si hæc impedimenta abessent. Ideo omni virtute laborandum est, ut penitus extirpetur, hæc propria voluntas. *Inter impedimenta,* aiebat Christus

flus B. M. Magdalenzæ de Pazzis vit: p.
 3. §. 1. *Donorum Spiritûs Sancti, non
 tantum sunt ea peccata, quæ Deum expel-
 lunt ex anima, sed & propria voluntas, &
 proprium Iudicium eorum, qui modo suo
 volunt servire DEO, qui quidem deside-
 rant Spiritum Sanctum, sed eum deside-
 rant eo modo, qui illis placet, & qui it-
 lis videtur, & sic se reddunt inhabiles ad
 percipiendum eum.* Hinc S. Thomas:
*Amorem proprium fontem omnis mali vo-
 cat, ex quo quamdiu fluxerit, nihil ali-
 ud, quam exitium, & pestis timenda sint.*
*Omnia mala ex una radice pullulant, pro-
 priæ voluntatis, ait S. Bernard: unde enim
 sunt scândala, unde turbatio, nisi quod
 propriam sequitur voluntatem. Propria
 voluntas DEUM impugnat, & adversus
 eum extollitur. Ipsa est, quæ paradisum
 spoliât, infernum ditat, Sanguinem Christi
 evacuat, & ditioni diaboli mundum subju-
 gat; caveamus igitur à propria voluntate,
 tanquam vipera pessima, & nequissima,
 quæ sola deinceps damnare possit animas
 nostras.* Hæc S. Bernard: Nihil ergo,
 propter nostram voluntatem explendam,
 aut cupiamus, aut faciamus; sed semper
 id,

id. quod DEO magis placitum, magis ædificatorium, communitati, in qua agimus, conformius, & ad conscientiæ nostræ solidam quietem sit expedientius. Ideo Thom: Kemp: libr: 3. cap: 32. in Persona Christi ait: *Utinam ad hoc pervenisses, ut tui ipsius amator non esses, sed ad nutum meum purè stares, & ejus quem tibi præposui Patris; tunc mihi valde placeres, & tota vita tua in gaudio, & pace transiret.* Vide igitur, quomodo voluntatem tuam abnegare, tibi que mori velis?

CONSIDERATIO XXII.

Dé Bono Usu temporis.

R E G U L A.

Extra horam, qui petierit, non accipiat.
Cap: 7.

Considera 1. **T**emporis pretium, Tempus tantum valet, quantum valet DEUS, ait S. Bern: quia in tempore benè consumpto, comp ratur
Deus.

Deus. Unde S. Hieron: *nè dicas inquit priora tempora meliora fuère quam nunc sunt, virtutes faciunt dies bonos, vitia malos. Dum enim tempus habemus, operemur bonum, monet Apost: ad Gal: 6. Noverat Christus numerum dierum suorum & tamen dixit Joan: 9. Me oportet operari, donec dies est, venit nox, quando nemo potest operari, quantò magis nos, qui nescimus diem, neque horam? nescimus, an hujus diei, Ordinis nostri exercitia sint ultima, & an ijs non sint alligatæ gratiæ efficaces, & gratia finalis, sine qua non salvabimur. Cum ergo, hoc nesciamus, singula nostra ita peragere oportet, ac si ex quolibet, penderet nostra æterna salus. Christus Dominus, sic attendit tempus per totam vitam juxta beneplacitum Patris, ut quodlibet opus faceret tempore statuto, nec vellet tempus prævenire, nequè ad momentum ultra differre, ideo sæpè, cùm aliquid ab eo peteretur, dicebat: *Nondum venit hora mea. Nondum venerat hora ejus*; id est, quam æternus Pater præfixerat. In hoc ergo & nos imitemur Christum, ut omnia nostra*

nostra faciamus tempore statuto, nunquam ordinem invertentes, nisi necessitas, vel charitas, vel obedientia, aliud exigat. Vide an tempus ita observes?

Co si'era 2. Non solum tempus prescriptum, sed etiam, omnia tempore pretiosa momenta optimè influenda esse: *quis enim mente assequatur*, ait S. Laur: Just: ut pretiosum sit tempus? aut quis lingvâ, caritatem ejus explicet? nôrunt qui amiserunt; hi enim gratiô animô erogarent opes, honores, delicias, & quidquid est voluptatis, pro unica hora; nam exiguo illo tempore, possent iram, & furorem Divinæ Justitiæ sedare, Angelos exhilarare, Regnum adipisci. *Nemo igitur vestrum parvi aestimet tempus*, monet S. Bernard: *quod in verbis consumitur otiosis, volat verbum irrevocabile, volat tempus irremediabile, nec advertit insipiens, quid amittat; libet fabulari, ajunt, donec hora prætereat. O donec hora prætereat! quam tibi ad agendam penitentiam, ad obtinendam veniam, ad acquirendam gratiam, ad promovendam gloriam miseratio conditoris indulserat. O donec transeat*
tem.

*tempus! quo divinam propitiare debueras pietatem, properare ad Angelicam societatem, suspirare ad amissam hereditatem &c. Non igitur defrauderis à die bono, & particula boni doni non te prætereat. Eccl: 14. aut pereat sine fructu, aut lucro spirituali. Cogita, si alicui animæ ex inferno, vel purgatorio, aut alicui Sancto, è cælo ad hanc vitam regredi daretur, quomodo hunc diem transigerent? imo, si tibi ipsi, post mortem idem concederetur, quomodo illum transigeres! ecce nunc tempus acceptabile! ecce nunc dies salutis, imitare igitur S. P. N. Augustinum, qui quanti faceret tempus, ipsemet testatur libr: 1. Confes: cap: 21. dum dicit: *Carò mihi vale-t stillæ temporum; ut & tibi imposterum, omnes stillæ temporum carò sint.**

Considera: 3. Nullum omnino tempus esse æstimandum, quod non bonis operibus consumitur; ut autem omnem diem ita consumamus, juvat quemlibet, ut ultimum suspectum habere, & ordinem sibi præscriptum, ad amissum observare, ita enim fiet, ut passionibus non abri-

pia,

piamur, ad opera multa otiosa, & inutilia, cùm nimirum animus semper certo operi affixus sit: *Omnia honestè, & secundum ordinem fiant in vobis*, præcipit Apostolus, 1. Cor: 14. siquidem non sufficit, opera per se bona facere, sed benè facere, & quidem tempore suo, purissima intentione, unicè propter Deum. *Imitemur Deum*, adhortatur S. Thomas opusc: 62 *Non solum optima faciendo, sed optimè faciendo.* DEUS enim, omnia opera sua, in summo benè facit, similiter & nos, diligentia apponere debemus, ut singula opera nostra, quantum unquam melius possumus, faciamus. Ex omni virtute D. N. JESU Christi, & cum omni desiderio, triumphantis & militantis Ecclesiæ, & sub nomine Creatoris, quasi tota salus nostra, & omnis laus Dei, & universitatis utilitas, ex uno opere dependeat, quasi nunquam, ad id opus reversuri, neque opus aliud postmodum incepturi. Vide an, & quomodo hoc facere velis?



CON.

CONSIDERATIO XXIII.

De Cavendo murmure.

R E G U L A.

Sine murmure serviant. Cap: 7.

Considera: I. **M**urmurationem fugiendam esse, cum homini coram Deo, nihil damnabilius sit, quam murmuratio, præsertim contra Prælatos, & Superiores, quia in ullo Populus Jsraël, in veteri Testamento teste S. P. N. Augustino, Deum, in tantum offendit, quam quando murmuraverunt adversus Superiores, quos DEUS ordinaverat, videlicet Moysen, & Aaron; *quemadmodum Moyses dicit Exod: 16. Nec contra nos est murmur vestrum, sed contra Dominum.* De huiusmodi hominibus vix spes est, quod proficiant in virtutibus; quia murmuratio est unica filia dæmonis infernalis cui cuncta pascere monasteria commisit. quam isti sibi desponsaverunt. O maledictum peccatum! o odibilis bestia, quæ omnia opera bona devorat, & pauperem animam non deiformem, sed dæmo-

dæmoni-formem efficit, & prænuncia est æternæ damnationis, siquidem ob hujus odibilitatem Dathan, & Abiron cum sua progeniè oportuit viventes descendere in infernum cum corporibus simul, & animabus, sicut & Chore, cum ducentis quinquaginta Viris, infernali igne comburebantur, ac corpore simul, & anima ad inferna deducebantur. Ita Harph: Theol: Myst: par: 1. cap: 7. & Pater Eligius Basæus Tom: 2. flor: Theol: Verb: murm: ait, *dolendum certè nimis, & utinam, sicut hoc malum gravissimum est, ita, & in plerisque monasterijs, non esset frequentissimum, sed pro dolor! familiare est factum, ut nusquam ferè non reperiatur, nec de illo erubescatur, imò, ut nullum ferè malum, vel exiguum censeatur. Hinc, nvenies, qui omnia Superiorum salubriter acta, in malum interpretantur, ac ore maledico temerè, & palam nuntiare non verentur: hoc nimirū meliùs, illud utiliùs: aut pulchrius, & commodiùs potuisse ac debuisse disponi, atque ordinari; ac si tales, Superiorum suorum Judices forent constituti, & scrutari haberent, quo*

quo fine, intentione, modòvè, emanare debuissent. Vide quomodo hac in parte tu, te habéas?

Co sidera: 2. Solos murmurare, qui non amant. De quibus scribit Sant: jure de cognit: Christi par: 2. cap: 8. quod aliqui iverint, post album, & rubrum vexillum Crucis, non sine murmure. Quando B. Cathar: Raconisia, die Sanctorum Omnium ad locum æternæ gloriæ, à S. Joanne Evangelista ducta, videbat duos Angelos præcedentes, quorum alter fuisse dicitur Seraphinus, & præferebat vexillum crucis rubrum, & album, interroganti, quid nonnulli, qui si quebantur, murmurarent, dixit S. Joannes: *Non amantibus DEUM, viam celi esse difficilem: esse jugum suave amantibus: illis namque placet, quidquid placet Deo voluntate beneplaciti, siue ningat, siue pluat, siue serenum cælum arrideat, bellum, pax, morbi, sanitas, mors, vita, tristes prosperivè eventus. Placet illis, quidquid placet Deo voluntate signi expressa sono æris campani, voce Superioris, lege scripta, seu in Regula. Hinc, optimum remedium,*
con.

contra murmurationem est. Totalis
 sui resignatio, & indifferentia ad loca,
 tempora, & exercitia; ad officia hono-
 rifica, & conversationem, talis enim;
 stabit immobilis, sicut domus ædificata
 & fundata supra petram; sicut Chri-
 stus ait Matth: 2. cap: 7. Ut verò mur-
 muratio vel repugnantia facilius vitari
 possit. advertendum, eam ex varijs cau-
 sis promanare 1. *Ex re imperata* cum
 ea vilis est, & abjecta, ut purgare ali-
 quem locum &c. vel molesta, atque
 difficilis ut abstinentiâ se mortificare;
 aut quando *honori humano repugnat*, ve-
 lut opprobria patienter ferre. 2. *Ex*
persona; eo quod habetur indiscretus,
 simplex, ignarus, vel non adeò amicus.
 3. *Ratione temporis*; si tunc recreatio-
 ni, quieti vel pietati, & proprijs nego-
 tijs, vacare luberet. 4. *Ex qualitate*
Operis; veluti, cum celeriter sedulò,
 lentè, humiliter, & cum sui ipsius con-
 fusione, superbizque repressione pera-
 gendum est. 5. *Respectu loci*; ut si is
 publicus, minus gratus, vel fædus est.
 Ex his, & similibus causis, contradictio,
 murmuratio, se se ab initio operis, vel
 inter

inter operandum ingerit, licet, ex unico propriæ voluntatis & amoris fontè scaturiant, debentque ex anima amoveri, memoriâ recolendo: *hoc est beneplacitum Dei &c.* Vide quomodo te habeas, & habere velis?

Considera: 3. Quomodo te inter murmuratores gerere debeas? 1. Sermone murmuris, artificiosè aliò transferas, præsertim inter ignotos, ut ita, murmurantibus simul, & audientibus parcatur, fieri etenim potest, ut corrigens magis erret, quam is qui corrigatur. Ita Socrates concivem aliquando suum corripiebat, præsentè Platone, paulò acrius, cui Plato, an non satiùs erat, inquebat, de his illum privatim admonere? cui Socrates: nonnè & tu, rectiùs fecisses, hoc etiam mihi, seorsim dicendo. 2. Absentium intentionem, & zelum bonum excuses. 3. Subinde illos modestè corrigas. 4. Illos fugias; quis enim non fugeret, si què latrones, in suam societate trahere vellent; quod si vero evasioni locus non sit, nec eos impedire possis, saltem vultum severum, aut minus hilarem offendas. 5. Murmurant-

murantem lingvam, aliò non portes
au isti verbum a i versum proximum tu-
um, Eccl: 19. commoriatur in te, si ens,
quod non te dirumpet. Quasi diceret,
 sepeli illud æternâ oblivione: non est
 enim, instar partûs mulieris, qui neces-
 sario emitti debet, propterea subjungit,
à facie verbi, parturit fatuus. Id est,
 stulti sunt illi, qui putant, se retinere
 non posse, tale verbum. Vide quomo-
 do te hætenus habueris?

CONSIDERATIO XXIV.

De Pace Fraterna.

R E G U L A.

Lites, aut nullas habeatis, aut quam
celerrimè finiatis. Cap: 8.

Considera: 1. **D**E O summè placere, si
 diligamus, & custodia-
 mus pacem, quam Christus Dominus,
 natus mundo inferre voluit, ut esset
 semper pax hominibus bonæ volunta-
 tis. Deinde exiturus de hoc mundo,

in

in sermone ultimæ cænæ, tanto igne, illam commendavit; ut pectora illa Apostolica, quasi incineraret. Redivivus vero multoties eis illam iterum apprecatus est, inquiens: *Pax vobis*, Consistit autem hæc pax, in charitate fraterna, & animarum unione, de qua prædictum est Ezech: cap: 11. *Dabo eis cor unum, & spiritum novum tribuam in visceribus eorum.* Illud nimirum, de quo Christus ait Joan: 13. *Mandatum novum do vobis, ut diligatis invicem*, novo scilicet modo, ut sitis cor unum, & anima una. Ideo Apostolus rogat 1 Cor: 1. *Obsecro vos fratres, per nomen Domini nostri JESU Christi, ut id ipsum dicatis omnes, & non sint in vobis schismata, sitis autem perfecti, in eodem sensu, & in eadem sententia.* Melior enim est aiebat Card: Bellarm: *Uncia pacis, & charitatis, quam libra victoriæ.* Unde Sanctus P. N. Augustinus Serm: 12. de verb: Ap. inquit: *Nolo habere, cum quo litigem, multò est mihi optabilius inimicum non habere, quàm vincere.* Hinc optat Apostolus Coloss: cap: 3. *Pax Christi exaltet in cordibus vestris*, & Hebr: 12. *Pa-*

cem sequimint cum omnibus, & sanctimoniam, sine qua nemo videbit DEUM. O quam ergo bonum & jucundum est, ait S. P. N. Augustinus in Psal: 132. habitare fratres in unum, id est, qui sic vivunt in unum, ut unum hominem faciant, ut sit illis verè, quod scriptum est, una anima, & unum cor; multa quidem corpora, sed non multa corda. Vide quomodo hanc pacem amare, & sequi velis?

Confidera: 2. Nos esse milites Christi, qui diabolum in se divisum, pace nostrâ vincere debemus: Diabolus vos inveniat pace munitos, & concordîâ armatos, ajebat Tertull: ad Martyres; quia pax vestra bellum est illi. Castrorum acies ordinata, tunc hostibus terribilis ostenditur, inquit Rupert: in cap: Cant: quando ita fuerit stipata, & densata, ut in nullo loco interrupta videatur, nam si locus vacuus, per quem hostis posset ingredi, dimittitur, profecto jam suis terribilis non est. Et nobis ergo, cum contra malignos Spiritus, Spiritualis certaminis aciem ponimus, summo opere necesse est, ut charitate semper uniti,
atque

atque constricti, & nunquam interrupti, per discordiam inveniamur, quia quamvis quælibet bona in nobis fuerint, si charitas desit per malum discordiæ, locus aperitur in acie, unde ad feriendos nos, valeat hostis intrare. Necesse autem est, inquit S. Chrysost: Hom: 34. in Gen: internam, & externam simul pacem tueri; alias quamvis plurima pace, & curâ externâ fruamur, si intra nos cogitationum nascitur tempestas, tumultus, & seditio, nihil externa pax nobis proderit, sicut, & neque miserabilius est, aliquid civitate, quæ licet præsidij, & muris benè munita sit, intus tamen foveat Cives proditores: *Vivamus igitur pacifici, similes exercitibus cælestibus; quia Angelicis, & Cælestibus copijs, nihil tam proprium est,* inquit S. Gregor: Naz: *quam pax & concordia.* Proinde qui pacis bonum amplectantur, dissensionemquæ oderunt, ad Divinas mentes accedunt. Vide quomodo pacem colere velis?

Considera: 3. Quod Deus amet amatores pacis, ut filios; ideo ait Christus: Beati pacifici, quoniam ipsi filij Dei voca-

buntur, è contra, odio habeat amatores discordiarum: Si enim Filij Dei vocantur, qui pacem faciunt, ait S. Gregorius: procul dubio Sathanæ sunt Filij, qui pacem confundunt. Hinc S. Anselmus dicere solebat: eos, qui in hac vita conformant se aliorum voluntati (salvâ æquitate) & cum eis pacem colunt, id à Deo mereri, ut post hanc vitam se accommodet eorum voluntati; & cum eis quoque pacem colat; eos verò, qui discordias amant, pari modo, post hanc vitam neminem reperire, qui eorum se accommodet voluntati; juxta censuram illam: quâ mensurâ mersi fueritis, remittetur vobis. Amplectamur ergo. ut filij lucis, pacem; quæ est secundum S. Gregorium vestigium pacis æternæ. Et test. S. P. N. Augustino: tale bonum est, bonum pacis, ut in rebus creatis, nil gratiosius soleat audiri, nil delectabilius concupisci, et nil utilius possideri. Siquidem ut dicit S. Chrysost: Pax omnis gaudij est materia. Vide nunc, quomodo discordiam fugere, & pacem sectari debeas & velis?

CON-

CONSIDERATIO XXV.

De Supprimenda ira.

R E G U L A.

Nè ira crescat in odium. Cap: 8.

Confidera: 1. **I**Ram esse, pestem societatis humanæ, quia tollit ipsius summum bonum, & arctissimum vinculum, nimirum concordiam, & vitam socialem; *quis enim potest habitare cum homine, cujus Spiritus facilis est ad irascendum?* ait Spiritus Sanctus Prov: 18. Et S. Chrysoft: nihil iracundo homine insvavius, nihil gravius, nihil infestius, turpius nihil; sicut contra nihil est, irascendi nescio jucundius. Feræ potiùs, quàm iracundo homini conhabitandum est, nam illa, cum semel mansvefacta fuerit, suam servat legem, hunc autem quoties mitigaveris, rursum efferatur. Per iram, Justitia relinquitur, ait S. Gregor: dum perturbata mens, judicium sine ratione exasperat, omne, quod suggerit, rectum putat. Per iram gratia vitæ socialis amit.

amittitur. quia, qui se ex humana ratione non temperat, necesse est, ut bestialiter vivat, per iram mansuetudo amittitur, concordia rumpitur, & lux veritatis amittitur, quia cum menti iracundia, confusionis tenebras incutit, huic DEUS radium suæ cognitionis abscondit. Ideo admonet Apostolus Eph: 4. *Omnis amaritudo, & ira, & indignatio, & clamor, tollatur à vobis cum omni malitia.* Et S. Basil: *Nè fratres, inquit dilectissimi, malum malo curate, nec contendite invicem clamorositate mutuâ vincere, in rixa quoniam is inferior est, qui victor est, ac peccatis longè gravior discedit.* Vide nunc, quomodo iram vincere, & suppressere debeas & velis?

Considera: 2. Iram facere hominem Christo dissimilem, eumque excludere ex illius schola, in qua nonnisi mansuetudo, & humilitas discitur. Quapropter Christus aliquando S. Birgitam, propter iræ motum leniter reprehendens, eidem dixit: *Ego Creator & Sponsus tuus, propter te sustinui verbera, tu verò impatiens adeo fuisti, ut verba portare non potueris. Ego stans ante Ju-*
dicem

dicem tacui, & non aperui os meum, sed tu acerbius respondendo, & exprobrando, vocem tuam nimis exaltasti. Tu debueras omnia patienter tolerare propter me, qui clavis affixus fui pro te: debueras per patientiam eum, qui erravit, ad meliora provocare; Sis ergo posthac cautior, & ubi ab aliquo ad iram provocata fueris, non facilè loquaris, donec ira ab animo tuo recedat, transacta autem animi commotione, & causa ipsius commotionis diligenter pensata, poteris loqui cum mansuetudine, quod si loquendo nihil proficeres, & tacendo non peccares, melius faceres, & majus meritum acquirereres, si sileres: itaque & nos ori nostro silentium indicamus, ac animi commotionem intus comprimamus, ne ira crescat; sicut enim flamma, candelæ emunctorio compressa, statim extinguitur, ita interior iræ commotio, silentio & dissimulatione cohibita, sensim paulatimque commoritur. Tu acceptâ fortè injuriâ, monet S. Bernardus, non continuo more sæculari obliquè referire, sed neque sub specie quasi corripiendi, verbò acutò, & urenti transfigere audeas, ullate-

nus animam, pro qua Christus affigi, cruci dignatus est. Non grunnire, quasi increpando; non labijs mussitare, quasi murmurando, non narem contrahere, aut cachinnare, quasi subsannando, non frontem rugare, quasi invehendo, aut comminando; sanè commotio tua ibi moriatur, ubi oritur; nec permittatur exire, quæ mortem portet, ne perimat ut dicere possis & tu cum Propheta, turbatus sum, & non sum locutus. Vide quomodo hoc facere velis?

Considera: 2. Nè injurianti irascamur, nos oculos nostros conijcere debere, non in illum, qui injuriam facit, sed in Deum hanc permittentem, & in bonum nostrum ordinantem. Nè simus tam infantes, ut medicinam à sapientissimo medico, & benignissimo Patre præparatam, cum indignatione respuamus, cum injuriâ & clamore rejiciamus: sic profecto David, injuriam medicinam cogitabat, qui à Semei maledictis proscissus, dixit filijs Sarviæ; dimittite, ut maledicat, Dominus enim præcepit ei, ut malediceret David: *Vetuit prohiberi maledicum convitiantem*, inquit S. Bernardus:

quæ

quæstum æstimans maledicta, & addidit, Dominus misit illum ad maledicendum David, prorsus secundum cor Dei, qui de cor e Dei ferebat sententiam, serviebat lingvâ maledicâ, & ille intendebat, quid in occulto agcret DEUS, vox maledicentis in turribus, & animus se inclinabat ad benedictionem. Nunquid in ore blasphemi DEUS? absit, sed eo usus est ad humiliandum David, hæc S. Bernardus Serm: 34. in Cant: Si ergo DEUS fratre, aut quocunque alio utatur ad humiliandum nos, ad sanandum nos, ad perficiendum nos, ad fabricandam coronam nostram, nè recalcitremus iracundè, in Dei instrumentum minas intendendo, sed nobis persvadeamus, nec justis, nec injustis ex causis esse, adversus fratres irascendum: quoniam ira immoderata, ex quacunque causa concepta intellectum obscurat, mentis puritatem contaminat, Spiritum Dei, qui est Spiritus pacis, in nobis contristat, fiduciam ad orandum adimit & ad mortem nos præparare non finit. Vide ergo, quomodo te habere velis?

CONSIDERATIO XXVI.

De Condonanda Injuria.

REGULA.

Quicumque convitiô, vel maledictô, aliquem læserit, meminerit satisfactione quantocius curare, quod fecit, & ille, qui læsus est, sine disceptatione dimittere. Cap: 8.

Considera: 1. SI nos irasci contingat, S iram subito deponendam, secundum Apostolum ad Eph: 4. Sol non occidat super iracundia vestra. Quemadmodum enim, ait S. P. N. Augustinus, acetum corrumpit vas, si diutius ibi fuerit, sic ira corrumpit cor, si in aliquo diem duraverit. Et alibi: si ergo irascaris, inquit, nè occidat sol iste in corde, super iracundiam tuam, ne forte & occidat tibi, sol justitiæ. Sanè, nullum opus tuum bonum, & Deo gratum erit, aut à Deo acceptabitur, quamdiù à proximo per iracundiam discordas. Ideo Christus Matth: 5. Si offers munus tuum ad altare, & ibi recordatus fueris, quod

quod frater tuus habet aliquid aduersum te, relinque ibi munus tuum ante altare, & vade prius reconciliari fratri tuo, & tu c. veniens offer munus tuum. Quæ causa tantæ festinationis? quia, respondet S. P. N. Serm: 16. de verb: Dom: Te quærit DEUS magis, quam munus tuum. Quam citissimè igitur excutiamus iram, & redeamus in amicitiam cum fratre. Ante omnia, mo et S. Bonaventura: Si perceperit se factò, vel verbò, aliquem, vel leviter offendisse, ante comestionem, vel somnum, eum humili student satisfactione placare, & in petitione veniæ prævenire, ne aliùs præveniens, de manibus eorum, humilitatis mercedem surripiat. Vide, quomodo hoc facere velis?

Considera: 2. Quâ mansuetudine Christus Dominus noster tot probra, vincula, verbera, & denique mortem ipsam ignominiosissimam pertulerit. In Cruce namque pendens, etiam pro suis Crucifixoribus oravit, & tacendo eorū nomina, eos excusans dixit *Pater ignosce illis*, non sine myterio, inquit S. Anselmus; quia, si eos nominare deberet, deberet dicere, *ignosce illis inimicis meis, crucifixori-*

fixoribus meis, hoc autem non patitur amor, qui inimicum nescit. Absit itaque à nobis, qui Christi discipuli esse volumus, aut fratrem inimicum habeamus, aut iram ei reservemus. Sanctus autem Bernard: Tract: de Pass: Cap: 8. act: Fecit Bonus Doctor, quod iusserat, orat non solum pro persequentibus, sed etiam occidentibus se, dicens: *Pater ignosce illis*, reconde in thesauro cordis tui. hoc verbum, ut quotiescunque sæviunt inimici, memoriam abundantiae servavitatis JESU, valeas eructare, hunc Clypeum contra inimicorum insultus opponens. Puto autem; sit is, qui nos disturbat, indignus, cui condonemus; cui beneficium rependamus, pro quo oremus; dignus tamen est Christus, Judex illius, & noster venturus, pro quo, id faciamus. *Concorda*, monet S. P. N. cum adversario tuo, nescis, quando vita finiat, cum vita finita fuerit, Judex restat, & minister, & carcer, at si servaveris adversario tuo bonam voluntatem, & cum eo consenseris, pro Judice invenies Patrem, pro ministro servo Angelum tollentem te in sinum Abrahamæ, pro Carcere Paradisum. Vide quomodo in hoc Christum sequi velis? Consi-

*Considera: 3. Dictum esse à Domino: Dimittite, & dimittetur vobis. Magna peccata, non dimittuntur nobis, nisi nos parva, in nos à fratre commissa, illi mansuetudinis desiderio condonemus. Optima negotiatio est, exiguo pretio rem admodum pretiosam cedere, appetenda industria est, parvo labore magnam dignitatem comparare, sed multo melius, atque pretiosius, iracundiæ cohibitione, & modicæ injuriæ condonatione, multorum peccatorum indulgentiam obtinere. Proinde, inquit S. Leo; memores infirmitatis nostræ, qui facile, in quælibet delicta prolabimur, hoc potissimum remedium, & istam efficacissimam vulnerum nostrorum curationem, nullatenus negligamus, Remittamus, ut remittatur nobis, demus veniam, quam rogamus, & non studeamus vindicare, qui nobis precamur ignosci; certè à vindicta non abstinet, qui interius, adversus Fratrem iram concipit, nam pars vindictæ est, animo in illum insurgere, vultu tristi, aut indignabundo respicere, & motum aliquem, aut verbum in ipsum contumeliæ proferre. Vide nunc, si DEUS infinita
illa*

illa Majestas, millesies duriora, à te quotidie patiatur, tibi que dimittat, an non tu parva, & pauca à proximo tuo pati, eique omnia ex corde dimittere debeas & velis?

CONSIDERATIO XXVII.

De Lingvæ custodia.

R E G U L A.

Vobis à Verbis durioribus parcite.

Cap: 8.

Considera: I. **N** Os lingvæ parcere, si illa sit Sancta, & de rebus pijs loquatur. Pretiosa lingua, ait S. Hieron: quæ nonnisi de divinis rebus novit verba construere, & Sanctum os, vnde cælestia eloquia proferuntur. Idem Apost: Ephes: 4. adhortatur: omnis sermo malus, ex ore vestro non prodeat, sed qui bonus est, ad ædificationem fidei, ut det gratiam audientibus. Hinc S. Jsid: disce, inquit, bene loqui, corde

corde, ore, & opere; Corde bene loquitur, qui charitatem non simulat, ore benè loquitur, qui alios benè docet, & mansuetè corripit, opere benè loquitur, qui alios bonis exemplis ædificat. Corde male loquitur, qui interiùs cogitationes noxias meditatur, ore malè loquitur, qui pro eo, quod malè agit flagellatur, & murmurat: opere malè loquitur, qui malè vivendo, exemplis suis alios ad prava agenda informat. Ideo Clemens Alex: 3. Strom: *qualis sermo, talis vita*. Et 2. Pedag: Cap: 5. *cum verba, ait à cogitatione promanent, non est arbor bona, quæ fructus malos facit, neque è contrario*. Pulchrè S. Climac: Grad: 26. sicut is, inquit, qui fert aromata, etiamsi nolit ex odore proditur, ita & qui Spiritum Dei habet, agnoscitur ex verbis suis. Hinc Sancti se Sanctos esse, Sanctis verbis manifestant, & etiam laceffiti linguam moderantur, quod in S. Michàele observat Apostolus Judas in sua Canonica dicens: *Cum Michàel Archangelus cum diabolo disputans altercaretur de Moyfis corpore, non ausus est Judicium inferre blasphemiae; sed*

sed dixit, imperet tibi Deus. Ubi videmus, Michæelem, tametsi contumeliosè, à diabolo laceffitum & cum eo contendente, non fuisse ausum maledicere, sed temperasse sermonem, & cum modestia, citra maledictum aliquod, in Judicium DEI totum negotium remisisse, dicens; Imperet tibi DEUS, hoc est, DEUS judicet, & refrænet petulantiam tuam. Qualem linguam tu habes?

Confidera: 2 Nos lingvæ parcere, si illa sit sancta, & simul discreta & amabilis, ne scilicet de rebus Divinis ineptè vel ad satietatem ac fastidium tractemus. Unde imprimis nos attendere oportet, de qua re ille, cum quo agimus libenter loquatur, & aliquamdiu in illa hæreamus: dicta illius & facta præsertim indifferentia, aut non manifestè mala, semper in meliorem partem interpretemur, & nunquam Judicium prodamus, quod alium, ex professo instruere intendamus: *Sicut vitta coccinea*, ait Divinus Sponsus Cant: 4. *labia tua, & eloquium tuum dulce.* Ubi septuaginta sic legunt; *Sicut funiculus coccineus labia tua.* Est enim propriè vitta funiculus

culus ille, seu filum vel redimiculu n, quo mulieris crines ligantur, ornatûs, & decoris, & honestatis gratiâ; labia ergo animæ iustæ, comparantur vittæ rubeæ (qui color ab ardore procedit, charitas verò ignis ardens est) quia Justus, in hoc speciatim se justum exhibet, quod iusta, & juxta Regulas charitatis circumspექtè loquatur, ita, ut nihil proferat ore, quod vel ad Dei honorem, vel proximi bonum non spectet. Sunt autem nonnulli, qui labia soluta gerunt, & quidquid in buccam venerit, facile effundunt; hi profectò vittam coccineam non habent in ore. Alter S. Job, qui de se ipso testatur Cap: 28. *Qui me audiebant, ait, expectabant sententiam meam, Verbis addere nihil audebant, & super illos stillabat eloquium meum, & expectabant me, sicut pluviam, & os suum aperiebant, quasi ad imbrem serotinum. Vide, qualis sit tua lingua?*

Consueta: 3. Nos lingvæ parcere, si illa sit innocua. Ideo sicut iaculator, priusquam bene collimet, sagittam non emittit, sic nos nullum verbum depromamus, antequam ponderemus, quor-

M

sum,

sum, & quò, lingua nostra itura sit. Hoc si observabimus, neminem unquam lædemus, simulque animam nostram, ab infinitis malis custodiemus: *Qui custodit os suum, & linguam suam*, ait Sapiens Prov: 21. *custodit animam suam ab angustijs*, à remorsu scilicet conscientiae, à litibus & rixis, à pœnis eas sequentibus; ab obligatione restituendæ famæ: ab ira Dei, & reatu gehennæ S. Basiliius L. de vera Virg: asserit: *Deum ideo nobis duas aures, unicam autem linguam tribuisse, ut nos doceret duplo aures, linguam excedere debere, ita, ut dimidium loqui debeamus, saltem eorum, quæ audimus. Id etiam, de oculis dicendum, non omnia quæ videmus, loqui debemus, sed dimidium, & sæpe nec verbum. Ideo etiam natura tot portas constituit lingvæ nostræ, primam labiorum, & quia hæc debilis videbatur, secundam dentium fortiolem adhibuit, ac si dicat: Custodite linguam, non semel claudite, & recludite illam &c. Imo quasi non sufficeret hoc, David Dominum rogavit Psal: 140. Pone Domine custodiam ori meo, & ostium circumstantiæ labijs meis. Ubi glossa quædam, Ostium di-*
cit

cit circumstantiæ, ad similitudinem illius, qui circumstat ostium, nè intret, vel exeat, cui non licet, & sic erit ostium continentię, & non ruinæ. Vide igitur, cum lingua adeò periculosa res sit, cui tot custodię naturæ vix sufficiant, quomodo ad eam regendam, operam, & gratiam Dei Spiritûs Sancti implorare debeas, & velis?

CONSIDERATIO XXVIII.

De Dilectione Fraternali.

R E G U L A.

*Non carnalis, sed spiritalis inter vos
debet esse dilectio. Cap: 8.*

*Considera: 1. Q*uid Christus Dominus noster de dilectione proximi dicat, Marc: 12. *Diligere proximum tanquam se ipsum, majus est omnibus holocaustis & sacrificijs. Atq; adeò, Deo gratius nihil nos facere posse, quàm diligere fratres nostros. Quam-*

obrem, ait Bernard: Memento Religioſe, quod veneris ad Religionem, ut eſſes negotiator, & pretioſas margaritas, virtutes, & bona Spiritualia quæres; nec contentus eſto, ſi bona inferiora inveneris, ſed ſumma quæque & excellentia perquire. Nil autem pretioſius invenies Unitate; non igitur parcas omnibus cæteris, propter eam obtinendam; ſed jejunijs, vigilijs, & orationibus, audacter præfer unitatem. Volo autem, ut in ea ſic maneat, non quaſi, unus ex omnibus, ſed quaſi cum omnibus unus. Latè expande ſinum, & ex omni genere piarum affectionum, claude intra viſcera tua, ut omnibus omnia ſias, & gaudere paratus, & compati, gaudere cum gaudentibus, flere cum flentibus, ut amorem, & unionem cum omnibus habeas, Spiritualem nimirum, non autem carnalem, ita, ut quos diligis, eorum tamen vitia non diligas, ſed odio habeas, ipſiſque minimè conſentias. Nunquam enim aliquem in tantum diligere debemus, ut propter illum, malum aliquod committamus, aut Regulam, licet minimam violemus, quia

DEUS

DEUS solus, super omnia diligendus est. Juxta illud: *Diliges Dominum Deum tuum, ex toto corde tuo, ex tota anima tua, & ex omnibus viribus, & ex tota mente tua; Et proximum sicut te ipsum.* Non autem diligis proximum, sicut te ipsum, ait S. P. N. si non ad id bonum, sed ad quod ipse tendis, adducis. Ideo alibi adhortatur: In Deo amate animas, & rapite ad eum vobiscum, quas potestis, & dicite eis: hunc amemus, state cum eo, & stabitis, requiescite in eo, & quieti eritis. Vide, num ita dilexeris?

Considera: 2. Ut nostra dilectio verè fit Spiritualis, nos proximum nostrum, diligere debere eo modo, quò eum Christus Dominus dilexit, nimirum ex altissimo motivo: Christus enim dilexit & diligit homines, quia DEUS Pater eos diligit, & quia ita eos diligi vult. *Hoc modo infinita, & æterna Dei erga homines charitas, inquit Joan: Weyer Soc: JESU est prima causa omnium, quæ Christus Dominus, in hoc mundo pro nobis egit, & passus est. Deinde procuravit nobis maximum bonum, scilicet, ut essemus in hac vita Filij Dei per gratiam, eam semper*
per

per bona opera augendo, & in futura per gloriam, sive per possessionem perfectam Dei, & omnium bonorum ejus. Insuper dilexit nos, quia nobis omnia postposuit, & propter nos ea dimisit. Nam propter nos egenus factus est, nec voluit possidere quidquam, quod vel caput posset reclinare; Dimisit etiam propter nos honorem, nam in hoc mundo; & permisit se extremè contemni, ignominias, gravissimas injurias, & lulibria pati voluit. Demum ipsam suam vitam, & sanguinem pro nobis cedit, ut nos in æternum viveremus; adeoque magis nos, ait S. Cyril: quam vitam suam dilexit. Vide, quomodo, ad Exemplum Christi diligere velis?

Considera: 3. Diligendo proximum, nos fore perfectos, quia testante Apostolo Gal: 5. omnis lex in uno sermone impletur: *Diliges proximum sicut te ipsum*, & ad Rō: 5. *Nemini quicquam debeatis, nisi ut invicem diligatis*, qui enim diligit proximum, legem implevit. Ideo Christus Dominus Joan: 15 *Hoc est Præceptum meum*, inquit, *ut diligatis invicem, sicut dilexi vos*. Hinc dilectus Christi discipulus Joannes, teste S. Hierony-

ronymo, semper in ore habuit: *Filioli mei, diligite alterutrum*, rationemque addens: *quia Præceptum Domini est, & si solum fiat, sufficit.* Ubi enim charitas, ibi nemo alteri invidet, nemo alterum offendit, ibi alter alterum fraternè corrigit, supportat, iuvat &c. ideo Apost: Ephes: 4. Obsecro vos ait, ut digne ambuletis vocatione, qua vocati estis, cum omni humilitate, & mansuetudine, cum patientia, supportantes invicem in charitate; Charitas enim patiens est, benigna est, non æmulatur, non agit perperam, non inflatur, non est ambitiosa, non quærit, quæ sua sunt, non irritatur, non cogitat malum, non gaudet super iniquitate, congaudet autem veritati, omnia suffert. 1. Cor: 13. Diligamus ergo nos invicem, *quia, qui alios diligit sicut debet*, ait S. Chrysost: Hom: 32. in Ep: 2. ad Cor: *ita vivit in terra, quasi esset in celo*, semper gaudens summa tranquillitate, in hoc enim bono charitatis, omnia bona habet, & per eam innumeras obtinet victorias, & coronas, & inæstimabiles thesauros pacis. De qua pulchrè S. P. N. O! Pax inquit,

tu

tu animi tranquillitas, amoris vinculum,
 Charitatis consortium. Hæc est illa sum-
 ma felicitas, quæ jurgia tollit, iras com-
 primit, cunctis placet, à cunctis optatur.
 O Pax, tu nescis extolli, ignoras inflari:
 Beatus, qui te habet, maledictus, qui te
 odit, & qui te impedit, & frangit, inter
 homines quodammodo Antichristus est, &
 filius perditionis. O Pax qui te habet, te-
 neat, & qui te non habet, perquirat, qui
 te perdidit, requirat, si Filius Dei esse
 præoptat. O Pax, tale bonum, & in re-
 bus cunctis, tam mirificum, tam gloriosum,
 quo nihil dulcius solet auliri, nihil dele-
 tabilius concupisci, nihil possideri; Spiri-
 tus enim Sanctus, nunquam nos vivificat,
 nisi fuerimus pace uniti. Qui pacem cor-
 dis, operis, oris non habet, Christianus non
 debet dici. Nunquam sine pace, Orationes
 jejunia, Eleemosynæ, cæteraque bona, pro-
 desse possunt, hæc S. Augustinus. Vide
 ergo, quomodo hanc Regulam observa-
 re debeas, & velis?



CON.

CONSIDERATIO XXIX.

De Obedientia.

R E G U L A.

Præposito, tanquam Patri Obediatur.

Cap: 9.

Considera: 1. **O**bedientiæ perfectionem desumi principaliter ex fine, cùm quis obtemperat Superiori, sicut Domino, juxta illud Ephes: 6. inquantum scilicet Superior inquit Vinc: Caraffa de Observ: Vot: Cap: 5. repræsentat Christum, cujus Vicarius est. Obedientia ergo, inquantum est virtus Religiosa, obedit præcepto Superioris, ut præcepto, & ordinationi Dei; ut igitur acquiratur perfectio obedientiæ Religiosæ, voluntatem Dei, veluti finem ultimum, semper respiciamus oportet, obediamusque voluntati Superioris, inquantum repræsentat imaginatum, & quemadmodum idem est motus, in imaginem & imaginatum: siquidem cultu Latriæ respectivo, & minùs principali adora-

adoratur imago Crucifixi, sicut eodem cultu Patriæ absoluto & principali adoratur Christus Crucifixus, ita eadem, quæ Deo, Superiori, in quantum est Vicarius DEI, debetur obedientia, juxta D. Bernardi dictum: *Pari obedientia deferendum, siue DEUS siue homo Vicarius Dei, mandata quæcunque tradiderit.* Et Serm: de obed: ait: *Fidelis Obediens nescit moras, mandatum non procrastinat, sed parat aures auditui, linguam voci, manus operi, pedes itineri, & sic totum se intra se colligit, ut mandatum peragat imperantis.* Sanctus verò Ignatius Lajola Constit: p. 6. cap: 1. §. 1. ad signum inquit Campanæ, & Superioris vocem, perinde ac si, à Christo Domino egrederetur, quam promptissimi simus; re quavis, atque adeo literâ à nobis inchoata, necdum perfectâ, relietâ. Idque non solum in obigatorijs, sed etiam in alijs, licet nihil aliud, quàm signum voluntatis Superioris, sine ullo expresso præcepto videtur. Et hoc integre, promptè, fortiter, & cum humilitate debita, sine excusationibus, & obmurmurationibus, licet difficilia, & secundum sensualitatem, repugnan-

pugnantia jubeantur. Vide, an talis fuerit tua obedientia.

Considera: 2. Obedientiam Religiosam principaliter fundatam esse, non in cognitione sensus, vel rationis naturalis, sed in consideratione fidei, secundum rationes æternas; *siquidem principalis Superior, inquit, cit: Vinc: qui præcepit, DEUS est, & propter altissimum nostræ prædestinationis finem, certissimum est, nos nescire, quænam salutis nostræ sit media, eaque nobis prorsus esse incognita, solum DEUS uti prædestinare potest, ita solum ea cognoscit, & Religiosis proponit, non per aliam, nisi per obedientiæ viam. Ergo quasi cæci, absque ulteriori discursu, per viam à Superiore nobis indigtatam ambulemus, illud suscipiamus exercitium, officium, & onus, quod nobis imponit obedientia, & securi erimus. Hæc enim securissimo tramite, nos per tres vias, ad ipsum apicem perfectionis, & ad æternam gloriam perducet Per viam purgativam nos ducit, inquit Tob: Loh: Soc: JESU: quia obediens loquetur victorias Prov: 21. contra dæmonem, qui nos per solas nostras voluntas.*

luntates proprias impugnat. Ideo S. Gregorius: Cæteris virtutibus dæmones impugnamus, obedientiâ vincimus. Contra carnem. Ideo Thom: Kemp: *Disce, inquit, celeriter Superiori tuo te submittere, si carnem propriam optas subjungere. Contra quascunque difficultates, & tentationes, quia obedienti perinde, ut diligenti omnia cooperantur in bonum.* Deinde ducit per illuminativam. Hæc enim in nobis summa, & sola virtus est obedientia, ait S.P.N. Augustinus Tract: 11. de Obed: & humil: *Si jejunaveris diebus, ac noctibus orationemque feceris, si in sacco fueris, vel cinere, si nihil aliud feceris, nisi quodcunque præceptum est in lege, & tibi visus fueris, quasi sapiens; & obediens Patri non fueris, omnes virtutes perdidisti.* Una obedientia plus valet, quam omnes virtutes, quia melior est obedientia, quam victimæ. Denique ducit per viam unitivam, quia proprium est obedientiæ, voluntatem obedientis, cum voluntate Dei, quem in Persona Superioris intuetur, unire. Vide nunc, quomodo obedientiam amare, & amplexari velis?

Consi-

Considera: 3. In obediendo, speculi loco, nobis inservire, obedientiam Christi. 1. Anima SS. Christi, per scientiam suam beatam, & infusam, semper Divinam spectabat voluntatem, & in illa decreta divina, quibûs perfectè se conformabat. 2. Obedientia Christi fuit continua, & intensa usque ad mortem, quam etiam propter obedientiam sustinuit. 3. Fuit obedientia perfectissimi instar holocausti; obedivit enim cunctis animæ potentijs, executiva, volitiva, intellectiva. 4. Tria motiva in particulari habuit Christus, in obediendo Patri, primum fuit obedientiæ: *Sicut mandatum dedit mihi Pater, sic facio.* Secundum fuit amoris Proximi: *pro eis me sanctifico*, id est sacrifico. Tertium fuit Charitatis Dei: *Quæ placita sunt ei facio semper.* Ad eundem modum, oculis mentis nostræ semper observari debet voluntas Divina, in voluntate Superioris repræsentata, & in ea, Divinas perlegamus ordinationes, iisdem nos conformando. 2. In omnibus, etiam difficilibus obediamus. 3. Cunctis animæ potentijs, non executiva duntaxat, sed

sed etiam voluntate, & intellectu. 4. Obediamus propter motivum obedientiæ, Charitatis Dei, & proximi. Ideæ loco sint nobis, etiam SS. Angeli qui Divinam adimplent voluntatem, imprimis promptissimò animò, alacrè voluntate, & velocissimâ celeritate. Deinde sine discrimine, & repugnantia ulla, quod DEUS imperat, executioni mandant, si vè gravia, & difficilia sunt, si vè humilia & abjecta, ac Majestati Angelicæ minus congruentia. De primo exemplum habemus. 4. Reg: 19. ubi jussu Domini descendit quidem Angelus de cælo in Castra Assyriorum, & occidit una nocte, centum octoginta quinque millia. Non hoc quidem fuit difficile, Angelicæ Potentiæ, sed voluntati per se considerando: nam Angelus Sanctus, hominum amator est, quare gravissimum illi secundum se fuit tot homines simul interficere, & ad infernum mittere, nihilominus tamen, libentissimò animò, & citissimâ executione, DEI nutui obedivit. Ita etiam, quantumvis grave quid nobis imperabitur, citissimè tamen nobis obediendum erit.

De

De secundo exemplum optimum habemus, in Raphaële Angelo, licet unus esset ex primoribus Seraphinis, nihilominus tamen, Tobia Juniori pauperi, & captivo Comes Juvenis fuit, non quidem Angelico apparatu, sed humano, & loco famuli, eum duxit, & reduxit, & parebat, ac ministrabat ei; quia sic à Deo sibi fuerat præceptum, neque questus est, se ita tot diebus, humili ministerio addictum fuisse. Sic nos quoque Deo, in Superiore parere debemus, ut quantumvis abjecta præcipiat, sine ulla contradictione obediamus, & honori proprio, non verò obedientiæ cedamus. Vide quomodo imitari velis ?



CONSIDERATIO XXX.

De Honore & Reverentia,
erga Superiores.

R E G U L A.

*Honori coram vobis Prælatus sit
vobis. Cap: 9.*

Considera: 1. **N**Os Prælatos & Superiores, semper honore magno & reverentia prosequi debere, quia reverentia Prælationi debetur, eo ipso, quod dignitatem habet super alios, & participatio quædam est Divinæ potestatis, juxta illud Apostoli Rom: 13. *Omnis anima potestatibus sublimioribus subdita sit:* non enim est potestas, nisi à DEO, quæ autem sunt, à DEO ordinata sunt. Itaque, qui resistit potestati, Dei ordinationi resistit, qui autem resistunt, ipsi sibi damnationem acquirunt. Sicut enim honor, & obedientia Superioribus exhibita, ita & omnis irreverentia, & inobedientia, in ipsum DEUM Supremum Auctorem redundat,
quia

quia ipse dicit Luc: 10. *Qui vos audit, me audit, & qui vos spernit, me spernit.* Ideo DEUS ad Samuelem ait 1. Reg: 18. *Non te abjecerunt, sed me, nè regnem super eos.* Hinc monet Ecclesiasticus, ut omni affectu honore, & obsequio Prælatos & Superiores prosequamur, dicens Cap: 10. *In medio Fratrum, Rector illorum in honore;* & quidem, ut Apostolus scribit. 1. ad Tim: 5. *Qui bene præsunt Presbyteri,* duplici honore digni sunt, in quibus nimirum honorem meretur, & virtus propria, & gradus dignitatis. Hunc autem honorem, & reverentiam, docet Jac: Alvar: Soc: Jesu, interius, exteriusque præstabimus. Interius quidem, si Prælatos majores agnoscas, si dignos honore judices; si eis te, animo, ac voluntate submittas: Exterius verò, si illis consveta signa reverentiæ, & subjectionis exhibeas; si aperto capite, dimissis oculis, demissa voce, & paucis verbis, illos alloquaris; si coram illis nihil frivolum, aut levitatem præferens dicas aut facias; si absentes honorificè nomines, & ad honorem tuum spectare putes, si Prælatos tuos venereris,

ris, quos Christi loco habes, & in quibus, ipsum Christum agnoscis. Vide num te ita habeas?

Considera: 2. Prælatos & Superiores, cum magna reverentia tractandos, nec eorum mores, aut vitam taxandam esse, quia cum Dei locum teneant, ejusque personam referant; ipse sibi injuriam irrogatam deputat, quam in Prælatos factam considerat: *Dix non detrahes*, inquit Moyses Exod: 22. & *Principi populi tui, non maledices*. Deos vocat Prælatos, ac Principes Populi, ut in illis Deum consideremus, & injuriam illorum, DEI esse injuriam sciamus. Quamobrem esto, Prælatus, & Superior, suis laboret defectibus, & idè minùs videatur dignus, quem observantia & veneratione multà afficiamus; nihilominus, quia potestate DEI vicarià gaudet, & assumptus est in ministerium, vicem Numinis sustinentem, si non merita propria, certè officij dignitas exigit deferri ei honorè. *Etsi*, inquit, Bernardus, *manifestè innotuerit, indigna Prælati ac cuius vita, propter eum tamen, à quo est omnis potestas, excelsum reputare debemus,*
non

non presentibus personæ meritis, sed Ordinationi Divinæ & dignitati ipsius officij deferentes. Hinc ipse Filius DEI Ap: cap: 1. Episcopos, quamvis imperfectos nominari voluit Stellas, & Angelos: ut benè observat Rupertus Abb: dum ait: Ecclesiarum Præsules, quamvis aliqui pro vita propria, reprehensibiles sint, & Angelos, & Stellas appellare maluit &c. Et rectè quidem, quia Sacerdotes sive Præsides, quamvis interdum, pro suis actibus sint obscuri, pro officio tamen lucent &c. Pari sententiâ cum suis Alumnis ratio- cinabatur B. P. Dam: Opusc; 13. Cap: 30. Nolite, inquit, de Priorum vestro- rum, perperam fortè viventium, meritis disputare, & non quâ gradientur viâ, sed cujus vice fungantur, attendentes, il- lis in Christo obedite. Hæc una sit amus- sis, ad quam componatur vestrum pa- rendi studium, & reverentiæ affectus. Unde oportet nos esse mutos erga de- fectus Superiorum, eosque dissimulare. Prælati enim homo est, inquit Jac: Al- var: Non Angelus, non igitur faciamus miraculum, aut portento simile, si aliquos in se defectus, necdum emendaverit. Ipse

sustinet patienter nostros defectus, quàm plurimos, quid multum, si nos pauculos defectus Prælati sustineamus? et si Patris, qui nos carnaliter genuit, culpas ac defectus celemus, & excusemus, cur non potiori ratione, Patris Spiritualis defectus, & abscondamus, & excusemus? In omni opere & sermone, & patientia honora, id est (sustine) Patrem tuum, monet Eccl: 3. ut superveniat tibi benedictio ab eo, & Benedictio illius in novissimo maneat: & rursus: ne glorieris, inquit in contumelia Patris tui, non enim est tibi gloria, ejus confusio; gloria enim hominis ex honore Patris sui, & dedecus Filij, Pater sine honore. Vide quomodo in hoc te habeas?

Confidera: 3. Nos Prælatos & Superiores nostro revereri; eorumque minimos nutus & cæcâ, & humili obedientiâ exequi debere, quia nos firmissimè tenere oportet Prælatum & Superiorem, quem quis habet, à DEO sibi prædestinatum esse, & quidquid ipse præceperit, Dei præceptum esse. Certò tibi persvade, agebat quidam pius Pater. apud Blosum, ipsum Dominum DEUM tuum, suâ æternâ sapientiâ ac bonitate illos

illos Prælatos, quos habes in eo, quem ingressus es, statu, tibi prædestinasse, & providisse, ac per eos potius, quàm per alios, suam gratiam, tibi præstare velle. Quare honora Superiorem tuum, eique in omnibus obedi propter Deum, cui placuit eum cooperatorem habere, in animæ tuæ sanctificatione, regimine, & profectioe ad vitam æternam. Sanè quantumvis Superiores nostros honoremus, & in eorum gratiam, & pro eis faciamus, nihil tamen eis æquale rependimus, quia ipsi solliciti sunt de salute nostra, gravemquè rationem Domino DEO reddere debent pro animabus nostris, quâ propter adhortatur nos Apostolus Hebr: 13. *Obedite Præpositis vestris, & subjacete eis*, quod ita explicat S. Thomas de Villa-nova: *Revereamur Fratres, Prælatos, & honoremus, & obediamus illis, molestum non sit colla subdere ijs, reverentiam præstare, qui unice procurare satagunt æternam nostram salutem. Ipsi enim pervigilant, quasi rationem pro animabus nostris reddituri, ut cum gaudio hoc faciant, & non gementes. Sin verò miser Prælatas vilipensus, ingemiscet ad-*
ver-

versus te ad Deum, inquit Theophilactus pro certo teneas, quod maiorem pænæ ac supplicij pyram accendit, acrius vindicem, ac punitorem Deum promovens. Justæ illius querelæ cælum penetrabunt, & ultrices flammæ in caput tuum consciscunt. Idcirco, quotquot fuere in Ecclesia illustres animæ, verò DEI Spiritu imbutæ, in omnibus semper, & ubique suis Superioribus habuerunt reverentiam, eisque in omnibus, unicô peccatô excepto, obedierunt. Vide, quomodo hanc Regulam observes?

CONSIDERATIO XXXI.

De Observatione Regulæ.

R E G U L A.

Donet Dominus, ut observetis hæc omnia, cum dilectione, tanquam Spiritualis pulchritudinis amatores, & bono Christi odore, de bona conversatione fragrantés. Cap: 10.

*Confidera: 1. Q*Uod omnem nostram diligentiam adhibere debeat.

debeamus ad Regulam, secundum quam,
vivere decrevimus, perfectè servandam,
ostendit S. P. N. dum in hoc ultimo
Regulæ suæ capite vult, ut singulîs se-
ptimanîs, nè aliquid negligamus, nobis
legatur, ut scilicet in ea, tanquam in
speculo, nos inspiciamus, an in faciè ani-
mæ nostræ simus fædi vel pulchri. Nam
si Regulæ, in quibus omnis nostra per-
fectio, & decor consistit, exactè obser-
ventur, anima nostra coram Deo pul-
chra comparet, ut quæ, ita vivendo se
Supremæ Regulæ, & idæ omnis perfe-
ctionis, videlicet rationi, & voluntati
Divinæ undequaquè conformem reddi-
dit, quia Regulæ sunt voluntas DEI,
quam in omnibus sequi obligamur. S.
Franciscus Sales: de am: Dei Libr: 8.
Cap: 3. *DEUS*, inquit, *desiderans, ut su-*
am voluntatem significatam (per Regu-
lam) sequamur, nos monet, sollicitat, in-
citat, inspirat: sinit tamen ut resistamus.
Idem Sanctus ait, *DEUM* facere in si-
gnificata hac voluntate nobiscum id, quod
amicus cum amico, ad convivium invita-
to, qui desiderat quidem, ut ille lautè ha-
beat, & appositis vescatur, & amanter
horta-

hortatur, ut comedat, non tamen vi aperit os amici, & cibum ingerit. Sic DEUS desiderat significatam suam in Regularis voluntatem observari, non tamen cogit. Petamus ergo lumen, quò practicè cognoscamus, omnem nostram perfectionem, in ipsa Regularum observatione consistere, judicemusque, quod verissimum est, hoc esse unicum, & summum negotium, quod tota vitâ in Religione agendum, & extra illud, omnia parvi prorsus momenti esse, ac parum omninò nobis prodesse, imo communiter obesse, nisi omnes Regulas accuratè servemus, & quidem ut loquitur S. Pater N. *Non sicut servi sub lege, sed sicut liberi sub gratia constituti*, nimirum: ex altissimo motivo charitatis Dei. Firmissimè etiam teneamus, monet Joan: Weyer Soc: JESU, quamlibet observationem Regulae, etiam minimæ esse ascensum ad novam, & majore justificationem ac sanctitatem, esse efficacem petitionem novæ gratiæ, & directionis divinæ, novam DEO complacentiam, negotiationem prudentem, & efficacem salutis & perfectionis propriæ & proximorum, quare
ad

ad omne id, quod loquitur nobis Regula vel obedientia, dicamus: vox dilecti mei, qui vult me altius ad se ducere, his vinculis aureis, divinæ suæ charitatis. Vide, quomodo hucusque Regulas observaveris, aut certe deinceps observare velis, ut sis vir secundum cor DEI, qui facit omnes voluntates ejus.

Confidera: 2. Religionem non habere majorem, & magis noxium inimicum, quam transgressorem, etiam unius Regulæ, quia talis impedit favorem, & benedictionem Domini, facitque quantum in se, ut DEUS subtrahat illi suam beneficam manum, adjuvantem, & dirigentem, sine qua paulatim deficit, & in interitum labitur. Equidem Religio vinea est Domini, eam sepivit DEUS legibus & præceptis, transgressor Regulæ, illam sepem destruit, ut detur in conculationem, & direptionem. Religio est acies bene ordinata, illius arma sunt Regulæ, & earum perfecta observatio, quibus hæc cæli militia, gloriosas pro gloria DEI, & salute animarum, solet obtinere victorias; hæc arma obtundit, eripit, & abijcit, qui Regulas transgreditur

ditur. Religio est hortus DEI, quem tanto labore coluit, & tanto suo sudore, & lachrymis irrigavit S. Fundator: hunc hortum devastat, destruit, & conculcat transgressor Regulæ, è contra Religiosus, qui Regulas diligenter servat, est columna, fundamentum, & ornamentum Religionis, ait Joan: Weyer Soc: JESU ob quem dat DEUS suas benedictiones, & alios supportat, ut emendentur, & resipiscant. Unde nemo miretur, si à zelosis Superioribus, transgressor Regulæ corrigatur, & puniatur; ipsis enim ex officio incumbit providere, ut Regulæ, in vigore, & flore suo permaneant. Quò circa, inquit Rodriquez Soc: JESU, dum te Superior, re, vel verbis castigat, non ideo facit, quod malè erga te sit animatus, vel minoris te faciat (novit siquidem nos homines esse, nec tanti esse unam, vel alteram Regulam transilire) sed, ut officio satisfaciat, quod eum obligat, & Regularum integritati consulere, & ut in vigore primo mancant, advigilare. Atque hoc esse discrimen, ait S. Bonaventura, inter Religiones observantiæ primæ servantes, ac benè formatas, & alias dissolutas, rela-

relaxatasque, non quod in his parcat, in illis minimè (hoc namque prorsus fieri nequit, quia in multis offendimus omnes) sed quod in observantibus, & benè formatis, Regulam infringens castigetur, & repelenatur, in dissolutis conniveatur. Et hoc ipsum est, quod vult S. P. N. dum cap: 9. præcipit dicens: Ut ergo cuncta ista servantur, etsi quid minus servatum fuerit, non negligenter prætereatur, sed ut emendandum, corrigendumque curetur, ad Præpositum præcipuè pertinebit &c. Et tandem Regulam suam sic concludit: Et ubi vos inveneritis, ea quæ scripta sunt, facientes; agite gratias Domino, bonorum omnium largitori: ubi autem sibi quicumque vestrum, videt aliquid decesse, doleat de præterito, caveat de futuro, orans, ut & debitum dimittatur, & in tentatione non inducatur. Vide an, & quomodo hæc observaveris, aut certe imposterum observare velis?

Considera: 3. Cùm observatio Regularum non sit gravis, quare nonnulli tantas sentiant difficultates? quia nimirum, neque fortiter, neque integrè eas observare proponimus, & ideo à modi-

ca difficultate victi, persuademus nobis, id non posse à nobis præstari, commodis enim nostris nimis sumus affixi, ideo non habemus robusta proposita, & firmas resolutiones, perfectionem assequendi. Abbas Abraham apud Cass: in Collat: de Mortif: dat rationem ex Eccles: Cap: 10. *Labor stultorum affligit eos, qui non noverunt ire ad Civitatem.* Sunt enim nonnulli, inquit, qui itinere non trito ad cælestem civitatem ire volunt, quærunt juxta suas adinventiones vias asperas spinis obsitas, peregrinas, relictâ viâ planâ, & rectâ Regularum, quam Dominus ostendit, paravit, munivit, & facilem reddidit. Hi autem nihil se agere putant, nisi magnas, & extraordinarias assumant pænitentias, vigiliis, jejunia, quæ etsi cum directione Patris Spiritualis, bona sint, & laude digna, tamen illa cum mærore & tristitia explent, tetrici sunt, nec hilares in obsequio DEI, & ideò etiam, onus illud portare, diù non possunt, itaque tandem omnia ex tædio relinquunt, ut nè ordinaria pietatis exercitia obeant. Tales verè sunt sine intellectu, neque nove-
runt

runt ascendere ad perfectionem, & ire in civitatem cælestem Jerusalem. E contra, qui magnanimi sunt, & difficilia, & amara, quæ occurrunt, generosè superant, & devorant, illi aliter loquuntur, quam dulcia faucibus meis eloquia tua, super mel ori meo. Tu ergo si sapias, ambula in via Regularum, firmiterque crede, ac tibi persuade, te DEO, nullo exercitio magis placere, quam si in observandis Regulis sis fidelis, ut etiam alij, qui vident te in observantia Regularum esse exactissimum, bonum ædificationis, & imitationis exemplum accipiant, Deumque in te laudent & glorificent, gaudentes, quod aliquem invenerint, quem volebant, expectabantque, qui sibi hic, ductum præstaret. Vide igitur, quomodo Regulas, & Religionis jussa, magnificare, ac in pretio habere, exactissimèque observare velis!

Esto fidelis usque ad mortem & dabo tibi coronam vitæ *Apoc: Cap: 2. 10.*

Cum feceritis omnia quæ præcepta sunt vobis, dicite, servi inutiles sumus. Quod debuimus facere, fecimus. *Luc:*

17. 7. 10.

CON-

CONSIDERATIO XXXII.

Eaquè Ultima.

Ex auctario exhortationum ad Religiosos, R. P. Joan: Dirkink Soc: JESU, in Festo S. P. N. Augustini.

Exemplô S. Augustini, anima Religiosa, serum suum, erga DEUM deplorat amorem.

*Serò te amavi, pulchritudo tam antiqua
pulchritudo tam nova, in Soliloqu.*

Cap: 31.

SI in Sanctos, DEUM in cælesti gloria perpetuo facie ad faciem contemplantés, dolor quispiam cadere posset; eò vel maximè tangerentur dolore, quod vel momentum vitæ suæ mortalis, absque DEI, tam amabilis, tam pulchri tam boni amore prætermisissent. Ita Sancti in hac vita, mentis oculos aperiéntes, cæcitatemque priorem agnoscéntes; Deique bonitatem clariùs intuentes, dolént, ac deplorant, tot vitæ suæ dies, menses, & annos, absque DEI sui, adeo boni

boni, ac pulchri amore, esse præterlapsos. Ex his fuit Magnus Pater Augustinus, unicè deplorans, quod omnes annos, usque ad annum ætatis suæ trigessimum tertium, malè impendens, DEUM non amaverit: *Serò te amavi*, exclamat, *pulchritudo tam antiqua, pulchritudo tam nova: serò te amavi, vae tempori illi, quando non amavi te.* 1. Non amavi te in infantia, quando defectu usus rationis, quemadmodum & alij infantes, amare te non poteram: *Tu Domine*, loquitur DEO Libr: 1. Confess: Cap: 7. *DEUS meus dedisti vitam infanti, & corpus, quod instruxisti sensibus, compegisti membris, figurâ decorâsti: Sed hanc ætatem, quâ me vixisse non memini, piget annumerare, huic vitæ meæ, quâ ego vivo in hoc sæculo, nam & in iniquitate conceptus sum, & in peccatis me Mater meâ aluit in utero.* Hoc ergo tempore, (totò septenniò) non amavi te, quia non cognovi te. 2. Non amavi te in pueritia, à septennio ad quartum decimum ætatis meæ annum, *ab infantia*, inquit Libr: 1. Conf: cap: 8. & 9. *DEUS DEUS meus, quas ibi misérias, expertus*

pertus sum, & ludificationes! ad Scholas
 datus sum, ut discerem literas, quibus,
 quid utilitatis esset, ignorabam miser, &
 tamen, si segnis in discendo essem, vapu-
 labam, & peccabamus minus scribendo,
 aut legendo, aut cogitando de literis, quam
 exigebatur à nobis, & delectabar ludere.
 Atque ita amore lusus, & literarum
 odio, instar pueri me gessi, te parum
 amavi, quia parum cognovi. 3. Serò te
 amavi, quia tam in adolescentia, quam
 juventute mea, te non amavi. Illo enim
 tempore, quid me delectabat, nisi amare,
 & amari. Et concupiscentia carnis obnu-
 bilabat, & obfuscabat cor meum, & rapie-
 bat imbecillem ætatem, per abrupta cupi-
 ditatum & mersabat in gurgite flagitio-
 rum. Et quando postmodum, cæpi
 habere, nonnullam DEI, cognitionem,
 illum timere quidem cæpi, sed nondum,
 perfectâ dilectione complecti: nec me re-
 vocabat, Libr: 7. Confes: Cap: 16. à
 profundiore voluptatum carnalium gurgi-
 te, nisi metus mortis, & futuri judicii
 tui. Ac proinde eò tempore, te non-
 dum dilexi. 4. Serò te amavi, quia se-
 rò te cognovi, donec tandem, circa
 trice-

tricesimum ætatis meæ annum, post pi-
um cum Alipio intimo meo colloqui-
um habitum, in lachrymas solutus sum,
& ut liberius lachrymas funderem; ab
eo secessu, sub arbore ficûs stravi me:
*Ubi dimisi habenas lachrymis, & prorape-
runt flumina oculorum meorum: jactaba-
mus voces; quamdiu cras, & cras, quare
non modo, quare non hâc horâ finis turpi-
tudinis meæ? dicebam hæc & flebam, ama-
rissima contritione cordis mei. Et ecce,
audio vocem, de vicina domo, cum cantico
dicentis, & metu replentis; Tolle lege,
tolle lege, quo audito, represso impetu la-
chrymarum, surrexi, & concitus redij ad
eum locum, ubi sedebat Alipius, ibi enim
posueram codicem Apostoli, cum inde surre-
xeram, arripui, aperui, & legi in silentio
capitulum, quâ primum conjecti sunt ocu-
li mei. Rom: 13. Non in commessa-
tionibus, & ebrietatibus, non in cubili-
bus. & impudicijs, non in contentio-
ne, sed induite Dominum JESUM Chri-
stum: Nec ultra volui legere: nec opus erat:
statim enim cum fine hujus sententiæ, qua-
si luce serenitatis infusâ, omnes cordis mei
tenebræ diffugerunt: Et dixi, dirupisti
O vincu-*

vincula mea. Et novam, accedente etiam B. Ambrosij instructione, vitam auspiciatus sum, & sic in dies, magis magisque, cæpi divinò amore inardescere. Hæc est lamentatio S. P. N. Augustini dolentis, & deplorantis, totâ vitâ usque ad Annum 76. protractâ, quod primos 33. Annos, amorî divino non impenderit, exclamantis; *Serò te amavi pulchritudo tam antiqua, pulchritudo tam nova, serò te amavi.* Et mox veluti damnans, & detestans hanc vitam, subdit: *Væ tempori illi, quò non amavi te.*

Examinemus nunc quoque vitam nostram, & clarè perspiciemus, nos eadem verba ingeminare posse, *Serò te amavi.* Non enim amavimus Deum in infantia, qui eam in nugis puerilibus, in lusu, inobedientia, iracundia, vanitate transigimus. Si juventutem nostram expendamus, quot vitijs, & peccatis, quot cupiditatibus, & vanitatibus, illam traduximus, quando cum ætate semper crevit malitia. Consideremus reliquâ ætatem, usque ad hodiernum diem; an non exclamare cum S. P. N. Augustino possumus: *Serò te amavi pulchritudo tam anti-*

antiqua; pulchritudo tam nova, serò te amavi.

Sed quid remedij? non aliud; nisi ut cum eodem S. P. N. dolerem concipiamus, & desiderijs actibusque ferventioribus, compensemus damnum.

O DEUS meus! pulchritudo summa, omne bonum meum! o si te amare potuissem, primò vitæ meæ momento, quo à te corpus, & animam obtinui! o si te amare potuissem, illâ horâ, quâ sacrâ Baptismi lymphâ tinctus, & ab originali macula ablutus sum! o si te amare cepissem saltem septimo ætatis anno, quò usu rationis, à te dotatus sum! o si te amassem! toto juventutis meæ tempore, & loco scelerum, & affectuum pravorum, in ardentissimos amoris actus erupissem! O si saltem seriò auspicatus essem, dum Ordinem Religiosum ingressus sum, verum cum id neglexerim: *Serò te amavi*, doleo, negligentiam damno, & omni meliore modo, cum gratia tua compensare allaborabo.

Serò itaque te amavi, i. Te Patrem ingenum, Te Filium unigenitum, Te

Spiritum Sanctum Paracletum, Te Sanctum & individuum Trinitatem, in medit: Cap: 11. omni omnium mortalium, & Angelorum amore longè dignissimam: Serò amavi. 2. Te DEUS piè, DEUS bone, DEUS æterne, DEUS omnipotens, DEUS ineffabilis, DEUS immortalis. DEUS incircumscriptæ naturæ, DEUS institutor rerum omnium, Principium, & finis, Alpha & omega, in medit: Cap: 7. Conditor & Auctor meus: Serò te amavi. 3. Te DEUM meum, sine deformitate perfectum, sine quantitate magnum, sine qualitate bonum, sine tempore sempiternum, sine morte vitam, sine infirmitate fortem, sine mendacio verum, sine situ, ubique præsentem, sine loco, ubique totum, sine extensione, omnia implentem, in magnitudine infinitum, in virtute omnipotentem, in bonitate summum, in sapientiâ inæstimabilem. Medit: Cap: 12. Te talem ac tantum, ah, Serò amavi!

Te pulchritudo tam antiqua, Sol: 31. Pulchritudo æterna, quæ ab æterno flouit, & in æternum florebit, nec unquam marcescet. O me cæcum, & stolidum! qui terrenam, brevẽ, & evanidam mortal-
talis

talis cujusdam pulchritudinem dilexi, quæ instar floris citò evanescit, instar cadaveris brevi putrescit, instar auræ, mox mutatur, & levî morbô contabescit, & te pulchritudo tam antiqua, tam longa, tot annorum. millionibus perennans: *serò amavi.*

Te pulchritudo tam nova. Quæ non, ut in hominibus accidit, veterascit, sed veluti sol, semper manet nova; quam quoties in hac vita consideramus, semper novas, & novas pulchritudines invenimus. *Pulchritudo tam nova*, tam recens, ut licèt beati homines, & Angeli, Cherubini, ac Seraphini totò æternitate aspiciant, nova, & nova sine fine intueantur. *Tam nova*, ut post millenas annorum myriades, tam recens, atque nova Beatis videatur, ac si hodie, primum intuitum cospicarentur. *Tam nova*, tam admiranda, tam amabilis, atque desiderabilis, ut nunquam totâ æternitate, ejus aspectu sint satiandi. Et ego, o pulchritudo, tam nova! tam admirabilis! *tam serò ac segniter amavi!*

Te pulchritudo, tam antiqua, tam nova. In qua, quidquid pulchritudinis est
in

in Sole, luna, & stellis, in auro, ac metallis, in smaragdo, adamante, & gemmis; quidquid pulchritudinis invenitur in rosis, lilijs, & floribus, in hortis, herbis & plantis, quidquid pulchritudinis, cernitur in Bestijs terræ, in piscibus maris, & volatilibus cæli; Denique quidquid pulchritudinis elucet, in hominibus, in Angelis, Cherubinis, & Seraphinis, & cunctis speciosissimis, & gloriosissimis Cæli incolis, perfectissimo, & eminentissimo modo continetur. Et ego serò te amavi! Te bonum, sine quo nihil bonum; in quo omne bonum. Soli loq: Cap: 1.

Sed nunc, quam doleo, tot horas, dies, tot menses, tot annos, absque tui amore effluxisse! Non erit sic deinceps, sed diligam te fortitudo mea, diligam te pulchritudo mea, diligam te o bonum super omne bonum, o pulchrum super omne pulchrum, ex totis viribus meis, & ex intimis medullis meis.

Serò te amavi, quia non cognovi.
1. Non amavi: amare enim, est bene alicui velle; Per amorem conjungimur DEO, ait in Manual Cap: 8. O quam serò

serò cæpi bene velle tibi! quamdiù contra voluntatem tuam mihi bene volui, non curans, utrum tibi esset malè! id toties feci, quoties peccatum admittendo te offendi. 2. Amare, est aliquem magni æstimare. O mi DEUS, quam parvi te feci! Dum toties voluptatem momentaneam, aut vilem Creaturam tibi, omnis boni inexhausto fonti, prætuli. 3. Amare est laudare, ac proinde semper laus tua, esse debebat in ore meo. Sed o mi DEUS! quam parum laudavi te, quàm tepidè, quàm distractè, hætenus laudes tuas deprompsi, quoties plus me, te vanè, & inaniter deprædicavi. 4. Amare est de amato identidem cogitare, & Spiritu conjungi: *Anima quæ amat DEUM, nihil aliud potest cogitare, nil loqui, cætera contemnit;* in Man: Cap: 20. Quàm autem rarò, de te ego cogitavi. 5. Amare (ut paucis multa complectar) est de amato, crebrò, & cum voluptate loqui: *Ex abundantia enim cordis os loquitur.* Aut cum amato crebros miscere sermones: *Amor facit, unum Spiritum de duobus.* Man: Cap: 18. 6. Pro eodem strenuè laborare. 7. Ardua

Ardua pati: *Amor facit idem velle, & idem nolle.* Libr: Cap. In amore enim non vivitur absque dolore. Ego verò, quàm rarò de te locutus sum, quàm modicum laboris suscepi! quam parum sustinui. Et ex his liquet, quàm parum te amârîm. Itaque serò te amavi.

Examinemus insuper amorem nostrum, nùm juxta consilium, petitum, imperatum, promissum divinum, ac minas ad amorem Numinis adeo boni, cor, & affectus inclinaverimus: *Amor enim*, inquit S. Augustinus, *in se omnes traducit, & captivat affectus.* Et fortasse cum Augustino, quilibet meritò lamentari poterit: *Serò te amavi. Tu mi Deus! suavisisti mihi, à te emere aurum ignitum amoris.* Apoc: 3. Sed ego hætenus, consilio tuo non parui, & emere nolui. Petivisti cor meum: *Præbe fili mi Cor tuum mihi.* Prov: 23. Sed ego, illud creaturis dedi, tibi ad amandum præbere nolui. Declarasti voluntatem tuam mihi, quod velles à me amari: *Ignem veni mittere in terram, & quid volo, nisi ut accendatur.* Luc: 12. Ego autem voluntatem tuam non implevi, & velut

Iut lignum viride ignem tuum concipere nolui. Tu mandasti mihi, ut amarem te: *Diliges Dominum DEUM tuum ex toto corde tuo.* At ego hoc mandatum tuum prævaricatus sum, nolens amare; Promisisti cælum amanti, minatus es infernum, amare recusanti: at ego & promissiones, & minas tuas flocci feci, adeoque verè lachrymari me, & lamentari par est cum Augustino: *Serò te amavi.*

Quâpropter, si errorem, defectum, negligentiamque nostram, in amando DEO agnoscamus; nihil aliud restat, nisi dolor, & propositum. i. Quisque dolorem eliciat, quod tam serò unicum, & summum bonum suum amarit, dicatque ex intimis cordis sui medullis. Doleo mi DEUS, quod tam serò te amaverim. Neque amavi te in infantia, neque in pueritia, neque in juventute; neque debitè id præstiti in Religione. Transierunt tot horæ, tot dies, tot menses, & anni, absque tui dilectione, in quibus si voluissem, tot millenos amoris actus elicere, & respondentem illis, cælestes coronas promereri valuissem.

Sed

Sed nunc transijt occasio illa, & tempus pretiosum avolavit. Quid igitur superest, nisi, ut illud, quod restat, breve temporis mei spatium, in amore tui transigam. Hoc itaque nunc est est firmum animi mei decretum: *Dixi nunc capiti.* Diligam deinceps te fortitudo, pulchritudo, & beatitudo mea! diligam te, & tu eris semper in memoria mea, ut tui recorder: tu eris in intellectu, ut te cognoscam, in voluntate, ut tibi bene velim, & te diligam, in ore, ut de te & tecum loquar: in manu, ut pro tua gloria operer & patiar. Cùm vero sine te nihil valeam, dico cum S. Augustino: *Jubes te diligere Dne, da quod jubes, & jube quod vis. O ignis! qui semper ardes, & nunquā in extingveris; O amor! qui semper ferves, & nunquam tepescis, accende me, & accendar, accendar inquam, totus à te, ut totus diligam te.*



Piæ Petitiones S. AUGUSTINI.

*Tardè, & cum aliqua consideratione
recitande.*

Domine Jesu noverim me, noverim te,
Nec aliquid cupiam, nisi te,
Oderim me, & amem te,
Omnia agam, propter te,
Humiliem me, exaltem te,
Nihil cogitem, nisi te,
Mortificem me, & vivam in te,
Quæcunq; eveniant, accipiam à te,
Persequar me, sequar Te,
Semperque optem sequi te,
Fugiam me, confugiam ad te;
Ut merear defendi à te,
Timeam mihi, timeam te,
Et sim inter electos à te,
Diffidam mihi, fidam in te;
Obedire velim propter te,
Ad nihil afficiar, nisi ad te,
Et pauper sim propter te;
Aspice me, ut diligam te,
Voca me, ut videam te,
Et in æternum, fruam te. Amen.

ORE.

O R E M U S.

ABsorbeat quæsumus Domine JESU
 Christe, mentem meam, ignita, &
 melliflua vis amoris tui, ab omnibus,
 quæ sub cælo sunt; ut amore amoris tui
 moriar, qui amore amoris mei digna-
 tus es, in signo Crucis mori. Qui vivis.
 & regnas &c. AMEN.



J N D E X

CONSIDERATIONUM.

D <i>Insertatio Exegetica de vero, & genuino Spiritu Vocationis Canonicorum Regul: Lateranen: - fol. 1.</i>	
<i>Consideratio I. de Fine Vocationis Religiøsæ. fol. - - - - -</i>	17.
<i>Consideratio II. de Felicitate Vo- cationis Religiøsæ & concordia in bono. fol. - - - - -</i>	21.
<i>Consideratio III. de Paupertate Religiøsa. fol. - - - - -</i>	28.
<i>Consideratio IV. de Mundi Con- temptu. fol. - - - - -</i>	34.
<i>Consideratio V. de Vitanda Super- bia & sectanda humilitate. - fol.</i>	40.
<i>Consideratio VI. De honorando DEO in fratribus. fol. - -</i>	48.
<i>Actus eliciendi, quando aliquod bonum proximi videmus vel audimus. fol. - - - - -</i>	53.
<i>Actus eliciendi, cum audimus vel videmus malum proximi. fol. -</i>	55.
<i>Consideratio VII. De Oratione mentali. fol. - - - - -</i>	57.
<i>Consideratio VIII. De devota ho- rarum recitatione. fol. - -</i>	60.
<i>Consi-</i>	

J N D E X.

<i>Consideratio IX. De Orationis studio.</i>	fol. - - - - -	67.
<i>Consideratio X. De abſtinentia eſcæ, & potûs.</i>	fol. - - - - -	75.
<i>Consideratio XI. De abſtinentia extra horam prandij.</i>	fol. -	85.
<i>Consideratio XII. De Sacra Menſe Lectione.</i>	fol. - - - - -	92.
<i>Consideratio XIII. De Modeſtia.</i>	fol. - - - - -	98.
<i>Consideratio XIV. De oculorum cuſtodia.</i>	fol. - - - - -	102.
<i>Consideratio XV. De medijs conſervandæ caſtitaſis.</i>	- - - - -	108.
<i>Consideratio XVI. De Correptione Fraterna.</i>	fol. - - - - -	114.
<i>Consideratio XVII. De triplici Cordis habitu.</i>	fol. - - - - -	120.
<i>Consideratio XVIII. de Charitate DEI.</i>	fol. - - - - -	125
<i>Consideratio XIX. De Refrænanda cupiditate, & abnegatione ſui.</i>	fol. - - - - -	133.
<i>Consideratio XX. Quis ſit Famulus DEI.</i>	fol. - - - - -	138.
<i>Consideratio XXI. De Abnegatione propriæ voluntatis.</i>	fol. -	145.
<i>Conſi-</i>		

J N D E X.

<i>Consideratio XXII. De Bono Usu temporis.</i>	fol. - - - -	150.
<i>Consideratio XXIII. De Cavendo Murmure.</i>	fol. - - - -	155.
<i>Consideratio XXIV. De Pace Fraterna.</i>	fol. - - - -	160.
<i>Consideratio XXV. De Supprimen- da ira.</i>	fol. - - - -	165.
<i>Consideratio XXVI. De Condonan- da Injuria.</i>	fol. - - - -	170.
<i>Consideratio XXVII. De Linguae custodia.</i>	fol. - - - -	174.
<i>Consideratio XXVIII. De dile- ctione Fraterna.</i>	fol. - - - -	179.
<i>Consideratio XXIX. De Obedien- tia.</i>	fol. - - - -	185.
<i>Consideratio XXX. De Honore, & Reverentia erga Superiores.</i>	fol. - - - -	192.
<i>Consideratio XXXI. De Observa- tione Regulae.</i>	fol. - - - -	198.
<i>Consideratio XXXII. Ex auctua- rio exhortationum ad Religiosos, Exemplo S. Augustini, Anima Religiosa seruum suum erga De- um deplorat amorem.</i>	fol. - - - -	206.
<i>Piae Petitiones S. Augustini.</i>	fol. - - - -	219.






APPROBATIO.


EX mandato Illustrissimi Reverend:
Officij Varſavien: & per Maſoviam
Generalis, legi Librum, qui inſcribitur:
*Conſiderationes ſupra præcibuos Articulos
Regulæ Divi Aurelij AUGUSTINI
Epis: Hippo: & Eccleſiæ Doctoris Eximij,*
nihilq; in eo reperi, quod fidei Catholicæ
adverſetur, imò contentas in prælauda-
to Libro Conſiderationes omnes XXXII.
progreſſui in Religioſa perfectione mirè
conducentes, & accommodatas eſſe cen-
ſeo. Varſaviæ die 6tâ Martij, Annò
Dñi 1760.


Stanislaus Kmíta Soc: JESU, Sacræ Theol:
& SS. Can: Doctor, Exa: Diac: Generalis
Præfectus Studiorum mpp.

IMPRIMATUR

FELIX PAULUS TURSKI U. J. D.
CANONICUS Metropolitanus Gnes:
& Varſavien: Vicarius in Spiritualibus
& Officialis Varſavien: ac per Ducatum
Mazoviæ Generalis mpp.







Biblioteka Jagiellońska



stdr0005357

